

Dill' wen dill' kob daa bzej

Matewa'

Dii xoxzto' Jesucrístona'

(Lc. 3:23-38)

1 ¹Dga cho'en dill' nan Jesucrístona' nake' xiin dia che dii Davina' na' dii Abrahama'.

²Abrahama' goke' xa Isaaca', na' Isaaca' goke' xa Jacoba', na' Jacoba' goke' xa Judána' len beñ' bisheeka'. ³Na' Judána' goke' xa Fáreza' len Zárana', na' xneeka' wlie' Tamar. Na' Fáreza' goke' xa Esróma', na' Esróma' goke' xa Arama'. ⁴Na' Arama' goke' xa Aminadaba', na' Aminadaba' goke' xa Naasónna', na' Naasónna' goke' xa Salmónna'. ⁵Na' Salmónna' len Rahaba' gogkake' xaxña' Booza'. Na' Booza' goke' xa Obeda' na' xneena' wlie' Rut. Na' Obeda' goke' xa Isaína'. ⁶Na' Isaína' goke' xa Davina', na' Davina' goke' xa Salomónna'. Na' xña' Salomónna', beena' bika' Davina', goke' xool dii Uríaza'.

⁷Na' Salomónna' goke' xa Roboama', na' Roboama' goke' xa Abíaza', na' Abíaza' goke' xa Ásana'. ⁸Na' Ásana' goke' xa Josafata', na' Josafata' goke' xa Jorama', na' Jorama' goke' xa Uzíaza'. ⁹Na' Uzíaza' goke' xa Jotama', na' Jotama' goke' xa Acaza', na' Acaza' goke' xa Ezequíaza'. ¹⁰Na' Ezequíaza' goke' xa Manaséza', na' Manaséza' goke' xa Amónna', na' Amónna' goke' xa Josíaza'. ¹¹Na' Josíaza' goke' xa Jeconíaza' len beñ' bisheeka', legaken' zoa kana' bche'byen beñ' Babilóniaka' beñ' Israelka' lalle'ka'.

¹²Na' shlak ni zoagake' Babilóniana' golj Salatiela' xiin Jeconíaza', na' Salatiela' goke' xa Zorobabela'. ¹³Na' Zorobabela' goke' xa Abiuda', na' Abiuda' goke' xa Eliaquima', na' Eliaquima' goke' xa Azora'. ¹⁴Na' Azora' goke' xa Sadoca', na' Sadoca' goke' xa Aquima', na' Aquima' goke' xa Eliuda'. ¹⁵Na' Eliuda' goke' xa Eleazara', na' Eleazara' goke' xa Matánna', na' Matánna' goke' xa

Jacoba'. 16Na' Jacoba' goke' xa Joséna' ben' che Maríana', xna' Jesúza', beena' lekzka' nsi'gake' Cristo.

17Na' ka' gok wzoa shda' diaka' wzololenzan dii Abrahama' na' biyoll-lenan dii Davina'. Na' wde zi shda' diaka' bizzololenan dii Davina' axt ka bche'byengake' ben' Israelka' Babilóniana'. Na' wizak zi shda' diaka' bizzolon ka bche'byengake' legake' Babilóniana' axt ka wzoa Crístona', beena' bse'l' Chioza' inabi'e.

Ka golj Jesúza'

(Lc. 2:1-7)

18Ki gok ka golj Jesucrístona': Xnee Maríana' ba nakan ikaa Joséna'ne', na' ka zi' soalene'ne' bi'e, la' Espíritu Santo che Chioza' bene' kwenche bi'e. 19Na' Joséna' beena' ba nakan ikeene', nake' to ben' chon ka cheeni Chioza', na' daa bi goklallee wsi'e Maríana' yel' zto' gokile' choonlalleene' ka kono gakbe'i. 20Na' shlak chza'lallee gone' dga, to anjl che Xancho Chioza' bli'lawe' le' lo bishgal che'na', na' chi'ene':

—José, xiin dia che dii Daví, bi illebo' ikoo Maríana' daa ba no'e, la' Espíritu Sántona' bene' kwenche bi'e. 21Na' sane' to bi' byodo' na' wsi'ob' Jesús, la' leban' yislab' ben' yell cheb'ka' lao saaxya che'ka' kwenche bi kwiayi'gake'.

22Gok yog' diiki kwenche gok ka wna dii beena' wdixjee daa goll Chioza'ne', chi'e:

23To nool wew' wee, na' sane' to bi' byodo',
na' wsi'gake'b' Emanuel.

Na' Emanuel zejín: Chioza' zoalene' cho'.

24Na' ka biban Joséna', bene' kon ka goll anjl che Xancho Chioza'ne' na' wkee Maríana'. 25Na' bi wdelle'ne' axt ki wxanche' bi'do'na', na' bsi'eb' Jesús.

Wyaj ben' sin'ka' jawiagake' Jesúza'

2 1Jesúza' golje' yell Belénna', daa lliá gana' mbani Judeana', kana' chnabia' Heródeza'. Na'ch bal ben' sin', ben' nsed che beljka', za'gake' ka de gana' chla'lə wbillá', bllintegake' Jerusalénna'. 2Na' che'gake':

—¿Gani rey che ben' Israelka', bi'na' ba golj? Nezinto' ba goljb' la' ka de gana' chla'lə wbillá' ble'into' to belj dii bzajniin neto'



Nq' li', yell Belén llio' gani mbani Judeani, lawo'ni ichej to beṅ' inabi'e.

nan ba goljb', daan ba za'nto' kwenche we'la'onto'b'.

³Na' ka beni Heródeza' daa wṅake', gokshejlallee, na' lekzka' yog'lol' ben' Jerusalénka'. ⁴Na'ch Heródeza' goxe' yog'lol' bṅozka' chṅabia', na' beṅ'ka' chli' chsedi ley che dii Moiséza', na' wṅabile' legake' gan chiya' galj Crístona', beena' wse' Chioza' inabi'e. ⁵Na'ch gollgake'ne':

—Yell Belénna' daa mbani Judeanan' galje', la' kan' bzej to beṅ' wdixjee daa goll Chioza' le', chi'e:

⁶Na' li', yell Belén llio' gani mbani Judeani,
aga inacho nako' dii liizelozi bibi zakii ladj yellka'
zakii llia Judeani;
la' lawo'ni ichej to beṅ' inabi'e,
na' gap wwie' beṅ' Israelka', beṅ'ka' nak yell cha'.

⁷Na'ch Heródeza', ka kono gokbe'zi goxe' beṅ' sin'ka' na' wṅabile' legake' batyen'an ble'gakile' belja'. ⁸Na'ch bselee legake' Belénna' na' golle' legake':

—Li shaj, na' li lljadiljyoll bi'do'na', na' kat' yillelileb' na' yidṅale nad' kwenche len' sha' lje'lawaab'.

⁹Na' ka biyoll goll Heródeza' ka', na'ch wza'gake'. Na' belja' daa ble'gakile' kana' zi' sa'gake', zejan xan yabana' llialon lawe'ka', na'



Ki chbejgake' nill' che yaga' le mirra.

ka bllinan gana' zoa bi'do'na', na' na'zə wzoan. ¹⁰Na' ka bizle'i ben' sin'ka' belja', le bibagakile'. ¹¹Na'ch ka wyoogake' loo yoona' ble'gakile' bi'do'na' len xna'b' Maríana'. Na'ch bchek' xibe'ka' na' be'la'ogake'b'. Na' wlejjake' or, na' yal zix, na' lekzka' len nill' che to yag dii chla' zix daa le mirra, na' be'gake'n cheb'. ¹²Ka biyoll be'la'ogake'b', Chioza' bsi'nile' legake' lo yel bishgal che'ka' kwenche bich yidegake' gana' zoa Heródeza'. Daan, bikaagake' nez yoblə ziyajgake' lalle'ka'.

Bxonjgake' wza'gake' Egíptona'

¹³Ka wde biza' ben' sin'ka', to anjl che Xancho Chioza' bli'lawe' Joséna' lo bishgal che'na' chi'ene':

—Wyas, na' bche' bdo'na' len xna'baa na' li shaj gana' mbani Egíptona'. Na' na'z soale ax̄t kat'ch inia' li' yiza'le. La' Heródeza' yiyilje' bdo'na' kwenche wite'b'.

¹⁴Na'ch lii wyaste Joséna' na' bchi'e bdo'na' len xna'baa, na' wal-lə wza'gake' zejlengake'b' gana' mbani Egíptona'. ¹⁵Na'

wzoagake' na'zə axt ka bllin lla wit Heródeza'. Na' daa gok ka', gok ka goll Xancho Chioza' to ben' wdixjee daa golle'ne', kana' wne': “Nad' binia' bi' cha'na' kwenc̄he biza'b' gana' mbani Egíptona'.”

Ben Heródeza' mandad witgake' bi'do'ka'

16Na' ka gokbe'i Heródeza' bi ben ben' sin'ka' ka golle' legake', le bllee. Na' bene' mandad witgake' yog'loḷ bi' byodo'ka' lle' yell Belénna' len yellka' ndiḷ nllagan, bdo' cheenk̄ka' axt bi' chop yizi, bsakee ka to yizka' ba gok ble'i ben' sin'ka' belja'. 17Na' daa bengake' ka', gok daa wna dii Jeremíaza', beena' wdixjee daa goll Chioza' le', ka wne':

18Kwe' wbell na' gakyeshii ben'ka' lle' yella' le Ramá.
Noolka' nak xiin dia che dii Raquela'
ni to kono cheengakile' gonxenlall' legake',
daa wit bi'do' che'ka'.

19Na'ch ka wde wit Heródeza', to anjl che Xancho Chioza' bli'lawe' Joséna' lo yel bishgal che'na' shlak ni zoe' Egíptona', na' chi'ene':

20—Wyas, biche' bi'do'na' len xna'baa na' li yiyaj gana' mbani Israela', la' ba wit ben'ka' cheengakile' witgake'b'.

21Na'ch wyas Joséna' na' bichi'e bi'do'na' len xna'baa na' biyajgake' gana' mbani Israela'. 22Na' ka wnezi Joséna' Arquelawa' ba chnabi'e lo laz dii xe' Heródeza', na' bllebe' yiyajgake' Judéana'. Na' Chioza' wdixje'ile'ne' lo yel bishgal che'na' yiyajgake' gana' mbani Galileana'. 23Na' ka billingake' Galileana' jazoagake' yell Nazareta'. Na' daa jazoagake' na', gok ka wna dii ben'ka' wdixjee daa goll Chioza' legake' kani'yi che Jesúza', wnagake' wsi'gake'ne' ben' Nazaret.

Juanna', beena' bchoa ben' nisa'

(Mr. 1:1-8; Lc. 3:1-9, 15-17; Jn. 1:19-28)

3 1Na' do kana', Juan, beena' bchoa ben' nisa', wyaje' to latj gana' bibi chashj chleb gana' mbani Judeana', na' wdixje'ile' ben'ka' chdi'a chllag na', 2chi'e:

—Li yiyaj yileni dii malka' chonle, la' ba bllin lla inabia' Chioza', beena' zoa yabana', loo yichjllall'do'lena'.

³Na' dii Isaíaza', beena' wdixjee daa goll Chioza'ne', wne' che Juanna':

To ben' gosyee to lo latj ga bibi chashj chleb, na' ine':
 “Li se kwas wzenagle che Xanchona'
 na' wsalj yichjlall'do'leka' kat' zee.”

⁴Na' Juanna' bene' xe'na' de xa kamey, na' nchej lsineena' to yid. Na' wdawe' bish'zo len shin baser daa de lyixaa. ⁵Na' ben'ka' lle' yell Jerusalénna', na' doxen gana' mbani Judeana' na' yellka' llia gaoy yao Jordánna' jazenaggake' dillaa cho'e. ⁶Na' bixoadol'gake' saaxya che'ka', na' bchoa Juanna' legake' nisa' loo yao Jordánna'.

⁷Na' ka ble'i Juanna' zan fariseoka' na' saduceoka' bllingake' lawe'na' kwenche wchoe' legake' nisa', na' golle' legake':

—jLe' naklikzle ka bel znia! ¿Achakile wak wxonjile' yel' zak'zi' daa wsel' Chioza'? ⁸Li gon ka gakbe'i ben' nan dii li ba biyaj bilenile. ⁹Na' bi gakzile bibi yel' zak'zi' ile'ile daa inazle: “Neto' naknto' xiin dia che dii Abrahama'.” Dii li nia' le', axt yajki wak gon Chioza' xiin dia che dii Abrahama'. ¹⁰Yog'lol-le shi bi chonle ka chiyoollalii Chioza' na' gak chele ka chak che to yag dii chbia dii zix dii bi chak wen, na' lii chchogtegake' axt xanin na' chzal'gake'n lo yi'na'. ¹¹Dii li nad' chchoa' le' nisa' daa chiyaj chilenile, per beena' zi' za' kollaana' napche' yel' wak xench ka nad', na' ni bi zakaa gak' xmose' kwenche galj' xe'le'na'. Len' gone' ka yidsoa Espíritu Sántona' loo yichjlall'do'lena', ka le' chiyaj chilenile', na' ben'ka' bi chiyaj chileni wza'lee legake' lo yi' gabila'. ¹²Na' gone' che ben' yell-lioni ka chon beena' nox' yag xozaa daa chpa'ile' trígonaa' na' kooshawee trígonaa' na' wzeye' beb cheyinna' lo yi'na' daa biga yiyolkzə.

Jesúza' wchoe' nisa'

(Mr. 1:9-11; Lc. 3:21-22; Jn 1:31-34)

¹³Na'ch wza' Jesúza' gana' mbani Galileana' wyaje' cho'a yao Jordánna' kwenche wchoa Juanna'ne' nisa'. ¹⁴Na' ka blline', bi nan cheeni Juanna' wchoe'ne' nisa', san chi'ene':

—Li'lan chiya' wcho' nad' nisa', na' li'lə za'zo' kwenche wchoa' li' nisa'.

¹⁵Per Jesúza' golle'ne':

—Ben goklen bchoa' nad' nisa' la' chiya! goncho ka nak daa nllia Chioza' bia' goncho. Na'ch bchoe'ne' nisa'.

¹⁶Na' kon ka biyoll bchoe'ne' nisa' lii bichejte Jesúza' loo nisa' na' lii byaljte yabana' na' ble'ile' Espíritu che Chioza' chetje' ka to palom na' jsoalene' le'. ¹⁷Na'ch bengakile' shii Chioza' zoa yabana' chi'e:

—Beenin nake' Xiin, beena' chakid', na' le chibaid' le'.

Goki dii xiwaa gonan ka wzenag Jesúza' cheyin

(Mr. 1:12-13; Lc. 4:1-13)

4 ¹Na'ch Espíritu che Chioza' bchi'e Jesúza' to latj ga bibi chashj chleb na' dii xiwaa goklalliin kooyela'n le' gone' ka cheenin.

²Na' ka wde choa lla choa yel bibi wdawe', na' wdone'. ³Na'ch bllin dii xiwaa kwite'na' gollan le':

—Shi leilo' nako' Xiin Chios, ben ka yiyak yajki yetxtil.

⁴Na'ch goll Jesúza':

—Cho'a xtill' Chioza' nan: “Aga toz yel' wawa' choe'n yel' mban che benecha', san lekzka' Cho'a Xtill' Chioza' choe'n yel' mban.”

⁵Na'ch dii xiwaa bche'n le' Jerusalénna' daa nak yell che Chioza' na' blepan le' yichj yoodo'na' gana' nak sib wal. ⁶Na'ch gollan le':

—Shi leilo' nako' Xiin Chios, lla bixit'shki ni. La' Cho'a Xtill' Chioza' nan:

Wselee anjl che'ka' gap wwiagake' li',

na' gox'gake' li' kwenche ki koo wchewo' yajka'.

⁷Na' goll Jesúza' len:

—Lekzka' na Cho'a Xtill' Chioza': “Bi wzo' Chioza' gone' daa nazan cho' kwenchezə xenlalloo shi gone' ka ba wne'.”

⁸Na'ch stokzə bizche' dii xiwaane' to lo yaa sib wal na' bliin le' yog' yellka' lle' yell-lioni na' yel' zakii cheyinka'. ⁹Na' gollan le':

—Yog' diiki chle'ilo' gon' li' shi wchek' xibo'na' we'lawoo nad'.

¹⁰Na'ch goll Jesúza' len:

—Biyaj, Satanás, la' Cho'a Xtill' Chioza' nan: “Be'la'o toz Xano' Chioza' na' kon daa ine', lennan' gono'.”

¹¹Na'ch biza' dii xiwaa kwit Jesúza' na' bllin bal anjlka' be'gake'ne' kon bi byalljile'.

Wzolo Jesúza' choe' cho'a xtil' Chioza' gana' mbani Galileana'*(Mr. 1:14-15; Lc. 4:14-15; 5:1-11; 6:17-19)*

12Ka beni Jesúza' wloogake' Juanna' lillyana', bizee biyaje' gana' mbani Galileana'. 13Na' bizee yell Nazareta' na' jazoe' yell Capernaúma', to yell xen dii lia cho'a nido'na' gana' mbani yellio che dia che dii Zabolónna' na' dii Neftalína'. 14Na' daa jazoe' na', gok ka wna dii Isaíaza', beena' wdixjee daa goll Chioza'ne', daa wne':

15Ka nak yell-lío daa naki che dia che dii Zabolónna' na' dii Neftalína',

daa lia shlaa yao Jordánna',
gana' xoa nez daa zej cho'a nido'na'
daa lia gana' mbani Galileana',
gana' lle' zan ben'ka' bi nak ben' Israel,

16ben'ka' lle' na' gok yichjlall'do'eka' shgasj shchol,
na' Chioza' ba bselee to beeni' xen lawe'ka'.
Lao ben'ka' lle' gana' chnabia' yel' wita'
ba chzeeni' beeni' che Chioza'.

17Na' wzolo Jesúza' chyixje'ile' ben' cho'a xtil' Chioza', chi'e:
—Li yiyaj yileni dii malka' chonle, la' ba bllin lla Chioza',
beena' zoa yabana', inabi'e loo yichjlall'do'lena'.

Wlej Jesúza' tap ben' wxen bel' kwenche gongake'ne' txen*(Mr. 1:16-20; Lc. 5:1-11)*

18Na' ka zej Jesúza' cho'a nido' che Galileana' ble'ile' chop bish' ben' wxen bel' chzal'gake' yixja' loo nisa' chzengake' bel'a'. Toe' le Simón na' lekzka' nsi'gake'ne' Pedro, na' beena' sto lie' Andrés. 19Na'ch Jesúza' chi'e legake':

—Li da, dino nad', na' kon ka chonle naa chbejle belki loo nisi, ka'kzan gonle yibejle ben' lao dii mala'.

20Na' ka golle' legake' ka', lii bkwaan'tegake' yixj che'ka' na' zejlangake'ne'.

21Na' zi lat'chga wza'gake' bizle'i Jesúza' zi chop bish' ben', beena' to lie' Jacobo na' beena' sto lie' Juan, ben'ka' nak xiin Zebedewa', lle'gake' to loo barkw chiyonshao'gake' yixja' daa chzengakile' belka'. Na' lekzka' goll Jesúza' Jacóbona' len Juanna'

shajlengake'ne'. ²²Na' lii bkwaan'tegake' barkwa' len xe'ka' na' janogake' Jesúza'.

Jesúza' chli' chsedile' ben' zan

(Lc. 6:17-19)

²³Na' wda Jesúza' yog' yellka' lia doxen gana' mbani Galileana', chli' chsedile' ben' Israelka' gana' chdop chllaggake' choe'lwillgake' Chioza', cho'e dill' wen dill' kob che yel' wñabia' che Chioza', na' biyone' yog' ben' che'i wde wdeli yillwe'. ²⁴Na' doxen gana' mbani Síriana' wze dill' daa chon Jesúza', na' jwa'gake' yog'lol' ben'ka' che'i wde wdeli yillwe', ben' chey chla, ben' yoo dii xiw', ben' chaz shon, na' ben' net ni'a nee. Na' Jesúza' biyone' legake'. ²⁵Na' ben' zan inlleb jano le', ben'ka' lle' yellka' mbani Galileana' na' yellka' mbani Decápoliza', na' ben'ka' lle' yell Jerusalénna' na' yellka' sto mbani Judeana', na' ben'ka' lle' yellka' lia shlaa yao Jordánna'.

Dill'ka' be' Jesúza' lo yaana'

5 ¹Ka ble'i Jesúza' ben' zan ba nogake'ne', na'ch wyep'e' to lo yaa, na' wchi'e. Na'ch ben'ka' nakgake'ne' txen jabig'gake' kwite'na'. ²Na' wzolo Jesúza' chli' chsedile' legake', chi'e:

Ben'ka' zoa mbalaz

(Lc 6:20-23)

³—Chakomba ben'ka' chakbe'gakile' chyalljgakile' gaklen Chioza' legake', la' legaken' yillingake' yabana' gana' chñabia' Chioza'.

⁴Chakomba ben'ka' chbellyesh', la' Chioza' yizoe' legake' mbalaz.

⁵Chakomba ben'ka' nak ben' gaxjlall', la' wllin lla Chioza' wi'e legake' yell-lioni.

⁶Chakomba ben'ka' chzelall' gaggake' ben' li ben' shao', la' Chioza' ine' nakgake' ben' wen lawe'na'.

⁷Chakomba ben'ka' chiyeshii ben', la' ka'kzə yiyeshii Chioza' legake'.

⁸Chakomba ben'ka' nxi nyech yichjlall'do'eka', la' legaken' ile'gakile' Chioza'.

9'Chakomba beṅ'ka' chon to dii byen soalen lḡwellgake' mbalaz, la' ina beṅ' dii likzan nakgake' xiin Chios.


10'Chakomba beṅ'ka' chiya dii chen chle'i daa chongake' ka cheeni Chioza', la' legaken' yillingake' gana' chṅabi'e.

11'Chakomba le' kat' chiya dii na beṅ' chele na' chiya dii chongakile' le', na' kat'ka' chiyilḡlall'gake' bittezə dill' wxiye' chele daa chonḡlall'le nad'. 12Li yiba yizaki, la' yabana' gaple to dii wen dii shao'. La' ka chongakile' le' naa, ka'kzan bchi' bsak'gake' kani'yi dii beṅ'ka' wdixjee daa goll Chioza' legake'.

Nakle ka zed' na' ka beeni'

(Mr. 9:50; Lc. 14:34-35)

13'Len' nakle ka zedaa ladj beṅ' yell-lioki. Zedaa, shi bich zxi'n, aga wakch yiyonchon zxi' ni bich gak wchinchon, na' chchoonchon gana' wlej wshoshj beṅ' len.



*Ki nak zan kwen
kandilka' bchingake'.*

14'Len' nakle ka to beeni' ladj beṅ' yell-lioki. To yell dii llia to lo yaa, zit'lə nla'n, na' bi ngashaan. 15Ni biga zoa to beṅ' chxene' kandila' na' chdose'n to dii wkwashaan len, san chzoe'n sibə kwenche wzeeni'n doxen loo yoonā'. 16Ka'kzan le', li gon to dii byen gonle daa nak wen kwenche ile'i beṅ' na' we'la'ogake' Xacho Chioza' zoa yabana'.

Jesúza' cho'e dill' che ley che dii Moiséza'

17'Bi gakzile bid' kwenche yikwas' ley daa bzej dii Moisézan' wa daa bli' bsedi dii beṅ'ka' wdixjee daa goll Chioza' legaken'. Bi nakan ka', san bid' kwenche yiyoll gak yog'loḡ ka na leya' na' daa bli' bsedi beṅ'ka' wdixjee daa goll Chioza' legake'. 18Dii li nia' le', shlak bin' te che yabana' len yell-lioni, bi init ni shcho'a dill' daa nllia ley che Chioza' bia' gak, axt ki gakch yog'loḡ daa bllie' bia' gak. 19Daan, nottezə beṅ' chyishje' to daa nllia Chioza' bia' goncho, la'kzi dii bi lliatetek, na' shi wliile' beṅ' yoblə gone'

ka chone', bitek bi zakee yabana' gana' chñabia' Chioza'. San beena' gon daa nllia Chioza' bia' goncho na' wliile' ben' yoblə gone'n, beenan' gake' to ben' zakii yabana' gana' chñabia' Chioza'. ²⁰Na' nia' le', aga wak yillinle gana' zoa Chioza' chñabi'e shi toz ka chonlenle fariseoka' na' ben'ka' chli' chsedi leya', chiyal' wzenagchle che Chioza' aga ka legake'.

Bi chiyal' witcho ben'

(Lc. 12:57-59)

²¹Na' lekzka' che' Jesús'a legake':

—Nezkzile goll dii Moiséza' dii xozxto'choka': “Bi chiyal' wito' ben'. La' beena' wit to ben' chiyal' guete' daa bene' ka'.” ²²Per nad' nia' le', nottez beena' chllée bish' ljwelle'na' chidolee tie' lo yel' zak'zi'na'. Na' lekzka' beena' chzoazi'yee bish' ljwelle'na', ben'ka' chñabia' chiyal' wwiagake' nak gongake' che'; na' beena' chnie' bish' ljwelle'na' dill' zibia', chidolee wza' Chioza' le' lo yi' gabiła'.

²³Daan, shi ka zjoo daa chzanilo' wi'o Chioza' na' ka illino' gana' chzeygake'n lljadinilo' ngoolall' to bish' ljwello'na' li', ²⁴na'z bkwaan daa noxoo, zigaate chiyal' lljaye'xeno' bish' ljwello'na', na'tech wak wi'o Chioza' daa chzanilo' wi'one'.

²⁵Shi no cheeni lljtao xya cho' lao joschiska', ben byen yiyoe'xeno'ne' shlak ni de xlatjin. La' shi ba bllino' lao beena' wchogbia' cho', na' gone' li' lo na' beena' wseje' li' lillyana'. ²⁶Dii li nia' li', aga wibeje' li' lillyana' axt ki chixjo' doxen daa chiyal' chixjo'.

Bi chiyal' inelen ljwell ben'

²⁷Nezkzile wna dii Moiséza': “Bi chiyal' ineleno' nool bi nak nool cho'.” ²⁸San nad' nia' le', nottez beena' chwia to noolə na' chza'lalleene' loo yichjlall'do'ena', daa chone' ka' ba benkze' ka chon beena' zoate xoole'na' na' chnelene' nool yoblə.

²⁹Shi jalawo' de shlina' chonan ka gono' dii mala', naklan wen wtoljo'n na' choono'n. La' wenchan soa tlaaz jalawo'na' aga ka daa yiyaj doxentio' lo yi' gabiła'. ³⁰Na' shi noo de shlina' chonan ka gono' dii mala', naklan wen wchogo'n na' choono'n, la' wenchan soa tlaaz noona' aga ka daa yiyaj doxentio' lo yi' gabiła'.

Bi nakan wen yilaa beṅ'ka' nshagna'

(Mt. 19:9; Mr. 10:11-12; Lc. 16:18)

31'Nezkzile wna dii Moiséza': "Nottez beena' yilaa nool che'na' chiyal' chas to yish we'n dill' nan bilaagake'." 32San nad' nia' le' shi to beṅ' byo yilee xoole'na' la'kzi xoole'na' bi chnelene' beṅ' yoblə, daa yileene' chone' ka yikaa noola' beṅ' yoblə na' gake' ka to noolə zoalentie' beṅ' che'na' na' chnelene' beṅ' yoblə. Na' beena' yikee noola' nlaa beṅ' che'na', lekzka' chone' ka chon beena' chnelen xool beṅ' yoblə.

**Bibi wzoacho de taschiw
kat' bin wchebcho**

33'Lezkza' nezkzile golle' dii xoxxtoleka': "Bi wkwaanzo' ka'zə daa ba bchebo' lao Xancho Chioza' shi bzoatio' bi bzo' de taschiw." 34San nad' nia' le', bibi wzoale de taschiw kat' wcheble lao Chioza'. Bi wzoazle yabana' de taschiw, la' yabana' nakan gana' zoa Chioza'. 35Na' ni bi wzoale yell-lioni de taschiw, la' nakan ka gana' nzoa ni'a Chioza'; na' ni Jerusalenna', la' lennan' yell che beena' chnabia' doxen. 36Na' ni bi wzoazle yichjlana' de taschiw, la' aga wak gonle ka yiyak ni to yish' yichjlana' yish' bez' shi nakan dii gasj wa gonle ka yiyakan dii gasj shi nakan yish' bez'. 37San kon inale "wakan" wa inale "bi gakan", la' shi chzoale de taschiw bichlə wa nochlə, dii malan' chonan chonle ka'.

Chiyal' gakicho beṅ'

(Lc. 6:29-30)

38'Lezkza' nezkzile' wna dii Moiséza': "Shi to beṅ' wshoshje' tlaa jalawo'na' lekzka' yiyono' che'. Na' shi to beṅ' wxope' leyo'na', lekzka' yixopo' leye'na'." 39San nad' nia' le': Bi yizi'o wzon che beṅ' mala'. Shi no kap' xagoona' tlaa, bi'e daa zi shlaa. 40Shi to beṅ' chbagoo dii chbagoo che' na' cheenile' ikee xkamiso'na', be'shaze' lente daa nxa kolloona'. 41Na' shi to beṅ' wwee li' yoa' che'na' na' gone' byen woon to kilómetro, wza'lentegan chop kilómetro. 42Na' nottezə beṅ' shi bi inabe' cho', be'n. Na' shi no inabi li' wi'one' shloll bi de cho', bi wllonilo'ne'n.

Chiyal' gakicho ben'ka' chakzbangakile' cho'

(Lc. 6:27-28, 32-36)

43'Na' lekzka' nezile wnagake': "Goki bish' ljwello'na' na' bwiyi ben'ka' chakzi' chakzbangakile' li'." 44San nad' nia' le': Li gaki ben'ka' chakzbangakile' le', li inabi Chioza' gak wen che ben'ka' chsak'zi'gake' le'. 45Shi gonle ka', na'ch inezi ben' nakle xiin Xacho Chioza', beena' zoa yabana'. La' le' chone' ka chla' wbilla' lao ben' mal na' lao ben' wen, na' chone' ka chak yeja' lao ben' chon wen na' lao ben' chon mal. 46Na' shi to ben'ka' nllagzile chakile, aga bi zjanayin, la' ka'klen chon ben' wichixjka' ben'ka' chakile le ben' mal nakgake'. 47Na' shi to ben'ka' nllagzile chwaple chiox, ¿garan de dii wenna' chonle? La' ka'klen chon ben'ka' bi nombia'gake' Chioza'. 48Li gak dowalj ben' li ben' shao' ka nak Xacho Chioza' zoa yabana', nake' dowalj ben' li ben' shao'.

Chiyal' gaklencho ben'

6 1'Bi wli' wzez chele ladj ben' nan nakle ben' wen. La' shi kwencezə ile'i beṇaan chonle daa nak wen, bibi laxjle gon Xacho Chioza', beena' zoa yabana'. 2Na' kat' chaklenle ben'ka' chyallj chchini, bi wzelen dill', ka chon ben' wxiye'ka' gana' chdop chllagcho choe'lwillcho Chioza', wa do yawi nez. Choe'gake' dill' che daa chongake' kwence we'la'o ben' legake'. Dii li nia' le', daa choe'la'o ben' legake', lennan' laxje'ka'. 3San le', kat' choe'le ben' bi dii choe'lene', bi gonlen ka ile'i ben'. Na' ni to ben' bi ye'lene' bin chonle. 4San li gaklen ben' ka kono gakbe'i. Na' Xachona', beena' chen chle'i daa chonle, gone' laxjle.

Ka chiyal' we'lwillcho Chioza'

(Lc. 11:2-4)

5'Na' kat' choe'lwill-le Chioza', bi gonle ka ben' wxiye'ka'. Legake' choollal'gake' sechagake' we'lwillgake' Chioza' gana' chdop chllagcho choe'lwillchone' wa ga lle' lla' ben' kwence ile'gakile' ka chongake'. Dii li nia' le', daa chle'i ben' ka chongake', lezannan' laxje'ka'. 6San le', kat' we'lwill-le Chioza', li yiyoo loo lill-lena' na' li wsej puerta', na' li we'lwill Xachona', beena' kono chle'i. Na'ch Xachona', beena' chen chle'i daa chonle, gone' laxjle.

7'Na' kat' choe'lwill-le Chioza' aga lilezi dill'ka' inale ka chon ben'ka' bi nombia'gake'ne', la' chakgakile' daa choe'gake' dill' zan na' wzenague' bin che'gake'ne'. 8Bi gonle ka chongake', la' Xacho Chioza' ba nezczile' bi daa chyalljile ka zi' inablalen. 9Kat' we'lwill-le Chioza', kin inale:

Xanto' Chios, ben' zoa yaba,
we'la'oshga yog'lol ben' li'.

10Na' inabia'gacho' loo yichjlall'do' yog'lol ben',
kwenche gak lo yell-lioni ka chaklalloo, ka chak
yabana'.

11Ka nak daa chono' cheej chaonto' yog' lla, bengachan
naanlla.

12Wxi'xen chento', ka chon neto' chzi'xennto' bittezə dii
choni ben' neto'.

13Bi we'gacho' latj ibixnto' gonnto' daa bi nak wen, san
bislagach neto' lo ni'a na' dii mala'.

La' lin' napo' yel' wñabia', na' yel' wak, na' lin'
chidoloo shoo balaan xen zejli kani. Kan' nakan.

14'La' shi le' chzi'xenle che ben' shi bi chongakile' le', ka'kzə
Xacho Chioza' zoa yabana' si'xene' chele. 15San shi le' bi chzi'xen
che ljwell-le, ka'kzə Chioza', beena' nak Xale, bi si'xene' dii
malka' chonle.

Daa chiya! goncho kat' zoacho wbas'

16'Kat' zoale wbas', bi gonzle cho'alaolena' nyesh' ka chon
ben' wxiye'ka', la' legake' chon cho'alawe'ka' nyesh' kwenche
gakbe'i ben' bi neej naogake'. Dii li nia' le', daa gakbe'i ben' daa
chongake', lezannan' laxje'ka'. 17San le', kat' soale wbas', li wpaa
yichjlana' na' li chib li wxis cho'alaolena' 18kwenche bi gakbe'i
ben' nan zoale wbas'. San toz Xacho Chioza', beena' kono chle'i,
ile'ile' daa chonle na' gone' laxjle.

Yel' shawaa daa de yabana'

(Lc. 12:33-34)

19'Bi wtop wshagle yel' wni'ana' yell-lioni, la' bal diika' chaljan
baka' chlliyi'gakban, na' balan chibia leyin na' chbiayi'gakan,
wa choo wbanka' na' chkaagake'n. 20San li gon ka gat' yel' shao'

chele yabana', la' daa de yabana' bi galjan bado' wlliyi'ban, ni bi yibia leyin, ni bi gak sho' wbanna' ikeen. ²¹La' gana' de yel' shao' chelena', na'kzan se yichjlall'do'lena' wneyi.

Jalaochoki nakgakan beeni' che kwerp chechoni

(Lc. 11:34-36)

²²Jalaochoki nakgakan beeni' che kwerp chechoni. Shi jalaochoki chle'gakin kwaslol, doxen kwerp chechoni zoan lo beeni'na'. ²³Per shi bi chle'i jalaochoki, kwerp chechoni zoan lo yel choja'. Ka'kzan chak che yichjlall'do'choni. Shi bi chzenagcho che Chioza', ncholi yichjlall'do'choni.

Aga wak goncho yel' wni'ana' txen

na' lekzka' gontecho Chioza' txen

(Lc. 16:13)

²⁴Aga ga zoa to ben' wlane' xshin chop ben', la' wakzbanile' beena' to, na' gakchile' beena' sto, wa gone' xshin beena' to do yichj do lallee na' xshin beena' sto gone'n do ki do lallee. Na' ka'kzan chak checho len Chioza', aga wak goncho ka cheenile' shi we'techo latj inabia' yel' wni'ana' cho'.

Bi kwek yichjcho diika' chyalljicho

(Lc. 12:22-31)

²⁵Daan nia' le': Bitek kwek yichjle daa yeej gaole kwenche ibanle, ni xalaanle. La' zak'techlæ yel' mban chechona' aga ka daa cheej chaocho, na' zak'tech kwerp chechona' aga ka xalaanchona'. ²⁶Li wwiakachi byindo'ka' chda xan yabana', la'kzi bi chaz chaangakb na' bibi chizi' chilapgakb, ni bi zoa ga chgooshaogakb dii gaogakb, len chweej chwaokz Xacho Chioza' zoa yabana' legakb. ¿Alechlin le', zak'techle aga ka bado'ka' ze lo llazæ? ²⁷Na' ni tole bi gak yischooch yel' mban chelena' zi shloll la'kzi nall inleeb zele wneyi cheyin.

²⁸Na' biche chi' yichjzle xalaanlena'? Wwiakachile ka chgol yejdo'ka' ze lyixaa, len aga bi llin chongakan ni bi cholgakan do. ²⁹Per nia' le', ni dii Salomónna', beena' wdapchga yel' shao'ka', bi bllin gak xe'na' xochi ka yejdo'ka'. ³⁰Na' shi Chioza' none' yejdo'ka' ze lyixaa xochi, la'kzi nakan de toldezæ na'tech chtop

ben' len na' chzeye'n, ¿alechla le', gontechle' wen chele gone' xalaanle la'kzi bitek chajle'le gaklene' le'? ³¹Na' bi kwek yichjzle inazle: “¿Bin yeej gaocho?” wa “¿Nak goncho gat' xalaancho?” ³²La' ben'ka' bi nonlilall'gake' Chioza' to daazə chi' yichjgake'. Per Xachona', beena' zoa yabana', nezczile' chyaljile yog' diiki. ³³Na' daa lliarote chiyal' wzenagle che Chioza' kwenche inabile' le', na' gonle kon daa cheenile', na' gonkze' yog' daa chyaljile. ³⁴Bitek kwek yichjle shi wyaj wdele llaka' zi za' la' to to lla nsa' dii zed cheyin.

Bi chiyal' yiya yiyiljcho ben'

(Lc. 6:37-38, 41-42)

7 ¹Bi yiya yiyiljle ben', kwenche bi yiya yiyilj Chioza' le'. ²La' kon ka chiya chiyiljle ben', ka'kzan yiya yiyilj Chioza' le', na' kon ka gonile ben', ka'kzan goni Chioza' le'. ³¿Bi che chwiazol' bicha' yoo loo jalao bish' ljwello'na' na' bi chile'ilo' kwagaa yoo loo jalawo'na'? ⁴Shi bi chle'ilo' kwagaa yoo loo jalawo'na', ¿nakra gono' yoo bish' ljwello'na': “Benshki yibej' bicha' yoo loo jalawo'na'”? ⁵¿Ben' wxiye! Zigaate bwia cho'na' na'tech wwio' che bish' ljwello'na'.

⁶Na' bi gonzle byen we'lenle xtill' Chioza' ben'ka' bi chazlall'gake'n, kwenche ki gongakile' le' znia ka chon bekw'ka' chxoxj chtingakb kat' no chonlegakib. Ni bi we'lenle xtill' Chioza' ben'ka' bi cheengakile' wzenaggake'n kwenche ki wlej wshoshjgake' dillaa ka chon kushka' chlej chshoshjgakb daa bi choolall'gakb gaogakb.

Chiyal' inabicho Chioza' gaklene' cho'

(Lc. 11:9-13; 6:31)

⁷Li inabi Chioza' bin cheenile na' gone'n. Li yiyilj daa cheenile na' yillelilen. Li ine cho'a puerta', na' wsalje'n. ⁸La' beena' chnabile' ben' daa cheenile', we'kze'n; na' beena' chiyilje' daa cheenile', willelkzile'n; na' beena' chne cho'a puerta', wsaljkgake' sho'e.

⁹Le' zoa xiinle, shi inabib' le' to yetxtil aga we'leb' to yaj. ¹⁰Wa shi inabib' le' to bel' yaa, aga we'leb' to bel' znia. ¹¹Shi le' naktele ben' mal chak we'le xiinleka' daa nak dii wen, ¿alechli

Xacho Chioza' zoa yabana' ki gone' le' dii wen dii shawaa shi inabilene'n?

12'Kon ka cheenile goni ben' le', ka'kzan chiyal' gonilene', la' kan' na leya' na' librka' bzej dii ben'ka' wdixjee daa goll Chioza' legake'.

Puert daa nak diido' yid

(Lc. 13:24)

13'Li gon byen sho'le cho'a puerta' daa nshop'. La' nlag' puerta' na' zlag' nak neza' daa zej gana' chbiayi' ben', na' ben' zan choogake'n. 14'Per ka nak neza' daa zej yabana' gana' lljazoalencho Chioza', nakan to nez les, na' to chopchga ben' chillelgakile'n.

Daa chbia lo yaga' chli'n bi yag daa

(Lc. 6:43-44)

15'Li wsak' kwenche bi shajle'le che ben'ka' chonz ka chyixjee daa che' Chioza' legake', na' chonz kwingake' ben' wen ben' gaxjlall', per ben' malzgakan na' chliayi'gake' ben', ka chon to ba znia. 16'Ka ile'ile ka nsa' chegake' na' gakbe'ile non nakgake'. La' nezczile aga wishibcho uvana' to lo yag yesh' na' lekzka' aga wishibcho yixwewa' to lo yag yesh' yaa. 17'Ka'kzan yag wenna' chbian dii wen, na' yaga' daa bi nak wen chbian dii bi nak wen. 18'La' yaga' daa nak dii wen aga wbian dii bi nak wen, na' yaga' daa bi nak dii wen aga wbian dii nak wen. 19'Yog' yag dii chbia dii bi nak wen, chchoggake'n na' chzeygake'n. 20'Daan, wakbe'kzile ka nsa' che ben'ka'.

Aga yog' ben' yilline' yabana' gana' zoa Chioza' chnabi'e

(Lc. 13:25-27)

21'Aga yog' ben'ka' na nad': "Xan, Xan'", yillingake' yabana' gana' chnabia' Chioza', lete ben'ka' chongake' ka cheeni Xa' Chioza', beena' zoa yabana'. 22'Kat'ka' illin llana' yizia' kwent che ben', zangake' inagake' nad': "Xan, Xan', neto' wdixjeento' daa wno', na' kon ye'l' wak cho'na' bibejnto' dii xiw'ka' yoo ben' na' bennto' dii zan ye'l' wak." 23'Na'ch yepgakee: "Biga bembia' le'. Li kwas ka'lə, le' ben' wen dii mal."

Chop beñ' bengake' twej yoo*(Lc. 6:47-49; Mr. 1:22)*

24'Daan, nottez beena' chzenag cho'a xtillaani na' chone' ka nia', nake' ka to beñ' sin', beena' ben lille'na' to lo yaj. 25'Na' ka gok yejsiwaa, bgol yaoka', na' wzechga be'na' nan wllig'gakan yooná', per bi billeen daa chi'cha leninna' lo yaja'. 26'Per beena' cheni cho'a xtillaani na' bi chone' ka nia', nake' ka beena' bi chajni, beena' bxe lille'na' lo yoxa'. 27'Na' ka gok yejsiwaa, bgol yaoka', na' wzechga be'na' na' bllig'gakan yooná' na' wlliyá'tekzan.

28'Na' ka biyoll be' Jesúza' dillii, bibani beñ'ka' ka chli' chsedile', 29'daa bli' bsedile' legake' lega beñ' za'len yeñ' wñabia', aga ka chli' chsedi beñ'ka' chzajni legake' leya'.

Jesúza' biyone' to beñ' che'i léprana'*(Mr. 1:40-45; Lc. 5:12-16)*

8 1'Na' ka biyetj Jesúza' lo yaana', beñ' zan zinogake'ne'. 2'Na' kwite'na' bllin to beñ' che'ile' lepra', na'ch bchek' xibe' lawe'na', chi'ene':

—Xan', nezid' wak yikwaso' yillwe'ni chak' shel' gueenilo'.

3'Na'ch Jesúza' bxoá neena' yichje'na', chi'ene':

—Cheenid'x. Na' ñaate yikwasa'n.

Na' kon ka golle' ka', lii biyakteyi beena'. 4'Na'ch che' Jesúza'ne':

—Ni to kono yoo ka nak daa ba beñ' cho'. Lete wyaj lao bxoza' kwenche' ile'ile' ba biyakilo', na' jwa' daa chiya' lljoo lao Chioza' ka nllia dii Moiséza' bia' goncho kwenche' inezi beñ' ba biyakilo'.

Biyon Jesúza' xmos xan soldadka'*(Lc. 7:1-10)*

5'Ka billin Jesúza' yell Capernaúma' lii bllinte to xan soldad lawe'na', na' got'yoile'ne', 6'chi'ene':

—Xan', xmosaa die' lillaa, na' net tlaa kwerp che'na' na' le chey chle'.

7'Na'ch che' Jesúza'ne':

—Na' sa' yiyonee.

8'Na' che' xan soldadka'ne':

—Xan', aga zakii nad' kwenche shoo loo yoo lillaa. Kon ben mandad yiyakile' na' wiyakkzile'. ⁹Nia' ka' la' zoa ben' chnabia' nad', na' nad' lekzka' chnabia' soldad cha'ka'. Kat' chep' toe': "Wyaj ni'", na' chaje'; na' kat' chep' stoe': "Da ni'", na' chide'; na' kat' chizep' xmosaa: "Ben dga", na' chone'n.

¹⁰Ka beni Jesúza' cho'a xtilleena', bibanile' na' chi'e ben'ka' nogake' le':

—Dii li nia' le', bigan' lltia' to ben' Israel ben' gonlilallee nad' ka chonlilall' beeni nad'. ¹¹Na' nad' nia' le', ben' zan ben' zaak doxen yell-lioni gonlilall'gake' nad' na' lljazoalengake' txen dii Abrahama', dii Isaaca' na' dii Jacoba' yabana' gana' chnabia' Chioza'. ¹²Na' ka nak ben'ka' wlej Chioza' nan lljazoagake' gana' chnabi'e, zane' wzalee gana' shgasj shchol, gana' kwellyesh'gake' na' gaoyaxaxj leye'ka' daa le gakshejlall'gake', daa bi goongakile' inabi'e legake'.

¹³Na'ch che' Jesúza' xan soldadka':

—Biyaj lillo'na', na' gak ka cheenilo' daa chajli'o cha'.

Na' lo lla lo gorzə biyaki xmose'na'.

Biyon Jesúza' tobiin che Pédrona'

(Mr. 1:29-31; Lc. 4:38-39)

¹⁴Na'ch wyaj Jesúza' lill Pédrona', na' ble'ile' de tobiin che'na' yo'e dii lana'. ¹⁵Na' bex' Jesúza' neena' na' bicheje' dii lana'. Na' lii wyastie' bene' dii wdaogake'.

Jesúza' biyone' zan ben'ka' bi shao'

(Mr. 1:32-34; Lc. 4:40-41)

¹⁶Na'ch ka ba chxoá wbillá, jwa'gake' ben' zan gana' zoa Jesúza', ben' yoo dii xiw'ka', na' shcho'azə dillaa bi'e bichejgakan. Na' lekzka' biyone' yog' ben' bi shao'. ¹⁷Gok ka' kwenche gok ka wna dii Isafaza', beena' wdixjee daa goll Chioza'ne', daa wne': "Le' bikee yillwe'ka' che'icho na' bene' ka bigaa yel' chey chla chechona'."

Ben'ka' cheengakile' lljanogake' Jesúza'

(Lc. 9:57-62)

¹⁸Na' ka ble'i Jesúza' ben' zan inleeb ba nechjgake'ne', bene' mandad telene' ben'ka' nakgake'ne' txen shlaa nisdona'lə. ¹⁹Na'

wbig' to ben' chli' chsedi leya', chi'ene':

—Maestro, cheenid' sa'len' li' gattezə shajo'.

20 Na'ch che' Jesúza'ne':

—Bez'ka' nongakb yech ga chiyoogakb, na' byindo'ka' non lildo'gakb, san nad', Ben' Bsel' Chioza' Yell-lioni, bibi lill' de.

21 Na' bchej sto ben' nake' Jesúza' txen na' chi'ene':

—Xan', wza'len' li' gattezə shajo' ka yiyoll guet xa'na'.

22 Na'ch goll Jesúza'ne':

—Da, dino nad'. Wikwash'kzə ljwell ben' wetka'.

Jesúza' bkweze' be'na' lo niso'dna'

(Mr. 4:35-41; Lc. 8:22-25)

23 Na'ch wyoo Jesúza' loo barkwa' len ben'ka' ba nakgake'ne' txen. 24 Na' shlak zej barkwa' wtese'. Na' wzolo wzechga be'na' lo niso'dna', na' wzolo chas chataan na' biyoll nisa' loo barkwa'.

25 Na'ch ben'ka' nak Jesúza' txen jasangake'ne', na' che'gake':

—¡Xan!, bisla cho'! ¡Ba chbe'cho yel!

26 Na'ch che' Jesúza':

—¿Berache chllublikzle? ¿Biçe bi nxenilall'le nad' kwaslo?!

Na'ch wyase' bsheshlene' be'na' len niso'dna', na' wlezgakan.

27 Na' ben'ka' lle'len Jesúza' loo barkwa' bibangakile' ka bene', na'ch che' ljwellgake':

—¿Noran nak beeni, lla? Axt be'na' na' niso'dna' chzenaggakan che'.

Chop ben' Gadara yoogake' dii xiwaa

(Mr. 5:1-20; Lc. 8:26-39)

28 Na' ka bllin Jesúza' yell-liona' mbani Gadárana' daa llia shlaa niso'dna', chop ben' yoogake' dii xiw'ka' bchejgake' loo kapsanta' jatilgake'ne'. Na' daa le zniagake' aga no chak te lo neza' chde gana' zoagake'. 29 Na' besyaagakan che'gakan Jesúza':

—¿Biçe za'zo' gani zoanto', Jesús, Xiin Chios? ¿Aba za'zelo' zidsak'zi'o neto' la'kzi bin' illin lla sak'zi'nto'?

30 Na' gaoz lle' ba zan kush chaogakb. 31 Na'ch got'yoi dii xiw'ka' Jesúza', che'gakan le':

—Shi yibejo' neto' loo yichjlall'do' ben'ki, we'gacho' latj yiyoonto' kushka'.

32Na'ch goll Jesúza' legakan:

—Wakkzan. Li yiyoo shka'.

Na'ch bichej dii xiw'ka' na' biyoogakan kushka', na' kushka' lii bxonjtegakb na' jabixgakb to cho'a yaa na' bxoptegakb loo nisdona' na' wche'gakb yel.

33Na'ch ben'ka' chap kushka' bixonjdogake', na' ka billingake' lalle'ka' gollgake' ben' yellka' doxen ka gok che ben'ka' yoo dii xiw'ka'. 34Na'ch wza' yog' ben' yellka' zjatilgake' Jesúza', na' ka ble'gakile'ne' got'yogakile'ne' yiyaje' gan yoblə.

Jesúza' biyone' to ben' net tlaa kwerp che'na'

(Mr. 2:1-12; Lc. 5:17-26)

9 1Na' biyoo Jesúza' to loo barkw, na'ch bilag'gake' shlaa nisdona' na' billine' yell che'na' gana' wzee. 2Na' bllinlengake' to ben' net ni'a neena' lawe'na', nxoagake'ne' to lo daa. Na' gokbe'i Jesúza' le nonlilall'gake'ne', na'ch golle' ben' we'na':

—Btiplaloo, xiin', ba biyakxen xtołoona'.

3Na'ch bal' ben'ka' chli' chsedi leya' che' ljwellgake': “Ba chonz kwın beeni ka Chioza' daa ne' ka'.” 4Na' gokbe'i Jesúza' daa wza'lall'gake', na' chi'e legake':

—¿Biçe chza'lall'zle ka'? 5¿Achakile chyalljchid' yeł' wak xench yep' beeni: “Ba bizi'xen' saaxya cho'na'”, ka daa yepee: “Biyas na' bigoo nez”? 6Na' wliid' le', nad', Ben' Bsel' Chioza', nap' yeł' wñabia' yell-lioni kwenche yizi'xen' saaxya che ben'.

Na'ch golle' beena' net ni'a neena':

—Biyas, bitob daa cho'na', na' biyaj lillo'na'.

7Na'ch biyas beena' net ni'a neena' na' ziyaje' lille'na'. 8Na' ka ble'i ben'ka' ka gok, bibangakile', na' be'la'ogake' Chioza' daa bi'e yeł' wak xenna' to ben' yell-lío.

Wlej Jesúza' Matewa' kwenche gone'ne' txen

(Mr. 2:13-17; Lc. 5:27-32)

9Ka biza' Jesúza' na', ble'ile' to ben' wıchıxj, lie' Mateo, chi'e gana' chchıxje'. Na' chi'ene':

—Da, dino nad'.

Na'ch lii wzolla'te Matewa' janoe'ne'.

¹⁰Na' shlak chi' Jesúza' lill Matewa', bllin ben' zan wìchìxjka' na' zan ben' zeyi cheyi bi nsa' chegake' wen, wche'gake' cho'a mesa' wdaolengake' Jesúza' len ben'ka' nakgake'ne' txen. ¹¹Na'ch ka ble'i fariseoka' chaolen Jesúza' ben'ka', na'ch wñabgakile' ben'ka' nakgake'ne' txen, che'gake':

—¿Bìche chaolenz maestro cheleni ben' wìchìxjki len ben'ki bi nsa' cheyin wen?

¹²Na' beni Jesúza' daa goll fariseoka', na'ch chi'e legake':

—Aga ben'ka' shawaan chyalljgakile' wen rmecha' san ben'ka' bi shawaan chyalljgakile'ne'. ¹³Li yiyaj na' li lljased bin zeji Cho'a Xtill' Chioza' gana' nan: “Nad' cheenchid' yiyeshii ljwell-le, aga ka daa witle bayix'ka' kwenche we'la'ole nad'.” Aga bid' ni che ben'ka' nak ben' li ben' shao', san bid' ni che ben' saaxyaka'.

**Wñabgakile' Jesúza' bìche bi chzoa
ben'ka' nakgake'ne' txen wbas'**

(Mr. 2:18-22; Lc. 5:33-39)

¹⁴Na'ch ben'ka' nak Juanna' txen jabig'gake' kwit Jesúza' na' wñabgakile'ne' che'gake':

—Neto' na' fariseoka' zeyi chento' chzoanto' wbas'. Na' ¿bìche ben'ka' nakgake' li' txen bi chzoagake' wbas'?

¹⁵Na'ch che' Jesúza' legake':

—Kat' chak to wishagna' ben'ka' chdi'a chllag lill ben' byona' aga chdagake' nyesh', san cheej chaogake'. Na' ka'kzan ben'ki nakgake' nad' txen, cheej chaogake' ñaa zوالen' legake', per wllin lla wkwas ben' nad' kwite'ka', kana'chan soagake' wbasaa.

¹⁶Ni to kono chida' lat' lech' kob lee lech' gola', la' kat' shechan na' yibe' lech' koba' na' wsho'chan dii gola' na' gana' nlllo' gakchan dii xench. ¹⁷Na' aga no chгаа vino daa zi' bchejte loo yid gola', la' wchez' yid gola' na' laljə vinona', na' ka vinona' ka yida' kwiayi'gakan. San chiya' sholl vino daa zi' bchejte loo yid koba' kwenche ni ton bi kwiayi'.

Jesúza' biyone' xiin Jairona' len noola' jexee xe'na'

(Mr. 5:21-43; Lc. 8:40-56)

¹⁸Na' ni choe'te Jesúza' dill', ka bllin to ben' wñabia' na' bchek' xibe'na' lao Jesúza', chi'ene':

—Shintg wit to bi' nool cha'; per shi li' sa'gacho' na' w_xoa noona'b' na' yibam'.

19Na'ch lii wzolla'te Jesúza' zejlene' ben'ka' nakgake'ne' txen lill ben' w_nabia'na'. 20Na' ka zejgake' lill ben' w_nabia'na' jano to noolə legake', na' ba gok shllin yiz chzoe' wbaa. Na'ch wbiguee koll' Jesúza' be_xee xe'na', 21la' chakile': "Kon shel' ba be_xaa xe'na' wiyakkzid'." 22Na' biyechj Jesúza' na' ka ble'ile' noola' chi'ene':

—Btiplaloo, xiin', ba biyakilo' daa chonlilaloo nad'.

Na' lii biyakteyi noola'.

23Na' ka bllin Jesúza' lill ben' w_nabia'na' ba lle' ben'ka' chkwel bllaja' na' ben' zan ba chosyaagake' chbellgake'. 24Na'ch che' Jesúza' ben'ka':

—Li yillesh ni. Aga witba'n san cheszbaan.

Per bxill-ligake'ne'. 25Na' ben Jesúza' byen billeshgake', na' wyo'e na' be_xee na' bi' nool weta' na' lii biyasteb'. 26Na' yog' yellka' llia gaoz wze dill' daa bene'.

Biyon Jesúza' chop ben' lchol

27Na' ka biza' Jesúza', chop ben' lchol janogake'ne'. Na' chosyaagake' zilljə che'gake':

—¡Biyesh'lall'gachi neto', xiin dia che dii Daví!

28Ka biyoo Jesúza' loo yooná', ben' lcholka' jabig'gake' kwite'na'. Na'ch che' Jesúza' legake':

—¿Achajle'le wak gon' ka ile'ile?

Na'ch goll ben' lcholka'ne':

—Awe, Xannto', wak gono' ka ile'into'.

29Na'ch bex' Jesúza' jalawe'ka' na' golle' legake':

—Daa chonlilall'le nad' na' gak ka cheenile.

30Na'ch bile'gakile'. Na' Jesúza' golle' legake':

—Li gon byen kono ye'le ka'.

31Per ka biza'gake' kwite'na' lii wzolotegake' choe'gake' dill' doxen gana' mbani yella' daa ben Jesúza' chegake'.

Biyon Jesúza' to ben' bi chak inə

32Shlak chiza' ben'ka' gok ben' lchol, bllin ben' yoblə lao Jesúza' nche'gake' to ben' bi chak inə daa wyo'e dii xiwaa. 33Na'

kon ka bibej Jesúza' dii xiwaa yoo beena' na' binie'. Na' bibani ben'ka' lle' na', nagake':

—Ni shlin bin' ile'icho yell Israeli to ye! wak ka dga ba ben beeni.

34 Per fariseoka' che'gake':

—Beeni chibeje' dii xiw'ka' kon ye! wak che daa chnabia' legakan.

Chyallj ben' zan gongake' xshin Chioza'

35 Na' wda Jesúza' yog' yellka', ka yell xen ka yelldo', chli' chsedile' to to gana' chdop chllag ben' Israelka' choe'lwillgake' Chioza'. Wdixje'ile' legake' dill' wen dill' kob che ye! wnabia' che Chioza' na' biyone' ben' che'i bittezə yillwe'. 36 Na' ble'i Jesúza' ben' zan zejlangake'ne' na' biyeshile' legake', la' gokbe'ile' ka nyesh'lazan chak chegake', ka xil' ba kono xanin zoa. 37 Na'ch golle' ben'ka' nakgake'ne' txen:



Ben'ka' zi' gon'ilall'gake' Chioza' zaklebgakile' to dii wlliachga to lo yell-lío, na' chyallj no yizi' yilapan, per to chopchga wen llinka' zoa. Mt. 9:37

—Dii li nia' le', beṅ'ka' zi' gonlilall'gake' Chioza' zaklebgakile' to dii wlliachga to lo yell-lío, na' chyallj no yizi' yilapan, per to chopchga wen llinka' zoa. ³⁸Na' li inabi Xancho Chioza' wzanche' beṅ'ka' wtopgake' beṅ'ka' gonlilall'gake'ne'.

Jesúza' wleje' shllin beṅ'ka' gakgake' postl che'

(Mr. 3:13-19; Lc. 6:12-16)

10 ¹Na'ch biti'a Jesúza' beṅ'ka' shllin wleje' na' bi'e legake' yel' wṅabia' kwenche gak yibejgake' dii xiw'ka' yoo beṅ', na' yiyongake' beṅ' che'i bittezə yillwe'.

²Na' kin le postlka' shllin: zigaate wleje' Simónna', beena' lekzka' che'gake' Pedro, len beṅ' bishee Andréza', na'tech Jacóbona' len beṅ' bishee Juanna', beṅ'ka' nak xiin Zebedewa', ³na'ch Felípena', Bartoloména', Tomáza', Mateo, beṅ' wichixja', Jacobo xiin Alfewa', Tadewa', ⁴Simón, beena' bsi'gake' Zelote, na' Jud Scariota', beena' bene' Jesúza' lo na' beṅ' malka'.

Bsej' Jesúza' postlka' shllin je'gake' cho'a xtill' Chioza'

(Mr. 6:7-13; Lc. 9:1-6)

⁵Na'ch bsej' Jesúza' beṅ'ka' shllin je'gake' cho'a xtill' Chioza', na' chi'e legake':

—Bi shajle yellka' gana' zoa beṅ'ka' bi nak beṅ' Israel, ni bi shajle yellka' llia gana' mbani Samáriana'. ⁶San li shaj gana' lle' beṅ' Israelka', beṅ'ka' nak ka xil' ba wnit. ⁷Li shaj li lljtixjee ba zoa gaoshosh inabia' Chioza' beena' zoa yabana' loo yichjlall'do' beṅ'. ⁸Li yiyon beṅ'ka' bi shao' na' beṅ'ka' che'i lepra, li yisban beṅ' ba wit, na' li yibej dii xiw'ka' yoo beṅ'. Na' ka beṅ' Chioza', beṅ'e' le' yel' waka' ka'z, ka'kzan le' bibi wchixjle yiyonle beṅ'.

⁹Na' bi wa'le mech de or, de plat ni de cobre. ¹⁰Na' ni bi gal'le no yixj les, ni bi gox'le zi shkwe' xale, ni zi shkwe' xel-le, ni bi gox'le yag bar, la' to wen llin chidolee yeej gawe'.

¹¹Na' kat' illinle to to yell xen wa yelldo'zə, chiljle to beṅ' nsa' che' wen, na' yigaanle lille'na' na' na'tezə soale ax̄t ka illinch lla yiza'le. ¹²Na' ka sho'le lille'na' ye'lene': “Chioza' wzoe' le' mbalaz.” ¹³Na' shi dii li beṅ'ka' lle' na' nakgake' beṅ' wen, wakkzə daa ye'le legake'; san shi bi nakgake' beṅ' wen, na' aga wakan. ¹⁴Na' gattezə illinle shi kono wleb le' na' ni bi wzenaggake' chele, na'

yiza'le lill beena' wa yella' gana' gongakile' le' ka' na' yishible bishtena' llia ni'aleka'. ¹⁵Dii li nia' le', kat' illin lla wchoglo Chioza' che beñ', yeñ' zak'zi' xench ile'chi beñ' yella' gana' gongakile' le' ka' aga ka beñ' yell Sodómana' na' yell Gomórrana'.

Yeñ' zak'zi'ka' yen ile'i beñ'ka' nak Jesucristona' txen

¹⁶'Nad' chselaa le' ka xildo' ladj ba zniaka'. Na' chiyal' gagle beñ' sin' na' beñ' wen. ¹⁷Wsak'gale, la' wchey beñ' lljwee le' lao beñ'ka' chñabia' na' wit chingake' le' gana' chdop chllagcho choe'lwilcho Chioza'. ¹⁸Na' lljwa'gake' le' lao beñ' wñabia' xenka' daa chonlilall'le nad', na' ka' gak we'lenle legake' cho'a xtilaana' na' ka'kzə beñ'ka' bi nakgake' beñ' Israel. ¹⁹Na' kat' gongake' le' lo na' beñ'ka', bi sele wñeyi naklə inale wa bi inale, la' ka gal' inele, Chioza' wxoe' dillaa cho'a loll'leka'. ²⁰La' aga len' inele, san Espíritu che Xacho Chiozan' gone' ka inele.

²¹'Beena' zoa beñ' bishee leteze' gone'ne' lo na' beñ'ka' witgake'ne', na' beena' zoa xiine' gone'b' lo na' beñ' wite'b'. Na' soa beñ' yizoshi'e xaxneena' na' gone' legake' lo na' beñ'ka' witgake' legake'. ²²Yog'lol beñ' gakzbangakile' le' daa nonlilall'le nad', per beena' so sakile' bittezə daa yen ile'ile' axt kat' guete', beenan' gat' yeñ' mban che' zejli kaní. ²³Shi to yell yilaggake' le', li yiyaj yell yoblə. La' dii li nia' le' bilan' yiyoll tale yog'lol yellki mbani Israeli kat' illin lla yiyed' nad', Beñ' Bsel' Chioza'.

²⁴'To beñ' chsed aga zak'che' ka beena' chli' chsedí le', na' ka'kzə to wen llin aga zak'che' ka xane'na'. ²⁵Na' beena' ni chsed yibaile' gake' ka beena' chli' chsedí le', na' ka'kzə wen llinna', yibaile' gake' ka xane'na'. Nad' nak' xanle, na' shi nagake' cha' non' txen dii xiwaa daa le Bezlo, ¿alelə ki inagake' chele ka'?

¿Non chiyal' illebcho?

(Lc. 12:2-9)

²⁶Bi illeble beñ'ka' biya dii wchi' wsak'gake' le'. La' daa kono nezi naa, wllin lla ila'lawin, na' aga ga de to dii ngash' dii bi illin lla ila'lawin. ²⁷Diika' chli' chsedid' le' do ngash'zə, li we'n dill' ladj lkwe' beñ'. Na' diika' nia' le' to le'zə, li wzenin yog'lol beñ'. ²⁸Bi illeble beñ'ka' cheengakile' witgake' le', la' kwerp chele na'zan witgake', aga bi gak gongakile' yichjlall'do'lena'. San

Chiozan' chiyal' illeble, la' len' wakə wlliyee kwerp chelena' len yichjlall'do'lena' lo yi' gabila'.

29' La'kzi wak si'cho chop byindo' kon to sintabdo', ni tob bi guet shi Xacho Chioza' bi wi'e latj. 30'Na' ka nakle le', axt yish' yichjlena' nlabe'. 31'Daan bi chiyal' illeble, la' zak'ch le' aga ka ba zan byindo'ka'.

Ben'ka' chchebgake' lao ben' nan nombia'gake' Jesúza'

(Lc. 12:8-9)

32'Beena' we' dill' lao ben' ine' nake' nad' txen, ka'kzə nad' yep' Xa'na' zoa yabana' nake' nad' txen. 33'Na' beena' bi chcheb lao ben' nan nake' nad' txen, ka'kzə nad' yep' Xa'na' zoa yabana' bi nake' nad' txen.

Ni che Jesúza' gak ben' choplə

(Lc. 12:51-53; 14:26-27)

34'Bi gakkzile bid' lo yell-lioni kwenche gon' ka soalen ljwelle ben' mbalaz. Aga daan bid', san bid' kwenche wxia' wdil. 35'Daa bid' na' yidil-len ben' byona' xe'na' na' noola' yidil-lene' xneena', na' beena' zoa xoolille' yidil-lene' le'. 36'Na' ben'ka' zoa toz yoo gakkzbani ljwelle'.

37'Beena' chakchile' xe'na' wa xneena' aga ka nad', bi chidolee gake' nad' txen, na' ka'kzə shi chaktechile' xiine'na' ka nad', lekzka' bi chidolee gake' nad' txen. 38'Beena' bi chzani yel' mban che'na' yen ile'ile' bittezə kwenche gone' ka nia', bi chidolee gake' nad' txen. 39'Na' beena' chakile' shel' kono wchi' wsak' le', beenan' kwiayee. San beena' chzani yel' mban che'na' yen ile'ile' bittez daa nonlilallee nad', beenan' gat' to yel' mban che' zejli kani.

Ben'ka' soagake' mbalaz yabana'

(Mr. 9:41)

40'Beena' wlebe' le', nad'kzan chlebe'. Na' beena' wlebe' nad' lekzka' Chioza', beena' bsel' nadaan, chlebe'. 41'Beena' wlebe' to ben' chyixjee daa che' Chioza'ne', lenkzen' ikee ka laxj beena' chyixjee daa che' Chioza'ne'. Na' lekzka' beena' wlebe' to ben' chone' daa nak shli daa chibaile' nake' ben' li ben' shao', lekzka'

lene'n ikee ka laxj beena' chon daa nak shli. ⁴²Na' beena' we' la'ch' lat' nis yeej ben'ki nakgake' nad' txen, dii li nia' le', de laxje'.

11 ¹Na' ka biyoll goll Jesúza' ben'ka' shllin bin chiya' gongake', na'ch bizee na', na' jali' jasedile' ben' na' jtixje'ile' legake' cho'a xtill' Chioza' yellka' llia gana' mbani Galileana'.

Ben'ka' bsel' Juan wichoa nisa'

(Lc. 7:18-35)

²Na' Juanna' beena' chchoa ben' nisa', ba die' lillyana'. Ka wnezile' daa chon Crístona', na'ch bselee chop ben'ka' nakgake'ne' txen gana' zoe'. ³Na' janabgakile'ne' che'gake':

—¿Alin' beena' ba llia bia' yid?, ¿anti chiya' kweznto' sto ben' yoblə?

⁴Na'ch che' Jesúza' legake':

—Li yiyaj na' li lljayell Juanna' daa chenile nia' na' daa chle'ile chon'. ⁵Li lljayelle' chon' ka chle'i ben' lcholk'a', na' chiza' ben'ka' bi chak sa', na' chiyaki ben'ka' che'i lepra, na' chiyeni ben' kwellka', na' chisban' ben'ka' ba wit, na' chyixje'id' ben' yesh'ka' dill' wen dill' kob che Chioza'. ⁶Chakomba beena' chajle' cha' na' bi chakchoplallee.

⁷Na' ka biza' ben'ka' bsel' Juanna', na'ch wzolo Jesúza' be'lene' ben'ka' lle' na' xtill' Juanna', chi'e legake':

—¿Nakran nsa' che beena' jawiale latja' gana' bibi chashj chleb? ¿Anake' to ben' chakchoplallii che dill'ka' cho'e? ⁸Shi bi nakan ka', ¿nakran nak beena' jawiale? ¿Ato ben' nakw xalaane' dii le nakə? Bi nakan ka'. La' nezczile ben'ka' nakw xalaangake' dii le nak zoagake' loo yoo lill ben' wñabia'ka'. ⁹¿Nakrakzan nak beena' jawiale? ¿Ato ben' chyixjee daa che' Chioza'ne'? Dii li kan' chone', na' chontechle' ka ben'ka' chyixjee daa che' Chioza' legake'. ¹⁰La' che beenin cho'e Cho'a Xtill' Chioza' dill' daa nan:

Wselaa beena' kwialo lawo'na',

na' chixji'e xtilloona' kwenche soa ben' wzenaggake' cho' kat' illino'.

¹¹Dii li nia' le', ladj yog' ben' yell-lioki, ni toe' bin' ichej gake' ben' zak'chi' aga ka Juanna' beena' chchoa ben' nisa'. Per nottezə

beena' choe' latj inabia' Chioza' yichjall'do'ena', zak'teche' aga ka Juanna'.

12'Kon ka wzolo Juanna' bchoe' ben' nisa' axt naanlla, zoa ben' chsej chllongake' kono wleb yel' wnabia' che Chioza'.^a 13Librka' daa bzej dii ben'ka' wdixjee daa goll Chioza' legake' na' leya' bzej dii Moiséza' wdixjeegakan che yel' wnabia' che Chioza', na' lekzannan' cho'e Juanna' dill' naa blee. 14Na' shi cheenile shajle'le dga nia' le', lekzen' Elíaza', beena' nagake' yid kwenche chixji'e cho'a xtil' Chioza'. 15Ka le' chenile dga nia', li sen wneyi.

16'¿Bera ka wsaklebid' le' mbanle naa? Le' chonle ka bi'do'ka' lle' gana' chak yaana' na' chosyaagakb' che' l'jwellb': 17“Bkwellnto' blleja' na' bi byaale, na' be'nto' daa chon nyesh' na' ni bi wchellkzle.” 18La' Juanna' bi weej wdawe' dii wen dii shao', na' wnagake' che': “Dii xiwaan yo'e.” 19Na'ch wdena' bid' nad' nak' Ben' Bsel' Chioza' Yell-lioni, na' cheej chaw', na' nagake' nak' to ben' waoxat na' to weezo, na' lekzka' nagake' non' txen ben' wen dii malka' na' ben' wichixjka'. Per yel' sin' che Chioza' chli'lawin ka chsa' che ben'ka' chzenaggake' che'.

Yellka' gana' bi bzenaggake' che Jesúsza'

(Lc. 10:13-15)

20Na'ch wzolo Jesúsza' bsheshlene' ben' yellka' gana' bli'che' yel' waka', daa bi biyaj bilengakile' xtoleeka'. Na' wne':

21—¡Nyesh'laz gak chele, le' ben' yell Corazín! ¡Nyesh'laz gak chele, le' ben' yell Betsaida! La' shel' ben'ka' lle' yell Tírona' na' yell Sidónna' ble'gakile' yel' wakka' ba ble'ile, lii biyaj bilentel'jagakile' xtoleeka', na' gokwljagake' lech' zeshaa na' bllaagake' dena' yichje'ka' daa le gokyesh'gakile', shel'ka'. 22Na' daa bi biyaj bilenile, ba nia' le', llana' wchoglo Chioza' che ben', dii walch sak'zi'le aga ka ben' Tíroka' na' ben' Sidónka'. 23Na' le' ben' Capernaúm, ¿chakile willinle yabana'? Aga willinle na', san latj gana' sak'zi'len yillinle. La' shel' ben' Sodómaka' ble'gakile' yel' wakka' daa ba ble'ile, balja biyaj bilengakile' saaxya che'ka'

^a 11:12 Zoa ben' chsej chllongake' kono wleb yel' wnabia' che Chioza': dga nakan to dii lallj. Lekzka' bal ben'ka' nsed nagake' versíciloni zejín: zoa ben' chongake' axt ga zeelo chakgake' kwenche inabia' Chioza' legake'.

na' ni ndia yella', shel'ka'. ²⁴Daan nia' le', kat' illin lla wchoglo Chioza' che ben', dii walch sak'zi'le aga ka ben' Sodómaka'.

Mbalaz soa ben'ka' gonlilall'gake' Jesúza'

(Lc. 10:21-22)

²⁵Na' lo gora' wne Jesúza', chi'e:

—Xa, li' nako' xan yabana' na' yell-lioni, choe'lawaa li' daa bkwashilo' ben' sin'ka' diika' ba bliilo' ben'ka' bibi chajni.

²⁶Beno' ka', Xa, la' kan' wyazlalloo.

²⁷Na'ch goll Jesúza' ben'ka':

—Xa'na' bene' lall' na' yog'lo' daa chon'. Na' ni to kono nombia'yen' nad' lete Xa'na', na' lekzka' kono nombia'yen' Xa'na' lete nad' nak' Xiine' len ben'ka' cheenid' gon' ka gombia'gake'ne'.

²⁸Li gonlilall' nad', yog'le le' ba chjshiaile na' nakle ka ben' ntakw nchej to dii zii dii zshab, na' nad' gon' ka yizi'lall'le. ²⁹Li gon ka nia', na' li wzenag daa chzajniid' le', la' nad' nak' ben' gaxjlall' na' gon' ka gat' yel' wixi'lall' chele. ³⁰Daa nia' le' gonle aga nakan dii bi gak gonle, na' daa chli' chsedid' le' bi nakan dii bi so sakile.

Ben'ka' nak Jesúza' txen wdishjgake' trígona' llana' chombaangake'

(Mr. 2:23-28; Lc. 6:1-5)

12 ¹To lla sabd, llana' chombaang ben' Israelka', wdelen Jesúza' ben'ka' nakgake'ne' txen to ga naz to ben' trígona', na' ben'ka' zejlengake'ne' wzolo wdishjgake' trígona' na' wdaogake'n. ²Na' ka ble'i fariseoka' daa chon ben'ka', na'ch che'gake'ne':

—Bwia ka chon ben'ki nakgake' li' txen, chongake' daa bi chiya' goncho llani chombaangcho.

³Na'ch che' Jesúza' legake':

—¿Abin' wlable ka ben dii Davina' len ben'ka' nakgake'ne' txen ka wdongake'? ⁴Wyo'e loo lill xlatj Chioza' na' wdoyoe' yetxtilka' daa naki che Chioza' daa toz bxozka' de lsens gaogake'.

⁵¿Abin' wlable leya' gana' nan aga bi xya nakan che bxozka' la'kzi chongake' llinna' loo yoodo'na' llaka' chombaangcho? ⁶Na' nia' le', ladjleni zoa to ben' zak'che' aga ka yoodo'na'. ⁷Bilja wyajniile bi

zeji Cho'a Xtill' Chioza' daa na: "Nad' cheenchid' yiyeshii ljwell-le, aga ka daa witle bayix'ka' kwenche we'la'ole nad'." La' shel' le' wyajniilen, aga waole xya che ben' bi nap dol', shel'ka'. 8Nad', Ben' Bsel' Chioza' Yell-lioni, chnabi'a lao llani chombaanchō.

Jesúza' biyone' to ben' llana' chombaanchō ben' Israelka'

(Mr. 3:1-6; Lc. 6:6-11)

9Na'ch biza' Jesúza' latja', na' biyaje' gana' chdop chllag ben' Israelka' choe'llwillgake' Chioza'. 10Na' ladj ben'ka' len to ben' net tlaa neena'. Na' fariseoka' chwiagake' naklō ka si' sengake' kwēche gaogake' xya che Jesúza', na'ch wñabgakile'ne', che'gake':
—¿Beran na leya'? ¿Ade lsens yiyoncho to ben' bi shao' llani chombaanchō?

11Na'ch che' Jesúza' legake':

—Shi nole zoa to xil' chele na' ixopb to loo yech llaki chombaanchō, ¿abi yibejleb? 12Na' ¿zak'techlō benecha' aga ka xilaa! Daan de lsens goncho daa nak wen llaki chombaanchō.

13Na'ch golle' beena' net tlaa neena':

—Bli noona'.

Na' ka bli neena' lii biyakten ka nak daa zi shlaa. 14Na' ka biza' fariseoka' gana' chdop chllaggake', be'gake' dill' nak sho' xnezi witgake' Jesúza'.

Daa wna dii Isaíaza' che Jesúza'

15Ka gokbe'i Jesúza' daa cheengakile' gongake', na' bizēe ziyaje' gan yoblō. Na' ben' zan inlleb janoe'ne' na' biyone' yog' ben'ka' bi shao'. 16Na' golle' ben'ka' biyone' bi we'gake' dill' daa chone'. 17Daa bene' ka', billinin ka wna dii Isaíaza', beena' wdixjee daa goll Chioza'ne', kana' wne':

18Beenin nake' wen llin cha', beena' ba wlej',
na' le chakidee na' chazlallaa ka chone'.

Na' wzoa' Espíritu cha'na' loo yichjlall'do'ena',
na' chixje'ile' ben'ka' lle' yell-lioni ka cheenid'
gongake'.

19Bi gakdil-lene' ben',

na' ni bi gosyee wi'e dill' yawi nez.

20Aga wisyoll wistoe' chishje' yaxtila' daa ba chashjē.

na' aga wisole' mesha' daa ba chiyol,
axt ki gone' gan wli'lao yel' li yel' shao' che'na'.

21 Na' beñ' lle' doxen yell-lioni gongake' lez len' gaklene'
legake'.

Nagake' che Jesús'a' chibeje' dii xiw'ka' kon yel' wak cheyinna'
(Mr. 3:19-30; Lc. 11:14-23; 12:10)

22 Jwa'gake' lao Jesús'a' to beñ' yo'e dii xiw' na' bi chle'ile'
ni bi chak inie'. Na' bibej Jesús'a' dii xiwaa yo'e, na' bile'ile' na'
gokte binie'. 23 Yog'lo' beñ'ka' bibangakile' ka nak daa bene',
na' chisne':

—¿Aaga beenin xiñ dia che dii Davina', beena' chbezcho,
lla?

24 Ka beni fariseoka' dillaa choe' beñ'ka', na' che'gake':

—Aga bi yel' wak nap beeni. San yel' wak che Bezlona', daa
chnabia' dii xiw'ka'zan, chibejile' diika'.

25 Na' gokbe'i Jesús'a' daa chza'lall' fariseoka', na'ch chi'e
legake':

—Shi gana' chnabia' to beñ' na' tilgake' to lezgake' na' gakgake'
choplə, na' kwiayi' gana' chnabi'e, na' ka'kzə shi to yell wa beñ'
lle' toz yoo gakgake' choplə aga wdiagake'. 26 Ka'kzə Satanáza',
shi yibej ljiwell dii xiwiinka' yoo beñ', aga wdia yel' wñabia'
cheyinna', shel'ka', la' to lezgakannan' chidil-len kwingakin.
27 Le' nale chibej' dii xiwaa yoo beñ' kon yel' wak che Bezlona'
daa chnabia' legakan. ¿Shera beñ'ka' nakle txen? ¿Alekzka'
lennan' chibejlengake' dii xiw'ka' yoo beñ'? Daa bi nakan ka',
na' chli'n nakllejile. 28 Na' shi nad' chibej' dii xiw'ka' kon yel'
wak che Espíritu che Chioza' zejin ladjleni ba bla' yel' wñabia'
che Chioza'.

29 'Aga no gak sho' lill to beñ' wal na' kwane' dii de che' shi
bi wcheje'ne' zigaate. Na'chan gak kwane' lille'na'.

30 'Beena' bi chone' nad' txen, len' chakzbanile' nad'; na'
beena' bi chaklene' nad' kwenche wzenag beñ' che Chioza', len'
chsej chlone' wzenaggake'.

31 'Na' nia' le', wizi'xen Chioza' yog' saaxya chelena' na' yog'te
dii mala' daa chbell chnele, san shi inele zban che Espíritu
Sántona' na' cheyi diika' chone', aga wizi'xen Chioza' chele.

32Na' shi no ine cha', nad', Ben' Bsel' Chioza' Yell-lioni, lekzka' wizi'xen Chioza' che', san beena' ine che Espíritu Sántona', aga wizi'xene' che' naa zoe' yell-lioni ni kat' illin llana' wchogloe' che ben'.

Kon ka nak yaga', ka'te nak daa chbian

(Lc. 6:43-45)

33'Nezicho yaga' daa nak wen chbian dii wen, na' yaga' daa bi nak wen aga bi dii wen chbian. Kon ka nak yaga', ka'te nak daa chbian. 34Le' ben' wen dii mal! ¿Nakra gonle inele daa nak dii wen daa nakle ben' mal? La' yog' dill' daa chchej cho'a loll'chona' za'n loo yichjlall'do'chona'. 35Beena' nak ben' wen cho'e dill' wen, daa yoo dii wenna' loo yichjlall'do'ena'; na' beena' nak ben' michian bi cho'e dill' yejni'alallii, daa yoo dii michianna' loo yichjlall'do'ena'. 36Na' nad' nia' le', kat' illin lla yizi' Chioza' kwent che yog' ben', kanan' yidele kwent che yog'te dill'ka' kontele wnele. 37La' shi le' choe'le dill' wen, na'ch ina Chioza' bibi dol' nable; per shi le' bi choe'le dill' wen, na' wchogloe' chele sak'zi'le.

Wnabi ben' malka' Jesúza' wli'e to yel' wak

(Mr. 8:12; Lc. 11:29-32)

38Na'ch bal fariseoka' na' ben'ka' chli' chsedi leya' che'gake' Jesúza':

—Maestro, cheeninto' ile'into' gono' to yel' wak kwenche gakbe'into' shi Chiozan' bselee li'.

39Na' che' Jesúza' legake':

—Le' nakle ben' mal na' ben' bi chzenag che Chioza' chñable ile'ile' yel' waka' kwenche wli'n shi Chiozan' bselee nad', per aga wliid' le' daa cheenile. Lete ile'ile' to dii nak ka yel' wak daa ben Chioza' che dii Jonáza'. 40La' Jonáza' wyo'e shonə lla shonə yel loo lee bel xenna', na' ka'kzə nad', Ben' Bsel' Chioza' Yell-lioni, shon lla shon yel igaana' loo bana'. 41Kat' illin lla wchoglo Chioza' che ben' yell-lioni, kanan' dii ben' Níniveka' gaogake' xya chele, le' zoale naa, la' legake' biyaj bileni saaxya che'ka' kana' wdixje'i dii Jonáza' legake' cho'a xtill' Chioza'. Na' nad', zak'techid' aga ka dii Jonáza' na' bi chzenagle cha'.

42Na' lekzka' llana' kat' wchoglo Chioza' che ben' yell-lioni, noola' wñabia' yellka' lle' do lli'lə gawe' xya chele, le' zoale ñaa, la' len' wzee zit' nleb bidzenague' dill' sin' daa wñe dii Salomónna'. Na' nad', zak'techid' aga ka dii Salomónna' na' bi chzenagle cha'.

Dii xiwaa daa chiyoo ben'

(Lc. 11:24-26)

43'Kat' chichej dii xiwaa yoo ben', na' chdan gana' bibi chashj chleb chyiljan gana' yizi'lalliin. Na' kat' bi chllelin gana' yizi'lalliin, 44na'ch chakin: "Yiyaach' dii yoblə gana' bichejzkz!" Na' kat' yillinan gana' bichejan, nakan ka to yoo desh dii nxi nloa. 45Na'ch lljaxi'n zi gall dii xiw'ka' nakch dii malch aga ka len, na' sho'gakan beena'. Na' gaktech mal che beena' aga ka gok che' dii nech. Ka'kzan gak che ben' malka' lle' ñaa.

Bllin xña' Jesúsza' len ben' bisheeka' gana' zoe'

(Mr. 3:31-35; Lc. 8:19-21)

46Ni choe'lente Jesúsza' ben'ka' dillaa ka bllin xñeena' len ben' bisheeka' goklall'gake' wshaljlengake'ne' na' wzegake' lesh' chyoonaa'. 47Na' goll to ben' Jesúsza':

—Xñoona' len ben' bishooka' zegake' lesh' chyoonaa' cheengakile' wshaljlengake' li'.

48Na' che' Jesúsza' beena' golle'ne' ka':

—¿Noran xña'na' na' noran ben' bishaaka'?

49Na'ch bli'e ben'ka' nakgake'ne' txen na' chi'e:

—Ben'kin xña'na' na' ben' bishaaka'. 50La' nottezə beena' chon ka cheeni Xa'na' zoa yabana', beenan' nake' ben' bishaa, ben' zan' na' xña'.

Jempl che to ben' goz goon

(Mr. 4:1-9; Lc. 8:4-8)

13 1Na' lo llana'tezə wza' Jesúsza' yoonaa' gana' zoe' na' jchi'e cho'a nisdona'. 2Na' daa bdop ben' zan gana' chi'e, na' wyep'e' jshie' to loo barkw. Na' yog' ben'ka' bdop bllag wzegake' cho'a nisdona'zə. 3Na'ch bseese zanjemplka' kwenche bli' bsdile' legake', chi'e:

—To ben' goz goon wzee zeje' goza'. ⁴Na' ka zej chzalee binna', bxop balan cho'a neza' na' bllin byinka' wdaogakban. ⁵Na' zi balan bxop ladj yajka' gana' bitek chi' yona', na' lobe' bilaan daa bi wyazan zitj. ⁶Na' ka wna'n wbilla', bkwedan na' wbillten daa bitek bde loinna'. ⁷Na' zi balan bxop ladj yag yesh'ka', na' bgol yag yesh'ka' na' bi be'gakan latj igolgakan. ⁸Na' zi balan bxop lo yo wenna', na' wlliachgan. Balan wllia to guiyoa, na' zi balan wllia guiyon na' zi balan wllia shichoa. ⁹Ka le' chenile dga nia', li sen wneyi.

Jesúza' bzajniile' biche chzoe' jemlka'

(Mr. 4:10-12; Lc. 8:9-10)

¹⁰Na' ben'ka' nak Jesúza' txen jabig'gake' kwite'na', wnabgakile'ne':

—¿Biche chseeso jemlka' kat' chli' chsedilo' ben'?

¹¹Na' che' Jesúza' legake':

—Chioza' cho'e latj inezile ka nak yel' wnabia' che'na' daa kono nezi. Na' ben'ka' bi nak nad' txen, bi cho'e latj inezgakile'n. ¹²La' beena' ze wneyi shajniile' Cho'a Xtill' Chioza', zizikli shajni'chile'n. Na' beena' bi se wneyi shajniile'n, na' gal-lallee daa ba wyajniile' lat'. ¹³Daan chseesaa jemlka' kat' chzajniid' legake'. La' ben'ka' chwiategake' na' bi chakbe'gakile' bin zeji daa chon', na' chengakile' daa chnia' na' bi chajni'gakile' bin zejín, daa bi chajle'gake' cha'. ¹⁴Na' daa chongake' ka', chillinin ka wna dii Isaíaza' ka wdixji'e daa goll Chioza'ne', daa na:

La'kzi yengakile', aga wyajni'gakile' bi zeji daa yengakile'.

Na' la'kzi ile'gakile', aga wakbe'gakile' bi zeji daa ile'gakile'.

¹⁵La' yichjlall'do'eka' nchol nntin,
na' chongake' ka ben' ndap naguín
na' ka ben' nshod' jalawin.

She'l' bi chongake' ka', na' shajni'gakile' daa chzajniid'
legake'

na' chazan loo yichjlall'do'eka'

na' yiyaj yilengakile' dii malka' chongake',

na' yiyongakee sto ben' wen.

16'Per chakomba le' chakbe'ile bi zeji diika' chle'ile chon' na' chajniile diika' chli' chsedid'. 17Dii li nia' le', zan dii ben'ka' wdixjee daa goll Chioza' legake' na' zan dii ben'ka' bsa' cheyin wen lao Chioza' goklall'gake' ile'gakile' ka dga chle'ile naa, na' bi ble'gakile'n. Na' goklall'gake' yengakile' ka dga chenile naa na' bi bengakile'n.

Bizajinii Jesúza' legake' bi zeji jempl che ben' goz goona'

(Mr. 4:13-20; Lc. 8:11-15)

18'Li wzenag bin zeji jempl che ben' goz goona'. 19Beena' cheni cho'a xtill' Chioza' daa chzajniin le' che yel' wñabia' che'na', na' bi chajniile'n, nake' ka cho'a neza' gana' bxop binna' daa wdao byindo'ka', la' dii xiwaa chikwasan cho'a xtill' Chioza' daa wyoo loo yichjlall'do'ena'. 20Na' beena' cheni cho'a xtill' Chioza' na' le chibaile' chlebe'n, nake' ka ladj yajka' gana' bxop binna' 21 daa bitek bi loin bde na' bi bdian. La' kat' bi chak che' wa chchi' chsak' ben' le' ni che cho'a xtill' Chioza', na' lii chbejte yichje'n. 22Na' beena' cheni cho'a xtill' Chioza' per chi' yichje' diika' chak che' na' chzelall'tie' yel' wni'ana', na' chsej chllongakan gon xshin cho'a xtill' Chioza' lo yel' mban che'na'. Beenan' nake' ka daa bla' ladj yag yesh'ka' daa bi be'gakan latj igolan. 23Per beena' cheni cho'a xtill' Chioza' na' chajniile'n na' chone' ka nan, nake' ka yo wenna' gana' bxop binna', na' balan wllian to guiyoa, balan do guiyon, na' zi balan wllian shichoa.

Jempl che yixaa daa bla' ladj trígona'

24Na' bsees' Jesúza' sto jempl, chi'e legake':

—Yel' wñabia' che Chioza' nakan ka to ben' goze' bin wenna' lo yell-lío che'na'. 25Per wal' chela' shlak chese', wyaj to ben' chakzbanile'ne' jeze' ladj trígona' daa nak xenin, na' ka biyoll bene' ka' bizee. 26Na' ka bgol trígona' na' wllian, na' lekzka' bgolte xeninna' ladjinna'. 27Na' wyaj wen llinka' jellgake' xaninna': “Ben'do', ¿aaga bin wenna' jezo' lo cho'na'? ¿Gara wza' xeninna' lenzan ladjinna', lla?” 28Na' che' xaninna' legake': “Nochod' ben' chakzbanile' nad' jene' ka'.” Na' goll wen llinka' le': “¿Acheenilo' shajnto' lljalall'nto'n?” 29Na' chi'e legake': “Bi lljalall'len, la' nxoll lente trígona' wllall'le. 30San igol-lenchan trígona', na' kat' illin

lla yichoggake'n, na' yep' ben'ka' zigaate yilall'gake' xeninna' na' gongake'n shlen wej kwenche sheyan, na'tech yitopgake' trígona' na' yigooshao'gake'n loo lillinna'."

Jempl che sa mostásana'

(Mr. 4:30-32; Lc. 13:18-19)

31 Na' lekzka' bzoa Jesúza' sto jempl, chi'e:

—Yel' wñabia' che Chioza' nakan ka sa mostásana' daa goz to ben' lo yell-lío che'na'. 32 La'kzi sa mostásana' nakan liizelozi diido' yid lao bichlə sa yix' kwan, kat' chl'a'n na' chgolan na' chakan dii xench aga ka yix' kwanka' sto, na' axt byindo'ka' chon lillbka' lo xozinna'.

Jempl che levadúrana'

(Lc. 13:20-21)

33 Na' lekzka' bzoe' sto jempl, chi'e:

—Yel' wñabia' che Chioza' nakan ka levadúrana' daa chchix to noolə shoña rob yezja' kwenche yisgolan kwa che yetxtila'.

Jesúza' bchine' jemplka'

(Mr. 4:33-34)

34 Jesúza' toshiizi bchine' jemplka' ka bi'e dill' ladj lao lkwe' ben'. 35 Na' daa ben Jesúza' ka', billinin daa wdixjee to ben' daa goll Chioza'ne', ka wne':

Wchin' jemplka' ka we'len' ben' dill'.

We'len' ben' dill' cheyi daa konon' inezi dezd kana' bxe bsilte Chioza' yell-lioni.

Bizajonii Jesúza' bi zeji jempl che yixaa daa bla' ladj trígona'

36 Na' bisa' Jesúza' ben'ka' lle' na', na' biyo'e loo yooná. Na' ben'ka' nakgake'ne' txen jabig'gake' kwite'na' che'gake'ne':

—Bizajonii neto' bi zeji jempl che xen trígona'

37 Na' goll Jesúza' legake':

—Kin zejín: Nad', Ben' Bsel' Chioza' Yell-lioni, zaklebid' beena' goz trígona'. 38 Na' doxen yell-lioni zaklebin gana' goz beena' trígona'. Na' ben'ka' choe'gake' latj chñabia' Chioza' yichjlall'do'eka' zaklebgakile' trígona'. Na' ben'ka' choe'gake'

latj chñabia' dii xiwaa yichjlall'do'eka' zaklebgakile' xen trígona'.
 39Na' dii xiwaa zaklebin ben' mala', beena' jez ladj trígona' daa
 nak xenin. Na' llana' chilapgake', zaklebin llana' kwiayi' yell-lioni.
 Na' anjlka' zaklebgakile' ben'ka' chizi' chilap trígona'. 40Na' ka
 chitopgake' daa nak xen trígona' kwenche wzeygake'n, ka'kzan
 gak che ben'ka' chñabia' dii xiwaa yichjlall'do'eka' ka illin lla
 kwiayi' yell-lioni. 41Nad', Ben' Bsel' Chioza' Yell-lioni, wselaa
 anjl cha'ka' kwenche yitopgake' ben' wen dii malka' na' ben'ka'
 chzechgake' ben' yoblə gongake' dii mala'. 42Na' wzal'gake'
 legake' lo yi' gabiła' gana' kwellyesh'gake' na' gaoxaxj leye'ka'
 daa le gakshejlall'gake'. 43Na' ben' li ben' shao'ka' sho'gake'
 balaan choo balaan xen yabana' gana' chñabia' Xacho Chioza'.
 Ka le' chenile dga nia', li sen wneyi.

Jempl che mecha' ngash'

44'Yeł' wñabia' che Chioza' nakan ka to mech xen dii ngash' to
 lo yell-lío che ben' gana' to ben' jadi'en. Na' na'tezə bikwasheen,
 na' chibaile' jayet' jadie' yog' dii de che' kwenche bizi'e yell-liona'
 gana' ngash' mecha'.

Jempl che to perla dii zak'chga

45'Yeł' wñabia' che Chioza' zaklebin to ben' chone' delgens
 che perla dii zak'chga. 46Na' ka bllelile' to dii liizelozí zakii,
 na'ch jayet' jadie' yog' dii de che' kwenche wxi'en.

Jempl che yixj che belə'

47'Yeł' wñabia' che Chioza' zaklebin to yixj che bel. Ben'ka'
 chzen belə' chzal'gake' yixja' loo nisdona' na' chzenan zan kwen
 bel. 48Na' kat' chilla' yixja' na' chibejgake'n cho'a nisdona' na'
 chbe'gake' chibegake' belka' nak wen na' chgooshao'gake'b to
 loo llom, na' baka' bi nak wen, chchoongake'b. 49Kan' gak che
 benecha' ka illin lla kwiayi' yell-lioni. Anjlka' yibegake' ben'
 wenka' ladj ben' malka', 50na' wzal'gake' ben' malka' lo yi' gabiła'
 na' kwellyesh'gake' na' gaoxaxj leye'ka' daa le gakshejlall'gake'.

Dii koba' na' dii gola'

51Na'ch che' Jesús'a' ben'ka' nakgake'ne' txen:



*Chibegake' bełka' nak wen na' chgooshao'gake'b to loo
llom, na' baka' bi nak wen, chchoongake'b. Mt. 13:48*

—¿Azajniile yog' daa ba bli' bsedid' le'?

Na'ch che'gake'ne':

—Awe, zajniinto'n.

52 Na' chi'e legake':

—Beena' chli' chsedile' leya' na' nzedile' che yel' wñabia' che Chios, beena' zoa yabana', zaklebile' to xan yoo beñ' ngooshawee dii zan dii zakii, ka dii kob na' ka dii gol, na' chbeje'gakan chçhine'gakan.

Jesúza' biyaje' Nazareta'

(Mr. 6:1-6; Lc. 4:16-30)

53 Ka biyoll bsees' Jesúza' jemplka', na' bizee. 54 Na' ka billine' yell Nazareta' gana' bgole', na' bli' bsdile' beñ' Israelka' chdop chllag gana' choe'lwillgake' Chioza'. Na' bibani beñ'ka', che'gake':

—¿Gara jxi' beeni yel' sin' che'na', na' nak chak chone' yel' wakka'? 55 ¿Aaga xiin karpintera'zan na' xneena' lie' María? Na' ¿aaga beñ' bishee Jacóbona', Joséna', Simónna' na' Júdaza'? 56 Na' beñ' zane'ka' zoagake' lallchoni. ¿Gara jasede' yog'loł diiki chli' chsedile', lla?

57 Na' daa bi wyajle'gake' che Jesúza', na' golle' legake':

—To ben' chyixjee daa che' Chioza'ne', gattez chgoogake'ne' balaan san lall lille'na' aga no chgoo le' balaan.

58Na' aga bitek ye'l' wak ben Jesúza' yell Nazareta' daa bi wyajle'gake' che'.

Betgake' Juanna', beena' bchoa ben' nisa'

(Mr. 6:14-29; Lc. 9:7-9)

14 1Na' do kana', Heródeza', beena' chñabia' gana' mbani Galileana', benile' ka nak daa chon Jesúza'. 2Na' golle' ben'ka' chon xshine'na':

—Beenan' dii Juanna', beena' bchoa ben' nisa'. Ba bibane' ladj ben' wetka', daan chak chone' ye'l' wakka'.

3La' kana' ni mban dii Juanna', Heródeza' bselee ben' bex'gake'ne' na' wloogake'ne' lillyana' ni che Herodíaza' xool ben' bisheena', beena' le Felipe. 4La' dii Juanna' golle' Heródeza':

—Bi nakan wen nkoo xool ben' bishoona'.

5Na' daa golle'ne' ka' goklall' Heródeza' wite'ne', per bi biyaxjile' daa bblebe' ben'ka' chajle' daa nak Juanna' to ben' chyixjee daa che' Chioza'ne'. 6Per ka wya'i Heródeza' yiz, bi' nool wew' che Herodíaza' byaab' lao ben'ka' lle' lnina'. Na' daa le biyoolallii Heródeza' ka byaab' 7axt bzoe' Chioza' de taschiw bchebe' wi'eb' bittezə dii inabib' le'. 8Na' kon ka bzajni xna'baab' bem', na' che'b' Heródeza':

—Yichj Juanna', beena' chchoa ben' nisa', cheenid' goño'n nad' to lo plat llilj.

9Na' gokyeshii Heródeza', per daa ba bcheble' lao yog' ben'ka' goxe' lnina' wi'eb' kon daa inabib' le', benshaze' byen we'gake'b' daa wnabb'. 10Na' bselee ben' jachoggake' yichj Juanna' loo lillyana'. 11Na' bliiagake'n to lo plat llilj na' be'gake'n bi' nool wewaa na' be'baan xna'baa.

12Na'ch ben'ka' wdalen Juanna' txen wyajgake' jaxi'gake' kwerp che'na' na' bkwash'gake'n. Na' wdena' jellgake' Jesúza' ka gok.

Jesúza' bwawe' gayaa mil ben'

(Mr. 6:30-44; Lc. 9:10-17; Jn. 6:1-14)

13Na' ka wnezi Jesúza' daa gok che Juanna', bizee gana' zoe' na' biyo'e to loo barkw ziyaje' gana' kono ben' lle'. Na' ka wnezi

ben'ka' lle' yellka' llia gaozə cho'a nisdona' galan zej Jesúza', na'ch wloogake' nez janogake'ne'. ¹⁴Na' ka bichej Jesúza' loo barkwa', ble'ile' ben' zan inleeb ba lle' na', na' biyeshile' legake' na' biyone' ben'ka' bi shao'. ¹⁵Na' ka ba wlle', na'ch ben'ka' nak Jesúza' txen jabig'gake' kwite'na', che'gake'ne':

—Ba wlle' naa, na' gani lle'cho kono zoa wit' dii gaochi. Goll ben'ki yiyajgake' yellka' llia gaozə kwenche ljxi'gake' dii gaogake'.

¹⁶Na' che' Jesúza' legake':

—Bi chonan byen yiyajgake'. Len', li we' dii gaogake'.

¹⁷Na' che'gake'ne':

—Gay'chga yetxttil na' zi chopchga bel noa'nto' ni.

¹⁸Na' che' Jesúza' legake':

—Li gonshkin ni.

¹⁹Na'ch golle' ben'ka' kwe'gake' lo yixa'. Na' bexee yetxtilka' gay' na' belka' chop na' blis lawe'na' yabana' na' bi'e Chioza' yel' choxken. Na'ch bxoxje' yetxtilka' na' bi'en ben'ka' nakgake'ne' txen kwenche be'gake' che che ben'ka'. ²⁰Na' wdao yog'lol ben'ka' axt ka beljgakile'. Na' ka bidaogake', na'ch bitopgake' diika' bgaan, na' biyakan shllin xet'. ²¹Na' ben' byoka' wdao gokgake' ka do gayaa mil, na' bi blabgake' noolka' na' bi'do'ka' wdao.

Jesúza' wzee lo nisdona'

(Mr. 6:45-52; Jn. 6:16-21)

²²Ka wde dga bigoo Jesúza' ben'ka' nakgake'ne' txen to loo barkw kwenche yilag'gake' shlaa nisdona' to lezgake', na' le' bigaane' kwenche bisee ben'ka' bdop bllag. ²³Na' wde bisee ben'ka', na'ch wyep'e' to lo yaa kwenche jelwille' Chioza' toze'. Na' ni zetie' lo yaana' ka gol. ²⁴Na' barkwa' gana' ziyoo ben'ka' nakgake'ne' txen ba zejan gchol nisdona'. Chakan to ki to ka'lə daa chas chat' nisa', na' be'na' bi cho'en latj yiyajan shlich'a. ²⁵Na' zbalz biyetj Jesúza' lo yaana' na' bizee tlo nisdona' zeje' gana' zejləgake'. ²⁶Na' ka ble'i ben'ka' non Jesúza' txen zeje' tlo nisa', le bllebgake' na' axt besyaagake', nagake':

—jBa za' to yel bxen!

²⁷Na' lii wnet'e' Jesúza' legake', chi'e:

—Bi illeble. Nad'kzan'.

²⁸Na'ch wne Pédrona' chi'e:

—Xan', shi lin', ben ka gak saa lo nisi kwenche yid' kwito'na'.
29Na' che' Jesúza'ne':

—Dashka'.

Na'ch bchej Pédrona' loo barkwa' na' wzoloe' chzee tlo nisa' nan shaje' kwit Jesúza'. 30Per ka gokbe'ile' zechga be'na', na' bllbe' na' lii wzolote chbi'e yel, na'ch besyee chi'e:

—jXan', bisla nad'!

31Na' lii biyox'te Jesúza' neena', chi'ene':

—¿Berache gokchopzilo'? ¿Biçe bi nxenilaloo nad' kwaslo?'

32Na' kon ka biyoogake' loo barkwa' na' bgan be'na'. 33Na' ben'ka' bgaan loo barkwa', be'la'ogake' Jesúza' na' gollgake':

—Dii li, lin' Xiin Chioza'.

**Jesúza' biyone' ben'ka' bi shao'
gana' mbani Genesareta'**

(Mr. 6:53-56)

34Na' ka blag'gake' shlaa nisdona' na' bllingake' gana' mbani Genesareta'. 35Na' ben' Genesaretka' biyombia'gake' Jesúza' na'ch bzungakile' ben' yellka' lle' gao nan ba bllin Jesúza'. Na' jwa'gake' yog' ben'ka' bi shao' lawe'na', 36na' got'yogakile'ne' wi'e latj la'ch' gox' ben' we'ka' xe'na', na' yog' ben'ka' bex'gake'n biyakgakile'.

Daa chxinj yichjlal'do' benecha'

(Mr. 7:1-23)

15 1Ba' fariseoka' na' ben'ka' chli' chsedi leya', wza'gake' Jerusalénna' na' wyajgake' lao Jesúza', wñabgakile'ne':

2—¿Biçe ben'ki nakgake' li' t xen bi chongake' ka wyoolo dii xoxzto'choka'? La' bi chixis chiyib neeka' ka zi' gaogake'.

3Na' wñabi Jesúza' legake' chi'e:

—¿Biçe chyishje daa nllia Chioza' bia' gonle na' zechle wñeyi chonle ka ben dii xoxzto'choka'? 4La' kin wna Chioza': "Li gap xaxna'le balaan", na' "Beena' ine zban che xe'na' wa xneena', chiyal' guete'." 5Per le', nale wak ye' ben' xaxneena': "Bi gak gaklen' le', la' yog' daa nap' ba ncheb' wi'an Chioza'." 6Na' beena' yee xaxneena' ka', cho'allalene' daa nale bi chonan byen gaklene' legake'. Na' daa chonle ka', chonile daa nllia Chioza'

bia' goncho ka to dii bibi zakii kwenche nole diika' wyoolo dii xoxto'choka'. 7; Le' ben' wxiye', le' wen gan! Kwaslöl inlebe' dii Isaíaza' xtille', ka wne':

8 Ben'ki choe'la'ogake' nad' de cho'a loll'zgake',
la' aga do yichj do lall'gaken' choe'la'ogake' nad'.

9 Bibi zjanayin chonzgake' ka ben' choe'la'o nad';
na' diika' chli' chsedgakile' nakgakan che ben'
yell-lioz.

10 Na' wne Jesúza' ben'ka' lle' na', golle' legake':

—Li wzenag dga inia' le' na' li shajniin. 11 Aga daa cheej chao banaan chxinj chlenan yichjlall'do'ena', san dill'ka' chchej cho'enan', lennan' chxinj chlenan yichjlall'do'ena'.

12 Na'ch ben'ka' nak Jesúza' txen wbig'gake' kwite'na', gollgake'ne':

—¿Azakbe'ilo' gokzi'chgayi fariseoka' ka bengakile' wno' ka'?

13 Na'ch goll Jesúza' legake':

—Nottezə ben' bi chzenague' che Xa'na' zoa yabana', yiyol yinite', na' gak che' ka chak che to yag dii chlall' ben' do loyin.

14 Jwayishazi fariseoka', la' nnit ncholgakilen'. Na' nezicho shi to ben' lchol wchi'e sto ljwell lchole', choptie' lljabix'.

15 Na'ch Pédrona' golle' Jesúza':

—Bizajnii neto' bi zejin jempla' daa ba bseesoo.

16 Na'ch goll Jesúza' legake':

—¿Alezkka' lenle bin' shajniile bi zejin daa ba wnia'? 17 ¿Abi nezile nan daa cheej chaocho chjche'n loo leechona' na'tech chiden? 18 Per ka nak daa chnecho, lennan' chalj chxen loo yichjlall'do'chona'. Na' shi chnecho dii bi nak wen, lennan' chxinj chlenan cho'. 19 La' loo yichjlall'do' benechan' chalj chxe diiki bi nak wen: yel' chon xya, yel' chnelen ljwellin, yel' wban, yel' chyiljall' che ben', na' yel' chbell chne che ben'. 20 Diikin chxinjan yichjlall'do' ben', aga daa bi chixis chiyib neena' ka zi' gawen'.

To noolə bi nak ben' Israel ben'ilallee Jesúza'

(Mr. 7:24-30)

21 Na' biza' Jesúza' wyaje' gana' mbani yell Tírona' len yell Sidónna'. 22 Na' to noolə cananea zoe' gana' mbani yellka' wbigue' kwite'na' na' wnie' zilljə, chi'ene':

—Xan', Xiin dia che dii Daví, biyesh'lall'gachi nad', la' bi' nool cha'na' yoob' dii xiwaa na' le chsak'zi'n le'b'.

23 Per Jesúza' bikzə bi golle' noola'. Na'ch ben'ka' nakgake'ne' txen wbig'gake' kwite'na' gollgake'ne':

—Goll nooli yiyaje', la' kon chosyee zidnoe' cho'.

24 Na'ch goll Jesúza':

—Bsel' Chioza' nad' kwenche gaklen' to ben' Israelka'zə, ben'ka' nak ka xil'ka' wnit.

25 Na'ch noola' jabigüee kwit Jesúza' na' bchek' xibe'na' lawe'na' chi'ene':

—jXan', goklengach nad'!

26 Na'ch che' Jesúza'ne':

—Bi nakan wen yikaacho ye! wawa' chao bi'do' chechoka' na' we'chon bekw'ka'.

27 Na'ch noola' chi'ene':

—Lekzilo', Xan', per chak chao xikw'choka' diika' chxop lo yona'.

28 Na'ch goll Jesúza'ne':

—jNoolə, nonlilall'likzo' nad'! Na' gak ka cheenilo'.

Na' katena' lii biyakteyi bi' nool che'na'.

Jesúza' biyone' ben' zan

29 Na' biza' Jesúza' na', na' billine' cho'a nido' che Galileana' na' wyepe' to lo yaa jchi'e. 30 Na' ben' zan bllin lawe'na' nche'gake' no ben' bi chak sa', no ben' lchol', no ben' bi chak ine, no ben' nxinj, no ben' chak bichlə yillwe'. Na' bzoagake' legake' lao Jesúza' na' biyone' legake'. 31 Na' bibani ben'ka' ka gok, la' ben'ka' bi chak ine wnegake', na' ben'ka' nxinj biyakgakile', na' ben'ka' bi chak sa' wza'gake', na' ben' lchol'ka' ble'gakile'. Na'ch yog'lol ben'ka' be'la'ogake' Chios, beena' choe'la'o ben' Israelka'.

Jesúza' bwawe' tapa mil ben'

(Mr. 8:1-10)

32 Na'ch gox Jesúza' ben'ka' nakgake'ne' txen, na' golle' legake':

—Le chiyeshid' ben'ki, la' ba gok shon lla zoalengake' cho' ni, na' aga bi de dii gaogake'. Na' bi cheenid' yisangakee daa bin' gaogake', la' nxoll ikwidgakile' tneza'.

33 Na' che' ben'ka' nakgake'ne' txen:

—Per ¿ga lljxi'cho dii gao yog'lol ben'ki?, la' gani lle'cho kono zoa wit' dii gaocho.

³⁴Na'ch wñabi Jesúza' legake', chi'e:

—¿Zi balchga yetxtil chechoka' de?

Na' che'gake'ne':

—De gall yetxtilka' na' sto chop bel.

³⁵Na'ch goll Jesúza' ben'ka' kwe'gake' lo yona'. ³⁶Na' bexee yetxtilka' gall na' belka' na' bi'e Chioza' yel' choxken, na' bvoxje'n bi'en ben'ka' nakgake'ne' txen kwenche be'gake' che che ben'ka'. ³⁷Na' yoguee wdao axt ka belgakile!. Na' wdena' bitopgake' dii lao'ka' bichoonan, gokten zi gall xet!. ³⁸Na' ben' byoka' wdao nakgake' tapa mil, na' bi blabgake' noolka' ni bi'do'ka' wdao. ³⁹Na' biyoll bisa' Jesúza' legake', biyo'e to loo barkw len ben'ka' nakgake'ne' txen na' biyajgake' gana' mbani yell Magdálana'.

Fariseoka' na' saduceoka' wñabgakile' Jesúza' gone' to yel' wak

(Mr. 8:11-13; Lc. 12:54-56)

16 ¹Fariseoka' len saduceoka' jawiagake' Jesúza' na' wñabgakile'ne' gone' to yel' wak dii ile'gakile' kwenche wli'n shi Chiozan' bseleene!. ²Na' goll Jesúza' legake':

—Shlle'na' chwiale xan yabana' na' nale: “Le yillaa wxē, la' le nlatjcha.” ³Na' shi chibe'cha shzila' na' nale: “Wak yeja' la' ba bibe'cha.” Le' chakbe'ile shi gak zey' wa gak yej daa chwiale ka nak xan yabana', per aga chakbe'ile bin zeji diika' chon Chioza' llaki zoacho naa. ⁴Le' nakle ben' mal na' ben' bi chzenag che Chioza', chñable ile'ile' to yel' wak kwenche wli'n shi Chioza' bselee nad', per bi wliid' le' daa chñable. Lete ile'ile sto yel' wak ka daa ben Chioza' che dii Jonáza'.

Na' wde goll Jesúza' legake' ka', na' bizee kwite'ka' ziyaje'.

Dill' wxiye' che fariseoka' zaklebin levadúrana'

(Mr. 8:14-21)

⁵Na' ka bllingake' shlaa nisdona', ben'ka' nakgake'ne' txen gol-lall'gake' wa'gake' yetxtila'. ⁶Na' goll Jesúza' legake':

—Wsak'gale bi shajle'le dill' wxiye' che fariseoka' na' saduceoka', daa zaklebi levadúrana'.

⁷Na' che' ljwellgake':

—Daa gol_l-lall'cho wa'cho yetxtilan' ne' cho' ka'.

⁸Na' gokbe'i Jesúza' daa che' l_jwellgake' na' golle' legake':

—¿Biche nazle bibi yetxtila' bia'le? ¿Biche bi n_xenilall'le nad' kwas_lol? ⁹¿Abikzan' shajniile ka nak diika' chon'? ¿Abi chjadinile kana' wdao gayaa mil be_n' kon gay'zə yetxtilka' na' ba_l xet' dii bixjka' bitople? ¹⁰Na' ¿shera kana' wdao tapa mil be_n' kon gallzə yetxtilka'? ¿Abi chjadinile ba_l xet' dii bixjka' bitople? ¹¹¿Biche che yetxtila'lə wyajnzile ka wnia' wsak'gale che levadura che fariseoka' len saduceoka'?

¹²Na' kana'ch wyajni'gakile' nan aga che levadura che yetxtilan' chi'e legake' wsak'gake' san diika' chli' chsedi fariseoka' len saduceoka'lan.

Pédrona' chi'e Jesúza'n nake' Crístona'

(Mr. 8:27-30; Lc. 9:18-21)

¹³Na' ka bllin Jesúza' len be_n'ka' nakgake'ne' txen gana' mbani yell Cesarea che Filípona', na'ch chi'e legake':

—¿Non na be_n' yell-liona' nak', nad', Be_n' Bsel' Chioza' Yell-lioni?

¹⁴Na' che'gake'ne':

—Ba_le' nagake' nako' dii Juanna', beena' bchoa be_n' nisa', na' zi ba_le' nagake' nako' Elíaza', na' zi ba_le' nagake' nako' dii Jeremíaza', na' ba_le' nagake' nako' sto be_n' chyixjee daa che' Chioza'ne'.

¹⁵Na'ch chi'e legake':

—¿Shera le'? ¿Nora nale nak'?

¹⁶Na' Simón Pédrona' chi'ene':

—Lin' Crístona', Xiin Chios yaa Chios banna'.

¹⁷Na' Jesúza' chi'ene':

—Chakomba li' Simón, xiin Jonás, la' aga nochlan bzajnii li' daa ba wno'. Xa'na' zoa yabanan' ba bzajniile'n li'. ¹⁸Na' nad' nia' li', lin' lio' Pedro, daa zeji yaj, na' gako' ka to yaj wal na' lin' wchin' kwenche gono' ka shanch be_n'ka' gon_lilall'gake' nad', na' ni ye_l' wita' bi yizoin wliayi'n be_n'ka' ba wlej' kwenche nakgake' lall' na'. ¹⁹Na' gon_l' li' ye_l' w_nabia' daa zaklebi to xiinya dii chsaljan yabana' gana' ch_nabia' Chioza'. Na' diika' ino' bi chiya_l' gon be_n' yell-lioni, lekzka' ina Chioza' zoa yabana', na' diika' ino' wak gongake', lekzka' ina Chioza' zoa yabana'.

20 Na' goll Jesúza' ben'ka' nakgake'ne' txen ni to kono ye'gake' len' Crístona', beena' bsel' Chioza' inabi'e.

Jesúza' bi'e dill' witgake'ne'

(Mr. 8:31–9:1; Lc. 9:22-27)

21 Na' lo llana' wzolo Jesúza' bzajniile' ben'ka' nakgake'ne' txen daa llia bia' gak che'. Golle' legake' chonan byen yiyaje' Jerusalénna' kwenche gake' lo na' ben' golka' chnabia' na' lo na' bxozka' chnabia' na' lo na' ben'ka' chli' chsedi leya', na' le wsak'zi'gake'ne', na' chonan byen witgake'ne' na' ka gak shon lla yibane' ladj ben' wetka'. 22 Na'ch Pédróna' wleje' Jesúza' ladj ben'ka' chi'ene':

—Xan', ¡bat gak cho' ka ba wno'!

23 Na' biyechj Jesúza' chi'e Pédróna':

—Kwas ka'lə, Satanás. Cheenzilo' bi gon' daa llia bia' gon' daa bi yoo yichjo' daa cheeni Chioza', san daa nak che yell-liozan yoo yichjo'.

24 Na' che' Jesúza' ben'ka' nakgake'ne' txen:

—Shi no cheeni gon nad' txen, chiya' wsanlall' kwine', na' izani yel' mban che'na' yen ile'ile' bittez ni cha', na' gone' ka chazlallaa. 25 La' beena' bi chzani yel' mban che'na', beenan' kwiayi', san beena' chzani yel' mban che'na' yen ile'ile' bittez ni cha', beenan' gat' to yel' mban che' zejli kani. 26 ¿Bera zjanayin gap ben' yog'te dii de yell-lioni, shi le' kwiayee? Aga bi de wi'e lo laz yel' mban che'na' kwenche bi kwiayee. 27 La' nad', Ben' Bsel' Chioza' Yell-lioni, yiyed' len anjl cha'ka' zinsa' balaan xen che Xa' Chioza'. Kana'chan chixj' to to ben' kon ka dii bene'. 28 Dii li nia' le', bal-le lle'le ni, ni mbanle ile'ile yel' wnabia' cha'na', nad', Ben' Bsel' Chioza' Yell-lioni.

Biyak Jesúza' nlla'lə

(Mr. 9:2-13; Lc. 9:28-36)

17 1 Ka wde xop lla, bche' Jesúza' Pédróna', na' Jacóbona' len ben' bishee Juanna', na' to lezgake' wyajlene' to lo yaa xen. 2 Na' ka lle'gake' lo yaana', gok Jesúza' nlla'lə lawe'ka'. Wyep wyeeni' cho'alawe'na' kakzə wbillá', na' xe'na' nakwe' gokan xtil llyish axt chey cheeni'n. 3 Na' ben'ka' lle'lengake'ne'

ble'gakile' dii Moiséza' na' Elíaza' chshaljlengake' Jesúza'. ⁴Na'ch Pédróna' golle' Jesúza':

—Xan', le mbalaz zoacho ni. Shi cheenilo', gon' shon ransh, ton cho', ston che Moiséza' na' ston che Elíaza'.

⁵Na' ka golle' ka', betj to bej dii chey cheeni' na' bkwashaan legake', na' loo beja' bengakile' che' Chioza':

—Beenin Xiinaa, beena' chakid', na' chazlall'chga' ka chone'. Li wzenag che'.

⁶Na' ben'ka' nak Jesúza' txen, ka bengakile' wne Chioza', le bllebchgagake' na' to bdoszgake' lo yona'. ⁷Na' wbig' Jesúza' kwite'ka' bexee legake', chi'e:

—Li yiyas. Bi illeble.

⁸Na' ka bilis yichje'ka', koch no ben'ka' ble'gakile', stochga Jesúza'.

⁹Na' ka biza'gake' lo yaana' goll Jesúza' legake':

—Ni to kono ye'le ka nak dga ba ble'ile ax̄t kat'ch nad', Ben' Bsel' Chioza' Yell-lioni, ba biban' ladj ben' wetka'.

¹⁰Na'ch ben'ka' nak Jesúza' txen che'gake'ne':

—¿Berache naz ben'ka' chli' chsedí leya' zigaate Elíazan' yiyed?

¹¹Na' goll Jesúza' legake':

—Dii li ka nakannan', zigaate Elíazan' yiyede' yigwee x̄nezi yog'lolte. ¹²Per nad' nia' le', ba biyed Elíaza', na' bi gokbe'gakile' shi len'. Na' bengakile'ne' kon ka wnazan chegake'. Na' ka'kzan gongakile' nad', Ben' Bsel' Chioza' Yell-lioni.

¹³Na' gokbe'gakile' nan che Juanna', beena' bchoa ben' nisan' cho'e dill'.

Jesúza' biyone' to bi' chaz shon

(Mr. 9:14-29; Lc. 9:37-43)

¹⁴Na' ka billingake' gana' lle' lla' ben', na'ch bchej to ben' jabigúee kwit Jesúza' na' b̄hek' xibe'na' lawe'na', chi'ene':

¹⁵—Maestro, biyesh'gachi bi' cha'ni. Chazb' shon na' le chzak'zi'b'. Zan shii ba bza'la'n le'b' lo yi'na' na' lekzka' loo nisa'. ¹⁶Na' ba jwa'b' lao ben'ka' nakgake' li' txen na' bi gok yiyongake'b'.

¹⁷Na' goll Jesúza':

—¿Zi'tegalə chelena', le' ben' mal na' ben' bi chajle! ¿Zi

ka'k'tek chiyal' soalen' le'? Na' ¿zi ka'k'tek chiyal' soid' le'? Li da diwa' bi' xkwidaa ni.

18 Na'ch bsheshlen Jesúza' dii xiwaa yoob' na' bichejan. Na' katena' biyakib'.

19 Na' ka biyoll gok ka', ben'ka' nak Jesúza' txen bshajlengake'ne' to lezgake', gollgake':

—¿Biche bi gok yibejnto' dii xiwaa yoo bi' xkwidaa?

20 Na' goll Jesúza' legake':

—Bi gok yibejlen, la' bi chajle'le Chioza' gone' ka yichejan. Dii li nia' le', shel'ka' yel' chajle' chelena' nakan la'ch' ka sa mostásana' daa nak diido'zə, wakte ye'le yaani: “Bkwás ni na' jsoa gan yoblə”, na' wkwasan ka'lə. Aga ga de to dii bi gak gonle shel'ka' chajle'le che Chioza'. 21 Kwenche gak yibejle dii xiwaa ka daa bibej' bi' xkwidaa, chiyal' soale wbas' na' soachechle we'lwil-le Chioza'.

Sto shii wdixjee Jesúza' witgake'ne'

(Mr. 9:30-32; Lc. 9:43-45)

22 Na' shlak chdalen Jesúza' ben'ka' nakgake'ne' txen gana' mbani Galileana', golle' legake':

—Nad', Ben' Bsel' Chioza' Yell-lioni, gak' lo na' ben' malka'.

23 Na' witgake' nad', na' ka gak shon lla yiban' ladj ben' wetka'.

Na' ka golle' legake' ka', le gokyesh'gakile'.

Jesúza' wdixje' daa chiyal' gaxj che yoodo'na'

24 Na' ka billin Jesúza' len ben'ka' nakgake'ne' txen Capernaúma', ben' Israelka' ben'ka' chchxixj che yoodo'na' jawiagake' Pédrona', na' wnabgakile'ne':

—¿Achyixj maestro chelena' daa chidol'cho we'cho che yoodo'na'?

25 Na' goll Pédrona' legake':

—Awe, chyixje'n.

Na' ka biyoo Pédrona' loo yoona' gana' zoagake', Jesúza' bkwialoe' dillaa chi'e:

—¿Nak ka chakilo', Simón? Ben'ka' chnabia' yell-lioni, ¿aben' wllal che'kan' chchxixjgake'?, ¿awa ben' zit'kan'?

26 Na' billii Pédrona' xtillena':

—Ben' zit'kan' chchixjgake'.

Na' goll Jesúza'ne':

—Zejin ben' wllall che'ka' bi chonan byen chixjgake'.
 27Per kwenche bi wshaachogake', wyaj cho'a niso'dna' na' wza_loo daa chzenilo' be_la'. Na' be_l necha' seno' wxoo cho'aba' na' loo cho'aba' yillelilo' to mech. Waktekzin ljtixjo' che choptecho.

Ben'ka' nak Jesúza' txen gokdilgake'
nogaken' nak ben' zak'chi
(Mr. 9:33-37; Lc. 9:46-48)

18 ¹Na' do kana'kzə, ben'ka' nak Jesúza' txen jabig'gake' kwite'na' che'gake'ne':

—¿Noran nak ben' zak'chi ladj ben'ka' chnabia' Chioza'?

²Na' wne Jesúza' to bi'do' na' bzie'b' ladjeka'. ³Na'ch chile legake':

—Dii li nia' le', beena' bi yiyak yichjlall'do'ena' ka che bi'do'ni kwenche inabia' Chioza' le', bi lene' ben'ka' chnabia' Chioza'.
⁴Daan beena' wlexj yichje' wzenague' che Chioza' ka chlexj yichj bi'do'ni chzenagb' che xaxna'baa, beenan' zak'chi ladj ben'ka' chnabia' Chioza'.
⁵Na' beena' wlebe' to bi'do' ka bi'do'ni daa chonlilallee nad', nad'kzan chlebe'.

Xoll ibixcho lao dii mala'
(Mr. 9:42-48; Lc. 17:1-2)

⁶Nottez beena' wchixe' to ben' zi' chzolo chonlilallee nad' gone' dii mala', naklan wen wwal'gake' yene'na' to yaj che molin na' ljlekgake'ne' yel loo niso'dna' aga ka daa wchixe' ben' lao dii mala'.
⁷Nyesh'laz che ben' yell-lioki!, la' biga iyallji daa gonan ka wxinj wlangake'. Per nyesh'lazch gak che beena' gon ka wxinj wlen ben' yoblə!'

⁸Na' shi noona' wa ni'ona' gonan ka ibixo' lao dii mala', naklan wen wchogo'n na' choono'n, la' wenchlan bi de noona' tlaa wa ni'ona' tlaa yillino' kwit Chioza' aga ka daa yiyaj doxentio' lo yi' gabila' daa biga yiyol.
⁹Na' shi daa ile'ilo' kon jalawo'na' gonan ka ibixo' lao dii mala', naklan wen wlechjo'n na' choono'n, la'

wenchlan yillinleno' tlaaz jalawo'na' kwit Chioza' aga ka daa yiyaj doxentio' lo yi' gabila'.

Jempl che xilaa wnit

(Lc. 15:3-7)

10'Bi gonile nakzi ni to ben'ki zi' wzolo chonlilall' nad'. La' nia' le', anjl che'ka' toshiizi zoagake' lao Xa'na', beena' zoa yabana'. 11La' nad', Ben' Bsel' Chioza' Yell-lioni, bid' kwenche yisla' ben'ka' yoo nez daa wlliyi'n legake'.

12'¿Nak chakile? Shi to ben' lle' to guiyoa xil' che' na' nit tob, ¿abi wkwaane' baka' taplalj twalj na' shaje' lljadilje' bana' wnit? 13Na' shi yillelile'b, lech yibaile' cheb aga ka che baka' taplalj twalj baka' lle' tozga. 14Ka'kzan Xacho Chioza' zoa yabana' cheenile' ni to ben'ki zi' wzolo chonlilall' nad' bi kwiyai' shel'ka'.



Shi to ben' lle' to guiyoa xil' che' na' nit tob ¿Abi wkwaane' baka' taplalj twalj na' shaje' lljadilje' bana' wnit? Mt. 18:12

Chiya! si'xencho che ben'ka' nakcho txen chonlilall'cho Chioza'

(Lc. 17:3)

15'Shi to ben' nakle txen nonlilall'le Chioza' gone' to dii mal cho', je'lene' dill' to li' to le' daa bene' cho'. Shi ba bzenague' cho',

ba beno' gan bizoaleno'ne' wen. ¹⁶Per shi bi wzenague' bin yoone', na'ch w̄chi'o sto chop ben' kwenche gakgake' taschiw che daa yoone'. ¹⁷Na' shi ni ka' bi wzenague' chele, wak ye'le yog' ben'ka' nakle txen nonlilall'le Chioza' ka nak daa ba bene' kwenche we'lengake'ne' dill'. Na' shi ni che ben'ka' bi wzenague', na'chan gonilene' ka to ben' bi nonlilall' Chioza' wa ka to ben' w̄chixj.

¹⁸Na' dii li nia' le', diika' inale bi gon ben' yell-lioni, lekzka' ina Chioza' zoa yabana', na' diika' inale wak gon ben' yell-lioni, lekzka' ina Chioza' zoa yabana'.

¹⁹Na' lekzka' nia' le', shi chople idili xtill'lena' yell-lioni kat' bi inable lao Xa' Chioza', beena' zoa yabana', na' gone' daa inabile'ne'. ²⁰La' gana' chdop chope' wa shone' choe'la'ogake' nad', na'kz zoa' ladje'ka'.

²¹Na' wbig' Pédrona' kwit Jesúza', chi'ene':

—Xan', ¿bal shii chiya' yizi'xen' che bish' ljwellaa shi bi dii mal chone' cha'? ¿Azeelo gall shii?

²²Na' che' Jesúza'ne':

—Aga nia' li' zeelo gall shii yizi'xeno' che bish' ljwello'na', san nia' li' chiya' yizi'xeno' guiyon shin'chopə shii.^d

Jempl che beena' bi bizi'xen che bish' ljwelle'na'

²³Ye'l' w̄nabia' che Chioza' zaklebin to ben' w̄nabia' beena' bizi' kwent che mecha' daa chal' wen llin che'ka'. ²⁴Na' ka wzoloe' chizi'e kwent che to toe', jwa'gake' to wen llin che'na' beena' chal' dii xen inleeb. ²⁵Per aga bi mech nap beena' kwenche yiyixje' daa chbaguee, na' xane'na' bene' mandad wit' wdegake'ne' do xiin do xoolo' na' yog'lo' dii de che' kwenche yiyaxj xyana' daa llie'. ²⁶Na' beena' chbag' mecha' b̄chek' xibe'na' lao xane'na', chonyeshee, chi'e: “Xan', wdapgach ye'l' chxenlall' cha', wiyixjkz' doxen daa chbagaa cho'.” ²⁷Na' xane'na' biyeshile'ne', na' bene' ka'z doxen daa chal'ee che', na' bisane'ne'. ²⁸Per le', ka bicheje' lill xane'na', billague' sto wen llin ben' chal' lat'do' xmeche', na' lii bniztie' yene'na' chi'ene': “¿Biyon xmechaa daa chaloo'?” ²⁹Na' b̄chek' xib beena' lawe'na' na' chonyeshee, chi'ene': “Wdapgach ye'l' chxenlall' cha', wiyixjkz' doxen daa chbagaa cho'.” ³⁰Na'

^b 18:22 *Guiyon shin'chopə shii*: bal' yishka' nyoj de dill' griegona' nan gall shii de guiyonshin'. Per chopten zejín toshiizi chiya' yizi'xencho che ben'.

bi goonile', san lii wyajtie' ji'ene' part kwenche wloogake'ne' lillyana' axt ki yiyixjche' doxen daa chalee che'. ³¹Na' ka ble'i wen llinka' sto ka bene', na' gokyesh'gakile' na' jayellgake' xane'ka' doxen ka bene'. ³²Na' wizax xane'na' le', chi'ene': "Ben' mal inleeb nako'. Nad' ben' ka'z doxen daa chaloo cha' daa benyeshoo lawa'. ³³Ka'kzan nan chiyal' yiyeshilo' bish' ljwello'na' chal' cho', ka biyeshid' li'." ³⁴Na' daa le' bliaachga xane'na', bene'ne' lo na' ben'ka' wdixjgake'ne' lillyana' na' wit chingake'ne' axt ki yiyixjche' doxen daa chalee.

³⁵Na'ch goll Jesúza' legake':

—Ka'kzan goni Xa'na' beena' zoa yabana' le' shi bi si'xen che ljwell-le do yichj do lall'le.

Bi chiyal' yilaa ljwell ben'ka' nkaa cheyin

(Mr. 10:1-12; Lc. 16:18)

19 ¹Na' ka biyoll be' Jesúza' dill'ki, bizee Galileana' na' biyaje' gana' mbani Judeana' daa llia shlaa yao Jordánna'. ²Na' ben' zan zjanogake'ne', na' na' biyone' ben'ka' bi shao'.

³Na' wbig' bal' fariseoka' lao Jesúza' daa goklall'gake' wi'e dill' dii wchixa'n le', na' che'gake'ne':

—¿Ade lsens yilaa xool ben' ni che bizə diido' chone' dii bi chiyoolallee?

⁴Na'ch che' Jesúza' legake':

—¿Abin' wlable gana' nan ka wxe wzil yell-lioni Chioza' bene' benecha', ben' byo na' noolə? ⁵Na' wne': "Daan, wlaa ben' byona' xaxneena' kat' ikaa che', na' soalene' xoolena' gakgake' toz." ⁶Na' bich nakgake' chop, san ba nakgake' toz. Na' daan bi chiyal' yilaa xool ben', la' Chiozan' ba btilē' legake'.

⁷Na' gollgake'ne':

—Na' ¿biçe ben dii Moiséza' mandad kat' to ben' yilaa xoolena' chiyal' wlise' to yish dii we'n dill' bich nake' xoolena' na' wak yichoonē'ne'?

⁸Na' goll Jesúza' legake':

—Ye! widenag chelenan' be' dii Moiséza' latj yilaa xool-lena'. Per ka ben Chioza' ben' nechka', bi gokan ka'. ⁹Nad' nia' le', shi nool chelena' bi chdalene' ben' yoblə, bi chiyal' yilaalene' na'

yikaale nool yoblə, la' shi ka' gonle, na' chonle ka beena' zoalente xoolə'na' na' chdalene' noolə yoblə.

10 Na' ben'ka' nakgake'ne' txen gollgake'ne':

—Shi ka' nak che beena' chshagna', naklan wen kono wshagna'.

11 Na' goll Jesúza' legake':

—Aga yog' ben' chajni'gakile' dga, lete ben'ka' chon Chioza' ka shajni'gakile'n. 12 La' de dii chllonan wshagna' ben'. Ba' ben' bi chshagna'gake' daa bi nak kwerp che'ka' wen ka chaljtegake', na' zi ba'le' bi chshagna'gake' daa bxinj benecha' kwerp che'ka'. Na' zi ba'le' bi chshagna'gake' daa cheenchgakile' gongake' xshin Chioza'. Beena' wlebe' dga, na' gonin che'.

Jwa'gake' bi'do'ka' lao Jesúza'

(Mr. 10:13-16; Lc. 18:15-17)

13 Na' wyaj ben' jwa' bi'do' che'ka' lao Jesúza' kwenche wxoa neena' yichjb'ka' na' we'lwille' Chioza' ni chegakb'. Per ben'ka' nakgake'ne' txen bsheshlengake' ben'ka' zjwa' bi'do'ka'. 14 Na' goll Jesúza' legake':

—Li we' latj yid bi'do'ki lawa'ni, bi wllonle, la' Chioza' chnabi'e loo yichjlall'do' ben'ka' nak ka legakb'.

15 Na' ka biyoll bxoax na' Jesúza' yichj bi'do'ka', na'ch bizee ziyaje' gan yoblə.

To bi' wew', bi' wni'a, bshaljlem' Jesúza'

(Mr. 10:17-31; Lc. 18:18-30)

16 Na' bllin to bi' wew' lao Jesúza' che'b' le':

—Maestro, ¿bi dii wennan' chiya' gon' kwenche gat' to yel' mban cha' zejli kani?

17 Na'ch goll Jesúza' leb':

—¿Biche chnabzilo' nad' che daa nak wen? Toz Chioza' nake' ben' wen. Na' shi cheenilo' gat' to yel' mban cho' zejli kani, chiya' gono' diika' bllia Chioza' bia' goncho.

18 Na' goll bi' wewaane':

—¿Bera diika' chiya' gon', lla?

Na' che' Jesúza':

—Bi wito' ben', bi soaleno' nool bi nak nool cho', bi kwano' bi de che ben', bi chiljalloo bizə gon ino' che ben'. ¹⁹Wdap balaan xaxnoona' na' goki bish' ljwello'na' ka chaki kwino'.

²⁰Na' che' bi' wewaane':

—Yog' diika' chon' kana' naktia' bi'do'. ¿Berachan ni chyallj gon'?

²¹Na' goll Jesúza' leb':

—Shi lekzilo' cheenilo' gako' dowalj ben' li ben' shao', biyaj jayet' yog' dii de cho' na' xmechinna' wyoon ben' yesh'ka', na' yido' gono' nad' txen. Na' kat' yillino' yabana' na' gon Chioza' li' yel' shawaa.

²²Na' ka beni bi' wewaa dga, nyesh' inleeb gokib' na' biza'b', la' bi' wni'a nleban nakb'.

²³Na' goll Jesúza' ben'ka' nakgake'ne' txen:

—Dii li nia' le', lallj inleeb chonan che ben' wni'ana' yilline' yabana' gana' chnabia' Chioza'. ²⁴Sto shii nia' le', lobe'ch te to kamey to xan yesh' aga ka to ben' wni'a yilline' yabana' gana' chnabia' Chioza'.

²⁵Na' bibangakile' ka wne', na' che' ljwellgake':

—¿Notg gak yillin lao Chioza', shka'?

²⁶Na' bwia Jesúza' legake', na' golle':

—Ni to ben' yell-liona' bi' gak gone' dga, san Chioza' yog'lolte chak gone'.

²⁷Na' che' Pédrona'ne':

—Neto' ba wlej yichjnto' yog' dii de chento' kwenche naknto' li' txen. ¿Bin gonnto' gan?

²⁸Na' che' Jesúza' legake':

—Dii li nia' le', kat' illin lla yikob yog'lol dii de, nad', Ben' Bsel' Chioza' Yell-lioni, kwi'a inabi'a gana' sho'a balaan xen wal, na' le', shllintele, nakle nad' txen kwe'le kwitaa kwenche inabia'lenle nad'. Na' yizi'le kwent shllin kwente yell che ben' Israelka'. ²⁹Na' nottez beena' ba wlej yichje' lille'na', ben' bisheeka', ben' zane'ka', xaxneeka', wa xiin xoole', wa yell-lio che' ni cha', Chioza'kzə wi'ene' dii zak' dii xen inleebch aga ka daa wlej yichje', na' lekzka' wi'ene' to yel' mban zejli kaní. ³⁰Per ben' zan nakgake' ben' zakii, wllin lla bich bi sak'gake', na' ben' zan bi nakgake' ben' zakii, wllin lla gakgake' ben' zakii.

Jempl che wen llinka'

20 ¹Na' wna Jesúza':
 —Yel' wñabia' che Chioza' chzaklebin daa gok che to xan yell-lío beena' naz yag uvana'. Na' shzildo' wzee zeje' zjtilje' wen llinka' kwenche ljengake' llinna' gana' naze' yag uvaka'. ²Na' bgaangake' dill' chixje' legake' che lla, na'ch bselee legake' gana' ljengake' llinna'. ³Na' ba gok shon gor chon ben' nechka' llinna' ka wyaje' dii yoblə gana' chak yaana', na' ble'ile' lle' ben' bibi llin de gongake'. ⁴Na'ch chi'e legake': "Li shaj li lljen llinna' gana' naz' yag uvana' na' chixj' le' daa chido'le." Na' wza'gake' zejgake' llinna'. ⁵Na' do ka gobill wizaje' dii yoblə, na' lekzka' chida shonə, bizllelele' ben' yoblə ljengake' llin che'na'. ⁶Na' do ka chida gay', wizaje' dii yoblə na' bizle'ile' ben' lle'zgake'. Na'ch chi'e legake': "¿Biçhe bi benle llinna' ñaanlla?" ⁷Na' goll ben'ka'ne': "La' ni to kono bche' neto' llinna'." Na' golle' legake': "Li shaj, lla, li lljen llinna' gana' naz' yag uvana'." ⁸Na' ka wzeles yela' na' che' xan yag uvana' beena' ngoo lo nee llinna': "Biyax wen llinka' na' wdixjgake'. Zigaate ben'ka' zi' wyoo llinna' chixjo', na' yiyoll-lin ben'ka' wzolo nech." ⁹Na' bene' kon ka goll xane'na', na' wdixje' zigaate ben'ka' wyoo llinna' do ka chida gay'. Na' wdixje' to toe' che llakzə. ¹⁰Na' ka gol' chixje' ben'ka' wyoogake' llinna' shzildo', gokgakile' wxoache' laxje'ka'. Per bich bi bxoe' san che llachokzə wdixje' legake'. ¹¹Na' ka ba nox'gake' laxje'ka', wzologake' biz chon chnagake' che xan llinna', ¹²na' gollgake'ne': "Do lla wzento' lo bana' bennto' xshino'na' na' toz ka wdixjo' neto' len ben'ka' zi' wyoo, na' zi' tgorchga bengake' llinna'." ¹³Na' che' xan llinna' toe': "Bish'dawaa, aga bi laxjo' chzeshaa. ¿Aaga bgaancho dill' che llan chixj' li'? ¹⁴Wkaa laxjo'na', na' biyaj. Nad' cheenid' chixj' ben'ka' wyoo llinna' ba wlle'ch ka to daa ba wkoo. ¹⁵Jwayishaz nad' bi gonid' xmechaa. ¿Anti chakziilo' daa chonid' ben' wen?"

¹⁶Na' ka wde bzoa Jesúza' jempli, na' chi'e ben'ka':

—Ka'kzan ben' zan nakgake' ben' zakii, wllin lla bich bi sak'gake', na' ben' zan bi nakgake' ben' zakii, wllin lla gakgake' ben' zakii.

Sto shii wdixjee Jesúza' witgake'ne'

(Mr. 10:32-34; Lc. 18:31-34)

17Ka ziyaj Jesúza' Jerusalénna' wnie' to ben'ka' shllinzə, chi'e:

18—Naa ba ziyajcho Jerusalénna', gana' gongake' nad', Ben' Bsel' Chioza' yell-lioni, lo na' bꝁozka' chꝁabia' na' lo na' ben'ka' chli' chsedi leya', na' wꝁhoglogake' witgake' nad'. 19Na' gongake' nad' lo na' ben'ka' bi nak ben' Israel kwenꝁhe wtijtꝁakile' nad' na' wit ꝁhingake' nad', na'tech wda'gake' nad' lee yag cruza', per ka gak shon lla yiban' ladj ben' wetka'.

Daa wꝁab xꝁa' Jacóbona' len Juanna' lao Jesúza'

(Mr. 10:35-45)

20Na' Jacóbona' len Juanna', ben'ka' nak xiin Zebedewa', wbig'lengake' xꝁeeke' kwit Jesúza', na' xꝁeeke' bꝁhek' xibe'na' lawe'na' wꝁabile'ne' to goklen. 21Na' goll Jesúza'ne':

—¿Bera goklenan cheenilo' gon' ꝁho'?

Na' golle'ne':

—Cheenid' gongacho' goklen kweko' bi' ꝁha'ki shꝁaa wej kwito'na' kat'ka' illin lla inabi'o.

22Na' goll Jesúza'ne':

—Ni bi nezile bin chꝁable. ¿Awizoile wtil-le yel' zak'zi'na' ka daa wtil' na' gak ꝁele ka daa gak ꝁha'?

Na' gollgake'ne':

—Wizokzinto'n.

23Na' goll Jesúza' legake':

—Lekzile wtil-le ka daa wtil', na' gak ꝁele ka daa gak ꝁha', per daa nale kwe'le shꝁaa wej kwitaa bi nak lo na' gon' ka nale, san Xa'nan' ba mbeje' ben'ka' wi'en.

24Na' ben'ka' zi shi, bllaagake' Juanna' len Jacóbona' daa wꝁabgake' kwe'gake' kwit Jesúza'. 25Na' bitop Jesúza' legake', na' chi'e:

—Nezkzile zoa ben' wꝁabia' na' ben' zakii ꝁhe to to yell na' chongakile' kon daa nazan ꝁhegake' ben' yell ꝁhe'ka'. 26Per aga kan' chiyal' gonle. Shi nole cheenile gakle ben' mbejlawin chiyal' gakle ka to ben' chon xshin ben'. 27Na' shi nole cheenile gakle ben' zakii, chiyal' gakle ka ben' ndoo lla yel chone' xshin ben'.

28Ka nak nad', Ben' Bsel' Chioza' Yell-lioni, aga bid' kwenche gaklen ben' nad', san bid' kwenche gaklen' ben' na' wi'a yel' mban cha'ni kwenche yisla' ben' zan lao saaxya che'ka'.

Jesúza' biyone' chop ben' lchol

(Mr. 10:46-52; Lc. 18:35-43)

29Na' ka biza' Jesúza' yell Jericóna' len ben'ka' nakgake'ne' txen, ben' zan inleeb janogake'ne'. 30Na' cho'a neza' chi' chop ben' lchol, na' ka bengakile' bide Jesúza' kwite'ka' na'ch besyaagake', che'gake':

—jXan', xiin dia che dii Daví, biyesh'lall'gachi neto'!

31Na' ben'ka' zejlen Jesúza' bsheshlengake' legake' kwenche nan kwe'gake' lliz, per ziziklā besyaachgake', che'gake':

—jXan', xiin dia che dii Daví, biyesh'lall'gachi neto'!

32Na'ch wlez Jesúza' na' wnie' ben' lcholka', na' chi'e legake':

—¿Beran cheenile gon' chele?

33Na'ch che' ben' lcholka'ne':

—Xan', bengach ka ile'into'.

34Na' biyesh'lallii Jesúza' legake' na' bexee jalawe'ka'. Na' katena' gok ble'gakile' na' janogake' Jesúza'.

Bllin Jesúza' Jerusalénna'

(Mr. 11:1-11; Lc. 19:28-40; Jn. 12:12-19)

21 1Na' ka ba zoa yillingake' Jerusalénna', bllingake' cho'a yell Betfagéna' daa lliia kwit Yaa Olívoza'. Na' wlej Jesúza' chop ben'ka' nakgake'ne' txen na' bselee legake' yella'. 2Na' chi'e legake':

—Li shaj yella' daa lliia shlaana'. Na' ile'ile to burr ba noolā da'b yag na' nche' to xiindo'b. Na' wsell-leb wche'legakb nilā. 3Na' shi no bi ina le', na' ye'lene': “Xannto'nan' chyalljile' legakb, na' lii yidsantento'gakb.”

4Na' daa gok ka', billinin ka bzej dii beena' wdixjee daa goll Chioza'ne' daa wne':

5Li ye' ben'ka' lle' yell Siónna':

“Li wwia, ba za' ben' wnabia' chelena',
nake' ben' gaxjlall' na' llie' to burrdo';
xiin to ba choa' yoa'.”

6Na' wza' ben'ka' nakgake'ne' txen zejgake' yelldo'na' gana' bse| Jesúza' legake' na' bengake' kon ka golle' legake'. 7Na' jxi'gake' burra' len xiinba' na' bche'gake' legakb kwit Jesúza'. Na'ch bxoagake' xe'ka' koll'bka', na'ch wllia Jesúza'b zeje' Jerusalénna'. 8Na' ben' zan wdixjgake' xe'ka' tneza', na' zi bale' bchoggake' no zin na' wdixjgake'n tneza' gana' zeje'. 9Na' ben'ka' llialo lao Jesúza', na' ka'kzə ben'ka' nogake'ne', wzologake' chosyaagake', nagake':

—¡We'la'ocho beeni nak xiin dia che dii Davina! ¡Gonleeyshga Xancho Chioza' beeni ba bselee! ¡Li da we'la'ocho Chioza' zoa yabana'!

10Na' ka wyoo Jesúza' yell Jerusalénna', na' yog' ben'ka' lle' na' bllesh bcheengake', nagake':

—¿Noraz beeni bla' ni, lla?

11Na' ben'ka' che'gake':

—Beenin Jesúza' ben' Nazareta' yell daa mbani Galileana', beena' chyixjee daa che' Chioza'ne'.

Bishesh Jesúza' ben'ka' chit' chde lesh' chyoodo'na'

(Mr. 11:15-19; Lc. 19:45-48; Jn. 2:13-22)

12Na' wyoo Jesúza' lesh' chyoodo'na' na' bisheshe' yog' ben'ka' chit' chde na'. Na'ch bishi'e mes che ben'ka' chsha' mecha' na' bzoles bzolline' gana' chi' ben'ka' chit'gake' palomka'. 13Na' ka wde bene' ka' chi'e legake':

—Cho'a xtill' Chioza' nan: “Lillaa nakan ga choe'lwill ben' nad’”, na' le', ba nonzlen ka to ga chdop chllag wban.

14Na' shlak zoa Jesúza' yoodo'na', bal ben' lchol' na' ben' bi chak sa'gake' wen bllingake' lawe'na', na' biyone' legake'. 15Na' bxozka' chnabia' na' ben'ka' chli' chsedi leya' le bllaagake' ka ble'gakile' ye| wakka' chon Jesúza', na' bengakile' chosyaa bi'do'ka' lesh' chyoodo'na', che'gakb': “¡We'la'ocho beeni nak xiin dia che dii Davina!” 16Na' gollgake' Jesúza':

—¿Achenilo' ka na bi'do'ka'?

Na' chi'e legake':

—Awe, chenzid'. ¿Abin' wlable Cho'a Xtill' Chioza' gana' na: Chchino' cho'a loll' bi' xkwid'do'ka' na' bdo'ka' ni chall' chxop

kwenche chol chnegakb' li' ka chiya' we'la'o be' li'?
 17 Na'ch bicheje' ladj be'ka', na' bizee yell Jerusaléna' ziyaje' yell Betániana' gana' wdie' yel.

Jesúza' bene' ka wbill to yag yixwew
 (Mr. 11:12-14, 20-26)

18 Na' betiyo biza'gake' shzildo' yell Betániana' kwenche biyajgake' yell Jerusaléna' dii yoblə, na' tneza' wzolo chdon Jesúza'. 19 Na' ble'ile' to yag yixwew dii zoa cho'a neza', na' jawie' shi llian. Per zeelo xlaguinna'z llia. Na' golle'n:


—¡Batch kwio' yixwewa'!

Na' katena' lii wbillte yaga'. 20 Na' ka ble'i be'ka' nakgake'ne' txen ka gok, le bibangakile', na' che'gake'ne':

—¿Berache lii wbilltelikazə yag yixwewa'?

21 Na'ch che' Jesúza' legake':

—Dii li nia' le', shi nonlilall'le Chioza' na' bi gakchoplall'le, aga daazan gak gonle, san wakte ye'le yaani: “Bkwas, na' jsoa loo nido'na'”, na' gak ka ye'len. 22 Na' yog' daa inabile Chioza' ka we'llwill-lene' gonkze'n kon shi nonlilall'lene'.



*Yoodo' che be' Israelka' daa wzoa kana' wzoa Jesúza'
 gokan to dii xen inleeb na' wye'chjan dii zan koridor.*

Yel' wñabia' che Jesúza'

(Mr. 11:27-33; Lc. 20:1-8)

23Na' wyaj Jesúza' dii yoblə yoodo'na' kwenche jali' jasedile' ben'ka'. Na' shlak chli' chsedile' legake', b̄xozka' chñabia' na' ben' golka' chñabia' ben' Israelka' bllingake', na' che'gake'ne':

—¿Nora lsens cheyi chono' diiki? ¿No ben' li' yel' wñabia'na'?

24Na' goll Jesúza' legake':

—Lekzka' de to dii cheenid' in̄abid' le'. Na' shi le' in̄ale nad' daa in̄abid' le', na' in̄ia' le' no lsens cheyi chon' yog' diiki. 25Li in̄ashki nad', ¿noran bsel' Juanna' kwenche bidchoe' ben' nisa'? ¿AChioza' anti ben' yell-lioni?

Na' wzologake' chakguedgake' to lezgake', nagake':

—Shi ye'chone' Chioza' bseleene' na'ch in̄e' cho': “¿Biche bi wyajle'le che', lla?” 26Na' shi ye'chone' ben' yell-liona' bselee Juanna', le xoll bi goni ben'ki cho', la' yog'lol̄e' chajle'gake' Chioza' bselee Juanna' kwenche bidtixji'e daa golle'ne'.

27Na'ch che'gake' Jesúza':

—Bi ñezinto' non bsel' dii Juanna'.

Na' goll Jesúza' legake':

—Lekzka' nad', aga wnia' le' nora lsens cheyin chon' diiki.

Jempl che chop xiin ben'

28Na' goll Jesúza' legake':

—¿Bi ka in̄ale cheyi dga wseesaa? To ben' zoa chop xiine', na'ch golle' bi'na' to: “Xiindawaa, wyajgach jen llinna' gana' nazcho yag uvana'.” 29Na' che' xiine'na'ne': “¿Bi sha'!” Per na'tech biyajib' na' wyajkb' jem' llinna'. 30Na' wyaj x̄abaa jelle' bi'na' sto ka golle' bi' bish'baa, na'ch goll bi'na'ne': “Wakkzə x̄a, na' sha'.” Per bi wyajb'. 31Li in̄ashki, ¿nora bi'ka' chop ben ka cheeni x̄ab'ka'?

Na' goll ben'ka'ne':

—Bi'na' golle' ka' dii nech.

Na'ch che' Jesúza' legake':

—Dii li nia' le', ben' w̄ichixjka' na' noolə wdaka', lelgaken' zigaate we'gake' latj in̄abia' Chioza' legake' aga ka le'. 32La' ka bid Juanna' bchoe' ben' nisa', bidzajniile' le' ka chiyal' soa kwezle, per le' aga wyajle'le che', lete ben' w̄ichixjka' na' nool

wdaka'chgan wyajle'gake' che'. Na' le' naalla, la'kzi gokbe'ile ba chajle'gake' che', aga biyaj bileni saaxya cheleka' na' shajle'le che'.

Jempl che wen llinka' nak ben' mal

(Mr. 12:1-12; Lc. 20:9-19)

33'Li wzenag jempli sto. Wzoa to ben' biyaze' yag uva lo yell-lío che'na' na'ch wlo'en leej, na'tech benschawee to ga wsigake' uvaka'. Na' lekzka' bene' to yoo sibə gana' kwia beena' gap wwie'n.

'Na'tech bene'n lo na' to chop ben' na' wzee zeje' zit'. 34Na' ka gol' yishibgake' uvaka', na'ch bselee to chop wen llin che'na' gana' lle' ben'ka' chapgake' yag uvaka' kwenche lljaxi'gake' uvaka' daa chidolee. 35Per ka bllingake' gana' lle' ben'ka' chapgake' yag uvaka', na'ch bex'gake' ben'ka' bllin, toe' bet wdingake'ne', na' stoe' bettekgake'ne' na' beena' sto btakwgake'ne' yaja'. 36Na'ch bsele' xan yag uvaka' zanch wen llin che'ka' aga ka to ben'ka' bselee dii nech, per ben'ka' chap yag uvaka' bengakile' legake' ka bengakile' ben' nechka' bllin.

37'Na'ch xan yag uvaka' bselee kwinkz xiine'na', chakile': "Wapgake' balaan bi' cha'ni na' we'gake'b' daa chidoḷaa." 38Per ben'ka' chap yag uvaka' ka ble'gakile' xiine'na', na'ch che' ljwelle': "Bi'nin xiiñ xan yag uvaki na' leban' yigaanlem' yog' dii nape'. Li da witchob' kwenche yigaanlencho daa gaki cheb'." 39Na'ch bex'gake'b' bibejgake'b' gana' lle' yag uvaka' na' betgake'b'.

40Na' Jesúsza' chi'e ben'ka' lle' na':

—¿Nakra ka chakile gon xan yag uvaka' che ben'ka' chapgake'n ka illine' kwine'?

41Na' che' ben'ka':

—Ba nakten wite' legake' na' bi yiyeshile' legake' daa nakgake' ben' mal. Na' yiyone' yell-lío che'na' lo na' ben' yoblə, ben' yiyoe'gake'ne' daa chidolee kat' yishibgake'n.

42Na' goll Jesúsza' legake':

—¿Abigan' wlable Cho'a Xtill' Chioza' gana' na:

Yaja' daa bi wyoolall' wen yooka',

leyen'lannan' yaja' daa ba nchejcha yooná.

Dgan ben Xancho Chioza'

na' nakan to dii yibanicho?

43Daan nia' le', kon ka gon xan yag uvaka' yiyone' yell-lío che'na' lall' na' ben' yoblə, ben' gongake' ka cheenile', ka'kzan gon Chioza' chele. Kwej yichje' le', na' ben'ka' wzenaggake' che', si'gake' banéz yel' wñabia' che'na'. 44Na' ka nak yaja', nottezə ben' lljchaze' lawinna' kwiayee, na' shi idakwan ben', axt wshoshjan le'.

45Na' ka biyoll bzenag bxožka' chñabia' na' fariseoka' jemplki bzoa Jesúza', na'ch gokbe'gakile' chegake'n chñie'. 46Na'ch goklall'gake' gox'gake'ne', per bi biyaxjgakile', la' bllēbgake' ben'ka' lle' na' daa chajle'gake' Jesúza' nake' to ben' chyixjee daa che' Chioza'ne'.

Jempl che to wishagna'

22 1Na' Jesúza' bseesile' legake' sto jempl, chi'e:
 2—Yel' wñabia' che Chioza' chzaklebin to ben' wñabia', ben' bene' to lni che xiine'na' ka bshagna'b'. 3Na' bselee wen llin che'ka' lljanegake' ben'ka' ba bye', per ben'ka' bye' bi goongakile' shajgake'. 4Na'ch bizselee zi shkwen wen llin che'ka' chi'e legake': “Li lljell ben'ka' ba bya' yid lni che bi' cha'na' ba de daa gaocho. Ba betgake' goon cha'ka' na' nochlə baka' le nak, na' ba de yel' wawa'. Li lljellgake' yidgake' kwenche yeej gaocho.” 5Per ben'ka' ba bye' bi bengake' kwent daa goll wen llinka'. Toe' wyaj jawia' yell-lío che'na' na' stoe' wzeē zeje' delgens che'na'. 6Na' ben'ka' sto be'gake' wen llinka' na' biya dii bengakile' legake' axt ka witgake'. 7Na' le bllaachga ben' wñabia'na', na'ch bselee soldad che'ka' kwenche jetgake' legake' na' bzeygake' yell che'ka'. 8Na'ch chi'e wen llin che'ka' sto: “Ba gok daa yeej gaocho, na' wentelan bi wlen ben'ka' bya'. 9Na' li shaj lyell na' li wche' kon no ben' yillagle tneza' kwenche yidgake' yeej gaogake'.” 10Na'ch wza' wen llinka' zejgake', na' jxi'gake' kon no ben' billaggake', ka ben' wen ka ben' mal. Na' billa'cha lill ben' wñabia'na'.

11'Na' ka wyoo ben' wñabia'na' chwie' ben'ka' ba ndop nllag, na' ladj ben'ka' len to ben' bi nakw xe'na' daa chiyal' gakwe' gana' chak wishagna'na'. 12Na' goll ben' wñabia'na'ne': “Bish'dawaa, ¿nakra gok wyoozo' na' bi nakw xo'na' daa chiyal' gako' kwenche leno' gani chak wishagna'ni?” Na' beena' bikzə bi billet-lallee yeene'. 13Na'ch che' ben' wñabia'na' ben'ka' chde

yel' wawa': "Li w_{ch}ej n_i'a na' beeni na' li yibeje' na' li wza_{lee} gana' shgasj sh_{ch}ol, gana' kwellyeshee na' gaoxaxj ley_e'na' daa le gakshejlallee." 14La' be_n' zan nak be_n'ka' chax ch_nab Chioza', per bal_{ch}gagake' kweje' g_kgake' lall' nee.

**W_nabg_kile' Jesúza' shi chiya_l' chixjgake' daa ch_nab be_n'
w_nabia'na'**

(Mr. 12:13-17; Lc. 20:19-26)

15Na' biza' fariseoka', na' wloogake' x_nezi nakl_ə gongake' kwen_{ch}e we' Jesúza' dill' dii wch_ix_a'n le'. 16Na'ch bse_l'gake' bal be_n'ka' nakgake'ne' txen na' zi bal be_n'ka' nak Heródeza' txen kwen_{ch}e wyajgake' lao Jesúza' na' jellgake'ne':

—Maestro, ne_zinto' nako' be_n' li be_n' shao' na' chli' chsedilo' be_n' che nez li che Chioza' kon ka nakan, na' bi chshoo cho'a xtilloona' lao nottez_ə be_n', la' bi chwio' no nakgake'. 17Daan cheeninto' inagacho' neto' nak ka chakilo': ¿Achiya_l' chixjcho daa ch_nab be_n' w_nabia' Césara', anti bi chiya_l' chixjchon?

18Na' gokbe'i Jesúza' aga do lall'gaken' gollgake'ne' ka', na'ch chi'e legake':

—Le' be_n' wxiye', aga dii leilen nale ka'. 19Li wli'shki nad' to mech daa chyixjile be_n' w_nabia'na'.

Na' be'gake'ne' to mech. 20Na' goll Jesúza' legake':

—¿Nora cho'alawin na' no leyin da' lee mechí?

21Na'ch che'gake'ne':

—Che be_n' w_nabia', Césaran'.

Na' che' Jesúza' legake':

—Na'len, li we' Césara' daa naki che', na' lekzka' li we' Chioza' daa naki che'.

22Na'ch bibangakile' daa goll Jesúza' ka'. Na' biza'gake' kwite'na' ziyajgake'.

Saduceoka' w_nabgake' nak g_k kat' yiban be_n' wetka'

(Mr. 12:18-27; Lc. 20:27-40)

23Na' lo llana'kz_ə saduceoka', be_n'ka' bi chajle'gake' yiban be_n' wetka', wyajgake' lao Jesúza', na' w_nabg_kile'ne':

24—Maestro, dii Moiséza' wne' shi to be_n' byo guete' na' kono xiine' wzoa, be_n' bisheena' chiya_l' yikee xool dii be_n'

bisheena' kwenche soa xiin dia che dii ben' weta'. 25Na' ki gok che gall bish' ben' nakgake' neto' txen. Ben' necha' bshagnee, na' wite' na' kono xiine' wzoa, na' ben' bishee, ben' wchopina', bikee xoole'na'. 26Na' lekzka' wit ben' wchopina' na' kono xiine' wzoa. Na' ka'kzə wit ben' wyonina' na' ax̄t biyate ben'ka' gall wit. Na' ni togake' bi wzoa xiingake'. 27Na' ka wde wit yog'lolē' na'ch lekzka' wit noola'. 28Na' kat' yiban ben' wetka', naa, ζnora ben'ka' gall bish' gaki xoole' noola'? la' yog'lolen' wkaagake'ne'.

29Na'ch che' Jesúza' legake':

—Naklejzilen daa bi nezile ka na Cho'a Xtill' Chioza', na' ka nak ye' wak che'na'. 30La' kat' yiban ben' wetka', koch no yikaa ljwellin, ni koch no wit' wde xiinin, san yiyakgake' ka anjlka' lle' yabana'. 31Na' ka nak daa yiban ben' wetka', naa, ζabin' wlable daa wna kwın Chioza', gana' nan: 32“Nad nak' Chios che Abrahama', Isaaca' na' Jacoba'”? Na' bi nake' Chios che ben' wet, san nake' Chios che ben' ban, la' lao Chioza' mban ben'ki.

33Na' ka beni ben'ka' lle' na' daa wna Jesúza', le bibangakile' ka chli' chsedile'.

Daa lliarote daa bllia Chioza' bia' goncho

(Mr. 12:28-34)

34Ka wnezi fariseoka' ba wleklli Jesúza' saduceoka', na'ch wyajgake' kwite'na'. 35Na' to beena' chli' chsedi leya' wnabile' Jesúza' kwenchezə wchixeene', chi'e:

36—Maestro, ζberan lliarote nllia leya' bia' goncho?

37Na' Jesúza' golle'ne':

—“Chiyal' gakilo' Xancho Chioza' do yichj do lalloo na' ax̄t ga zeelo chajniilo'.” 38Dgan liizelozi chonte na' llialon lawi yog' diika' nllia leya' bia'. 39Na' de wchopina' nakan katekzə dii necha', na' nan: “Chiyal' gakilo' bish' ljwello'ka' ka chaki kwino'.” 40Na' diiki chop chejin doxen ka na leya' len diika' bzej dii ben'ka' wdixjee daa goll Chioza' legake'.

Crístona' nake' xiin dia che dii Davina'

(Mr. 12:35-37; Lc. 20:41-44)

41Na' shlak ndop nllag fariseoka' kwit Jesúza' 42wnabile' legake':

—¿Nak ka chakile che Crístona', beena' inabia'? ¿No xiin dia cheyin nake'?

Na' che'gake'ne':

—Xiin dia che dii Davinan'.

43Na' che' Jesúza' legake':

—Na' ¿berache ben Espíritu Sántona' ka goll dii Davina'ne': “Xan'”? La' kin na daa bzeje':

44Xancho Chioza' golle' Xan'na':

“Wche' kwit' de shlini,

shlak wzoa' xni'ona' ben'ka' chakzbani li.”

45Na' shi kwin dii Davina' golle' Crístona': “Xan'”, ¿berache nazle nake' xiin dia che', shka'?

46Na' ni toe' bi gok yilliigake' xtilleena'. Na' zeelo kana' koch no biyaxji bi inabgakile'ne'.

Jesúza' chawe' xya che fariseoka' na' ben'ka' chli' chsedi leya'

(Mr. 12:38-40; Lc. 11:37-54; 20:45-47)

23 1Na'ch Jesúza' golle' ben'ka' nakgake'ne' txen len ben'ka' lle' na', chi'e:

2—Ben'ka' chli' chsedi leya' na' fariseoka' nak lo na'gake' wzajni'gakile' ben' daa bzej dii Moiséza'. 3Na' chiyal' wzenagle chegake' kat' chzajni'gakile' le' leya' na' gonle ka nan. Per bi gonle ka chongake', la' legake' bi chongake' ka nagake' chiyal' gonle. 4Dii zan dii che'gake' ben' chiyal' gongake', na' nakan ka to yoa' xen dii chwa'gake' ben' dii kono so saki, na' legake' bikz bi chda na'gake' kwenche gaklengake'. 5Na' yog' diika' chongake' chongake'n kwenchezə ile'i ben' ka chongake' na' we'la'ogake' legake'. Na' kajdo'ka' nak de yid daa yoo lat' Cho'a Xtill' Chioza' daa chda' loxgue'ka' na' daa chche' neeka' chongake'n dii xench aga ka che ben' yoblə, na' chtonchgake' lox xe'ka' aga ka che ben' yoblə. 6Na' kat' chajgake' lnika', le chibagakile' kwe'gake' gana' chbe' ben'ka' zakii, na' lekzka'yen' chjengake' gana' chdop chllaggake' choe'llwillgake' Chioza'. 7Na' le chibagakile' gap ben' legake' balaan kat' chillaggake' legake' ga lle' lla' ben' na' ye'gake' legake': “maestro”.

8'San le', bi we'le latj ina ben' le' “maestro”, la' toz nadaan nak' Maestro chele na' yog'le nakle ka bish' ljwellin. 9Na' kono



*Ben' Israelka' b'chejgake' kajdo'ka' nak de yid loxgue'ka' na' neeka'
kat' be'lwillgake' Chioza'. Na' yoon lat' Cho'a Xtill' Chioza'.*

ye'le “xa” lo yell-lioni, la' toz Chioza', beena' zoa yabana', nake' Xale. ¹⁰Ni bi we'le latj inagake' le' “maestro”, la' toz nad', Cristo, nak' Maestro chele. ¹¹La' beena' nak ben' gaxjlall' na' chaklene', beenan' nake' ben' zak'chi ladjlena'. ¹²Na' beena' chon kwine' ben' zakii, Chioza' gone'ne' ben' bibi zakii. Na' beena' chon kwine' ka ben' bibi zakii, Chioza' gone'ne' ben' zakii.

¹³¡Nyesh'laz gak chele, le' chli' chsedile' leya' na' le' fariseo, daa nakle ben' wxiye'! La' chsej chllonle gombia' ben' ye'le wnabia' che Chioza', na' ni bi choe'le latj inabi'e le', ni bi choe'le latj che ben'ka' cheengakile' inabi'e legake'.

¹⁴¡Nyesh'laz gak chele, le' chli' chsedile' leya' na' le' fariseo, daa nakle ben' wxiye'! La' chkaale lill nool wizebka' na' choe'lwille Chioza' ssha nllab kwenche gaki ben' nakle ben' wen. Na' daa chonle ka', Chioza' wsak'zi'che' le' aga ka ben' yoblə.

¹⁵¡Nyesh'laz gak chele, le' chli' chsedile' leya' na' le' fariseo, daa nakle ben' wxiye'! Chdale to ni to na' chyilje ben' wsede' daa chli' chsedile. Na' kat' chllelilene' chónlene' ben' malch aga ka le' na' chlliayi'chlene' axt choplə ka to ba mbiayi'le.

¹⁶¡Nyesh'laz gak chele, le' nakle ka ben' lchol, ben' chakile' wak wchi'e sto ben' lchol! La' nale: “Shi to ben' wchebe' to dii gone' na' wzoe' yoodo'na' de taschiw kwenche gone' daa bchebe', bi chonan byen gone'n.” Na' chiznale: “Shi wzoe' de taschiw ora' daa de loo yoodo'na', na'chan chiyal' gone' daa bchebe'.” ¹⁷¡Le' nakle ka ben' lchol daa bi nteyile! ¿Abi chakbe'ile zak'ch yoodo'na' aga ka ora'? La' yoodo'nan' chonan kwenche ora' de lo'inna' nakan che Chios. ¹⁸Na' lekzka' chiznale: “Shi to ben' wchebe' to dii gone' na' wzoe' de taschiw gana' chzeygake' bayix'ka' chitgake' kwenche choe'la'ogake' Chioza', bi chonan byen gone' daa bchebe'. Per shi wzoe' de taschiw bayixaa chxoagake' lawinna', na'chan chiyal' gone' daa bchebe'.” ¹⁹¡Le' nakle ka ben' lchol daa bi chajniile! ¿Abi chakbe'ile' gana' chzeygake' bayixaa chzanile we'le Chioza' zak'chan aga ka bayixaa chzeygake' lawinna'?, la' gana' chzeygake'b chonan leb ba che Chios. ²⁰La' beena' chcheb wi'e to dii wi'e na' chzoe' de taschiw gana' chzeygake'b, aga toz lennan' chzoe' de taschiw, san lekzka' len yog' daa xoa lawinnan'. ²¹Na' beena' chcheb wi'e to dii wi'e na' chzoe' de taschiw yoodo'na', aga toz yoodo'nan' chzoe' de taschiw, san lekzka' len Chiozan'

daa nakan lill xlatje'. 22Na' lekzka' beena' chcheb wi'e to dii wi'e na' chzoe' de taschiw yabana', aga toz yabanan' chzoe' de taschiw, san len Chiozan' daa nakan gana' chnabi'e.

23;Nyesh'laz gak chele, le' chli' chsedile leya' na' le' fariseo, daa nakle ben' wxiye'! Choe'le Chioza' diézmona' axt len yixweja', aníza', na' cominna', per bi chonle daa lliatech daa nllia Chioza' bia' goncho. Dii lliatech goncho daa nak shli, yiyesh'lalicho ben', na' gonlilall'cho Chioza' do yichj do lall'cho. Diikin chiya' gonle, per lekzka' bi chiya' wsanle gonle diika' sto. 24;Le' nakle ka to ben' lchol ben' chakile' wak wchi'e sto ben' lchol! Na' chonle ka to ben' chone' byen chibeje' to bi'a lesdo' loo yel' wao che'na' na' bi chakbe'ile' chebe' to kamey.

25;Nyesh'laz gak chele, le' chli' chsedile leya' na' le' fariseo, daa nakle ben' wxiye'! Nakle ka xig' yeen dii nxi nyech kollarinna' per lo'inna' bi nxe bi nzak' nakan, daa chonle ka chaki ben' nakle ben' wen per le chzelall'le bi dii de che ben' na' chbanlen. 26Na' le' fariseo, nakle ka ben' lchol daa bi chajniile! Li yiyaj yileni daa chonle kwenche gakte ben' wen ka chaki ben' nakle, na'ch gakte ka xig' yeen dii nxi nyech ka loolə ka koll'lin.

27;Nyesh'laz gak chele, le' chli' chsedile leya' na' le' fariseo, daa nakle ben' wxiye'! La' nakle ka to lill ben' wet dii nyebgake' yiw' na' nla' lawinna' xochi, per lo'inna' lle' lla'n lilit wetka' na' bichlə dii zban. 28Kan' nakle le' daa chonle ka chaki ben' nakle ben' li ben' shao' per loo yichjlall'do'lena' lle' lla'n de wxiye' na' dii mal.

29;Nyesh'laz gak chele, le' chli' chsedile leya' na' le' fariseo, daa nakle ben' wxiye'! Chonshao'zle gana' bkwash'gake' dii ben'ka' wdixjee daa goll Chioza' legake' kani'yi, na' chonle xochi gana' bkwash'gake' nochlə ben'ka' gok ben' li ben' shao'. 30Na' nale: "Shel'ka' neto' ba zoanto' kana' wzoa dii xozxto'nto'ka' aga bennto' legake' txen ka betgake' dii ben'ka' wdixjee daa goll Chioza' legake'." 31Per kwinkzlen chli'le nakle toz ben'ka' betgake' dii ben'ka' wdixjee daa goll Chioza' legake' kani'yi, la' toz ka chonlenle legake'. 32;Na' li yisyoll li yisto li gon dii mala' daa bi biyoll gon dii xozxto'leka'!

33;Le' nakle ka bel' znia! Bi gakte shi wilale lo yi' gabila'. 34Daan wselaa ben' chixje'gakte' le' daa yepgakee. Wselaa ben'

sin' ben' chajni kwenche wli' wsedgakile' le' cho'a xtillaana'. Per balgake' witle, na' balgake' wda'le lee yag cruza', na' balgake' wit chinle gana' chdop chllagle choe'lwill-le Chioza', na' zi balgake' lljalagle to to yellka' gana' illingake'. ³⁵Na' daa gonle ka', yidobile yel' wit che yog'lol' ben' li ben' shao'ka' bet dii xoxto'leka', wzolozin dii Abela' beena' gok ben' li ben' shao', axt dii Zacaríaza', xiin Berequíaza', beena' betgake' latja' daa de cho'a yoodo'na', kwit gana' chzeygake' bayix'ka'. ³⁶Dii li nia' le', ka le' zoale naa chidol'le sak'zi'le che yog' daa ben dii xoxto'leka'.

Jesúza' gokyeshile' che ben' Jerusalénka'

(Lc. 13:34-35)

³⁷¡Le' ben' Jerusalén, le' chitle ben'ka' chyixjee daa che' Chioza' legake', na' chlliale yaj ben'ka' chselee chixje'gakile' le' cho'a xtilleena'! ¡Zan shii goklallaa gon' chele ka chon jeda' chiyellb xiindo'bka' xan xilba', na' bi goklall'le! ³⁸Na' naa ba wlej yichj Chioza' le', na' gani lle'le idesh iloan. ³⁹Na' nia' le', bich ile'ile nad' axt kat'ch illin lla inale: “¡Gaklenshga Xancho Chioza' beeni ba bselee!”

Jesúza' bi'e dill' yiyinj yoodo'na'

(Mr. 13:1-2; Lc. 21:5-6)

24 ¹Na' ka bichej Jesúza' loo yoodo'na' kwenche yiyaje' gan yoblə, ben'ka' nakgake'ne' txen jabig'gake' kwite'na' na' wzologake' choe'lengake'ne' dill' ka xochi nak yoodo'na'. ²Na'ch che' Jesúza' legake':

—Yog' dga chle'ile naa, dii li nia' le' wllin lla kat' yiyinj doxenan, ni to yaj bich igaan koll' ljjwellin.

Diika' gak kat' ba zoa te che yell-lioni

(Mr. 13:3-23; Lc. 21:7-24; 17:22-24)

³Na'ch biyajgake' lo Yaa Olívoza', na' ka chi' Jesúza' lo yaana' na'ch wbig' ben'ka' nakgake'ne' txen na' xochitezə wñabgakile'ne', che'gake':

—Cheeninto' ino' neto' batran gak daa ba wno'. ¡Nakran gak kat' ba zoa yiyedo' dii yoblə na' kat' ba zoa te che yell-lioni?

⁴Na'ch che' Jesúza' legake':

—Wsak'yen'gale kwenche kono siye'z le'. ⁵La' ben' zan ichej inazgake': "Nadaan Crístona'." Na' ben' zan shajle'. ⁶Na' yenile chak wdil to ni to na', per bi gakshejlall'le. La' dii chiyal'kz gakan, per aga ba bllin lla te che yell-lionin kat' ba chak ka'. ⁷La' yidil-len ljwell yellka' na' ben' wnabia'ka' yidil-len ljwellgake', na' kwe' yillwe', kwe' wbin, na' zan yell gak bedxo' wal. ⁸Kat' ba chak diiki, shinz chzolo ka nak daa yen ile'i ben' yell-lioki.

⁹Na'ch gongake' le' lo na' ben'ka' wchi' wsak' le', na' witgake' le', na' yog' ben' yell-lioki gaksbangakile' le' daa nonlilall'le nad'. ¹⁰Na' kat' ba chak diiki ben' zan bich gonlilall'gake' nad', na' gaksbani ljwelle' na' gon ljwellgake' lo na' ben' malka'. ¹¹Na' ichej zan ben' gonzgake' ka ben' chyixjee daa che' Chioza' legake', na' ben' zan shajle'. ¹²Na' daa kwe'chachga dii mala', ben' zan bich gaksakile' Chioza' ni bish' ljwelle'ka'. ¹³Per beena' soachech gonlilallee nad' axt ka yiyoll diika' yen ile'ile', beenan' gat' to yel' mban che' zejli kani. ¹⁴Na' ka nak dill' wen dill' kob che yel' wnabia' che Chioza', chonan byen lljtixjeegake'n doxen yell-lioni kwenche yog'lol ben' yengakile'n, na' kana'chan te che yell-lioni.

¹⁵Dii Daniela', beena' wdixjee daa goll Chioza'ne', bzeje' cheyi daa soa loo yoodo'na' daa wnitán balaan cheyinna', na' chiyal' sele wneyi bin zejlin. Na' kat' ile'ile'n loo yoodo'na' ¹⁶kanan' ben'ka' zoa Judeana' chiyal' wxonjgake' shajgake' yaa yaoka'. ¹⁷Na' beena' llia koll' lille'na' ni bich gal' yiyetje' lljaleje' dii de loo yoo lille'na'. ¹⁸Na' beena' chda lyixaa ni bich gal' yiyaje' lille'na' lljaxi'e xe'na'. ¹⁹Nyesh'laz gak che noolka' noa' na' noolka' chwall' chxop llana' gak ka'! ²⁰Li inabi Chioza' kwenche llana' wxonjile dga bi gakan kat'ka' chbe' dii zaga' wa to lla sabd, llana' chombaanchó. ²¹La' yel' zak'zi' wal inlleban nak daa yen ile'ile, daa konon' yen ile'kzi dezd ka wxe wzil yell-lioni axt naa, na' kat' ba wde gokan kochno yen ile'i ka len. ²²Na' shi Chioza' bi wzeshee llaka' gak ka', kono yila, shel'ka'. Per wzesheen daa chakile' ben'ka' ba wleje' kwenche nakgake' lall' nee.

²³Na' llaka' chak ka' shi no ina le': "Li wwia, ni ze Crístona'", wa ine' le': "Na' zie'", bi shajle'le. ²⁴La' wchej ben' siye'gake', inazgake': "Nadaan Crístona'", wa "Nadaan chyixji'a daa na Chioza'". Na' lekzka' gongake' dii gonan ka yibani ben', na' gongake' yel' wak xen kwenche siye'gake' ben', axt shel' wxegakile'

siye'gake' ben'ka' ba wlej Chioza' nakgake' lo nee. ²⁵Na' naa ba bzenid' le' ka nak daa zi' gak. ²⁶Daan shi no inaz le': "Cristona' zoe' latja' gana' bibi chashj chleb", bi shajle; wa shi no inaz le': "Loo yoonaa' zoe'", bi shajle'le. ²⁷La' kat' nad', Ben' Bsel' Chioza' Yell-lioni, zizaa dii yoblə, gak ka chak kat' chep yes na' chzeeni'n doxen xan yabana'. ²⁸La' gana' de ba weta' nan' chllag llodka'.

Kat' yiyed Jesucristona'

(Mr. 13:24-37; Lc. 21:25-33; 17:26-30, 34-36)

²⁹Na' kate yiyoll yel' zak'zi'ka', lii gakte shgasj shchol lao wbillaa' na' bewaa bich wzeeni'n na' beljka' ixopgakan, na' yog' diika' lia xan yabana' inibgakan. ³⁰Na'ch yog' ben' lle' yell-lioni ile'gakile' nad', Ben' Bsel' Chioza' Yell-lioni, zizaa ladj bejka' kon yel' wak na' balaan xen. Na' yog' ben'ka' lle' doxen yell-lioni kwellyesh'gake'. ³¹Na' ka kwell trompeta' zillj wselaa anjl cha'ka' zbii zkaan yell-lioni kwenche yitopgake' ben'ka' wlej Chioza' nak lall' nee.

³²Na' li wwia ka chak che yag yixwewa': kat' ba chzolo chibia xlaguiinna', na' chakbe'ile ba zoa yiyoo la'o linna'. ³³Ka'kzan, kat' ile'ile ba chak yog' diika' ba wnia' le' gaka, na' gakbe'ile ba zoa gaoshosh te che yell-lioni. ³⁴Dii li nia' le', aga ba wit ben'ki zoa naa kat' gak yog' diiki lia bia' gaka. ³⁵Yabana' na' yell-lioni te chgakin, san cho'a xtilaana' biga te cheyin na' gak ka nan.

³⁶Kono nezi bi lla bi gor te che yell-lioni, ni anjlka' lle' yabana', ni nad' nak' Xiin Chioza'. Toz Xa' Chioza' nezile'n.

³⁷Na' ka gok kana' wzoa dii Noéna', ka'kzan chak kat' nad', Ben' Bsel' Chioza' Yell-lioni, yiyed' dii yoblə. ³⁸La' ben'ka' wzoa kana' zi' gak yej ziw' wala', cheej chaogake', na' chshagna'gake' na' no choe'gake' yel' wishagna' che xiine'ka' axt llana' wyoolen dii Noéna' xiin xoole'na' loo barkwa'. ³⁹Na' ben'ka' bi wyoo bi gokbe'gakile' bin gak axt ka wzolo chak yejsiwaa na' bia' nisa' yog'gake'. Na' ka'kzan ni to kono gakbe'i kat' nad', Ben' Bsel' Chioza' Yell-lioni, zizaa. ⁴⁰Kana'n, gana' lle' chop ben' lyixaa, toe' yichi'a na' beena' sto yigaane'. ⁴¹Na' gana' lle' chop noolə chotgake', toe' yichi'a na' stoe' yigaane'.

⁴²Daan li se kwas kwezle nad' nak' Xanle, la' bi nezile bi lla bi gor zizaa. ⁴³Li shajni'kachi dga, shel' xan yoonaa' nezile' bi gor



*Na' gana' lle' chop noolə chotgake', toe'
yichi'a na' stoe' yigaane'. Mt. 24:41*

illin beñ' wbanna' lille'na', aga wes yele' kwenche bi wi'e latj
sho' wbanna' lille'na'. 44Na' daan, li soatezi soa kwezle nad', Beñ'
Bsej' Chioza' Yell-lioni, la' kat' bilə nonle lez, tokonganzi zizaa.

**Jempl che wen llinka', beena' chon wen
na' beena' bi chon wen**

(Lc. 12:41-48)

45'Na' li gak ka to wen llin beñ' chajni na' chone' daa chiyañ'
gone' na' kat' chza' xane'na' chone' lall' nee lille'na' kwenche
wi'e dii yeej gao wen llinka' sto gor cheyin. 46Chakomba wen
linna' daa chilalile' chone' daa chidolee gone' kat' yillin xane'na'.
47La' dii li nia' le', xane'na' gone' lall' nee yog' dii de che'. 48Per
shi wen linna' nake' beñ' mal na' gakile': "Wllaljachkzi xan'na'
yilee." 49Na' soloe' wit chine' wen llinka' nak lall' nee na' yeej
gaolene' weezoka'. 50Na' llana' bi nonyen'le' lez, tokonganz yillin
xane'na'. 51Na' daa bi chone' wen, na' wsak'zi'ene' ka sak'zi'
beñ' wxiye'ka' gana' kwellyesh'gake' na' gaoxaxj leye'ka' daa le
gakshejlall'gake'.

Jempl che shi bi' nool wew'ka'

25 ¹Yel' wñabia' che Chioza' chzaklebin daa gok che shi bi' nool wew' wyaj to wishagna', na' bex'gakb' kandil cheb'ka' jlezgakb' bi' byona' lill noola'. ²Na' gay'gakb' nteyi na' zi gay'gakb' bi' nteyi. ³Bi'ka' bi' nteyi kontele wza'len kandil cheb'ka', per bich bex'gakb' seta' yigaagakba'n. ⁴Na' bi'ka' nteyi, bex'gakb' kandil cheb'ka' na' bex'tegakb' seta' yigaagakba'n. ⁵Na' bi' wishagna'na' wle'ib' na' bi' nool wew'ka' chbez gokxweskakb' na' wtesgakb'. ⁶Na' do ka chel besyaa to ben', chi'e: “¡Ba za' bi' wishagna'na', li sho' lljatilchob'!” ⁷Na' wyas bi' nool wew'ka' wzologakb' chiyonshao' kandil cheb'ka'. ⁸Na' bi' nool wew'ka' bi' nteyi gollgakb' bi'ka' zi gay': “Li gongach neto' lat' set chelena' la' ba chibill chento'ni.” ⁹Per bi'ka' nox' seta' che'gakb': “Bi gonnto'n, kwenche ki iyalljichon ganga. Wenlə li shaj li lljxi' chelena' gana' chiteen.” ¹⁰Na' shlak zejgakb' zjxi'gakb' seta', bllin bi' wishagna'na' na' bi'ka' nox' seta' wyoolengakb' ben'ka' loo yoona' gana' chak wishagna'na', na'ch wyej puerta'. ¹¹Na' ka billin bi' nool wew'ka' jxi' seta', wnegakb' xan yoona' che'gakb': “¡Ben'do', bsaljgach shoonto'!” ¹²Per xan yoona' chi'e legakb': “Bi wsalj, la' bi nombi'a le'.”

¹³Na'ch che' Jesúza' ben'ka':

—Ka'kzə le', chiyal' se kwasle, la' aga nezile bi lla bi gor zizaa.

Jempl che ben'ka' bgaanlen xmech xane'ka'

¹⁴Yel' wñabia' che Chioza' zaklebin dga wseesaa. To ben' wzee zeje' zit', na' ka ba zoa see, goxe' wen llin che'ka' na' bene' lall' na'gake' xmeche'na' kwenche gonlengake'n delgens.

¹⁵Na' toe' bi'e gayaa mil mech de or, na' stoe' chopa milan, na' beena' sto bi'e to milan. Bi'e to toe' kon ka dii chakile' wak gonlengake' llinna'. Na'ch wzee zeje'. ¹⁶Na' beena' bi'e gayaa milan, benlene'n llin na' bene' gan zi gayaa milan. ¹⁷Na' lekzka' beena' bi'e chopa milan, benlene'n llin na' bene' gan zi chopa milan. ¹⁸San beena' bi'e to milan, jtene' to yech na' bkwasheen.

¹⁹Na' ka ba gok ssha na' billin xane'ka', na' goxe' to togake' kwenche bidegake' kwent lawe'na'. ²⁰Na'ch zigaate beena' bi'e gayaa mil mech de or blline' lawe'na', chi'ene': “Xan', ni de de

gayaa mila' beno' nad', na' ni de zi gayaa mil daa benlena'n gan.”
 21 Na' che' xane'na'ne': “Le wen beno', to wen llin wen inleeb nako',
 beno' ka chiyal' gono' kon daa bkwaanlen' li' lat'. Na' dii xench
 gon' li' naa. Wyoo kwenche yibalenilo' nad'.” 22 Na'ch wdena'
 bllin wen llinna' bkwaanlene' chopa mil, chi'ene': “Xan', ni de
 de chopa mila' beno' nad', na' ni de zi chopa mil daa benlena'n
 gan.” 23 Na'ch che' xane'na'ne': “Le wen beno', to wen llin inleeb
 wen nako', beno' ka chiyal' gono' kon daa bkwaanlen' li' lat'. Na'
 dii xench gon' li' naa. Wyoo kwenche yibalenilo' nad'.” 24 Per ka
 bllin wen llinna' bkwaanlene' to mil, na' golle' xane'na': “Xan',
 nezid' nako' ben' znia, na' to chizi'zo' banez daa chon ben'
 yoblə. 25 Na'chan blleb' gonditj' xmecho'na', daan wden' to yech
 na' bkwashaan. Ni de xmecho'na', bikaagachan, la' chekzo'n.”
 26 Na'ch che' xane'na'ne': “Ben' lia, bikz bi llin yejni'alallii chono'.
 Nezteilo' to chizi'z' banez daa chon ben' yoblə. 27 Na' daa nezilo'
 kan' chon', ¿berache ki joo xmechaa gana' chon yichjin shlak bi
 wzoa'? Shel' beno' ka', na' naa ba biyed' yiyono'n lente yichjinna',
 shel'ka'.” 28 Na'ch golle' ben'ka' lle' na': “Li yikaa mecha' daa
 bkwaanlene' na' li we'n beena' nap shi milan. 29 La' kan' nakan,
 beena' chgone' llin daa yoo lo nee, gonche' lall' nee dii xench
 axt gat' kwe'chile'; san beena' bi chgone' llin daa yoo lo nee,
 axt daa ngoo lo nee lat' yidoyo. 30 Na' wen llinni bi yejni'alallii,
 li wzalee gana' shgasj shchol, gana' kwellyeshee na' gaoxaxj
 leye'na' daa le gakshejlallee.”

Ka gak kat' wchoglo Jesúza' che ben'

31 'Kat' ziza' nad', Ben' Bsel' Chioza' Yell-lioni, len balaan
 xen cha'na' na' yog' anjl cha'ka', na' wli'a yel' wñabia' choo yel'
 wñabia' xen cha'na'. 32 Na' yog' ben' lle' doxen yell-lioni yidopgake'
 lawa'na', na' gon' che cheləgake' ka chon to ben' chape' bayix'
 chone' chelə xil'ka' na' chelə shibka'. 33 Na' wzoa' shlaa de shli
 cha'ni ben'ka' zaklebi xil'ka' daa chonlilall'gake' nad', na' ben'ka'
 zaklebi shibka' daa bi benlilall'gake' nad', wzoagakee shlaa de
 robes cha'ni. 34 Na' nad', ben' wñabia', yep' ben'ka' lle' shlaa de
 shli cha'ni: “Li da, ka le' ba ben Xa' Chioza' ka gak wen chele,
 na' si'le banez daa ba nonshawee chele ka bxe bsiltie' yell-liona'.
 35 La' ka wdon', bwaole nad'; na' ka wbilid', benle dii weej'; na' ka

wda' ka beṇ' zit', bleble nad' lill-lena'. ³⁶Na' ka byallj xalaana', beṇle dii gokw', na' ka bi shawaa, bidwiale nad'; na' ka gotaa lillyana', bidwiale nad'." ³⁷Na' yog' beṇ' li beṇ' shao'ka' inagake' nad': "Xan', ¿batran ble'into' li' chdono' na' bwaonto' li'? ¿Batran ble'into' li' chbililo' na' beṇnto' daa weejo'? ³⁸¿Batran ble'into' li' chdo' ka beṇ' zit' na' blebnto' li' loo yoo lillnto'na'? ¿Batran ble'into' li' chdo' bibi xalaano' de na' beṇnto'n'? ³⁹Na' ¿batran gokbe'into' bi shawoo wa gotoo lillyana' na' bidwianto' li'?" ⁴⁰Na' nad', beṇ' wṇabia', yepgakee: "Dii li nia' le', yog' daa benle che beṇ'ka' byallj bḥini, beṇ'ka' nak beṇ' bishaa na' beṇ' zan', la'kzi bi nakgake' beṇ' zakii, nad'kzan benile ka'."

⁴¹'Na'ch yep' beṇ'ka' lle' shlaa de robesi: "Li kwas ka'lə, le' wen dii mal. Lo yi' gabiḷa' daa chal' zejli kaṇi chido'le yiyajle gana' ba non Chioza' sak'zi' dii xiwaa len anjl cheyinka'. ⁴²La' ka wdon' bi beṇle dii gaw'; na' ka wbiḷid' bi beṇle dii yeej'. ⁴³Na' ka wda' ka beṇ' zit', aga bleble nad' loo yoo lill-le. Na' ka byallj xalaana', aga bi beṇle; na' ka bi shawaa wa gotaa lillyana', aga bidwiale nad'." ⁴⁴Na' inagake' nad': "Xan', ¿batran wdono', wa wbiḷilo', wa wdoo ka beṇ' zit', wa bibi xalaano' got', wa bi shawoo, wa gotoo lillyana' na' bi goklennto' li'?" ⁴⁵Na' yepgakee: "Dii li nia' le', daa bi goklenle beṇ'ka' byallj bḥini, beṇ'ka' nak beṇ' bishaa na' beṇ' zan', la'kzi bi nakgake' beṇ' zakii, nad'kzan bi goklenle." ⁴⁶Na' beṇ' malkan' yiyajgake' gana' tegake' yel' sak'zi'na' zejli kaṇi, na' beṇ'ka' nak beṇ' li beṇ' shao' soalengake' nad' zejli kaṇi.

Wloogake' xnezin gox'gake' Jesúza'

(Mr. 14:1-2; Lc. 22:1-2; Jn. 11:45-53)

26 ¹Na' ka biyoll be' Jesúza' yog' dill'ka', na'ch golle' beṇ'ka' nakgake'ne' txen:

²—Ba nezkzile zi chop llazan chyallj gal' lni Paskwa', na' nad', Beṇ' Bsel' Chioza' Yell-lioni, gak' lo na' beṇ'ka' witgake' nad' lee yag cruza'.

³Na'ch bxo'zka' chṇabia' na' beṇ'ka' chli' chsedi leya' na' beṇ' golka' chṇabia' beṇ' Israelka' bdopgake' lill bxo'z choo bxo'z xenna', beena' le Caifás. ⁴Na' wloogake' xnezin gox'gake' Jesúza' xochizi, ka ki gakbe'i beṇ', na' witgake'ne'. ⁵Na' che' ljwelle':

—Bi gox'chone' shlak chal' lnina' kwenche bi wta wnecho ben'.

To noolə bwazje' set zixa' yichj Jesúza'

(Mr. 14:3-9; Jn. 12:1-8)

6Na' ka zoa Jesúza' Betániana' len ben'ka' nakgake'ne' txen, wyajgake' lill to ben' le' Simón, beena' gok yillwe' daa le lepra. 7Na' shlak chi' Jesúza' cho'a mesa', bllin to noolə noxee to lmet de yaj xochi na' yollan set dii chla' zix dii zak' mech xen, na'ch bwazje'n yichj Jesúza'. 8Na' ka ble'i ben'ka' nak Jesúza' txen daa ben noola', le bllaagake' na' che' ljwelle':

—¿Biche benditjz beeni seta'? 9She' bet'chokle'n, la' dii xen zakaan, na' bi'e xmechinna' ben' yesh'ka', shel'ka'.

10Na' beni Jesúza' ka choe'gake' dill', na' golle' legake':

—¿Biche chnezle che nooli? La' daa ba bene' cha' nakan dii wen. 11Ka nak ben' yesh'ka', toshiizi soagake' ladjlena', san nad', aga toshiizi soalen' le'. 12Daa ba bwazj nooli nad' set zixa', bene' ka' kwenche gakshao'zega kwerp cha'ni kat' wkwash'gake' nad'. 13Na' dii li nia' le', gattezə we'gake' dill' wen dill' kob che Chioza' lo yell-lioni, lekzka' we'gake' dill' ka nak dii wenna' daa ba ben nooli na' lljadingakile'ne'.

Juda' bdie' Jesúza' lo na' bxoza' chnabia'

(Mr. 14:10-11; Lc 22:3-6)

14Na'ch beena' le Jud Scariot, beena' nak txen ben'ka' shllin, wyaje' lao bxoza' chnabia'. 15Na' golle' legake':

—¿Ka'k' chixjle nad' shi gon' Jesúza' lo na'le?

Na'ch wdixjgake'ne' shichoa mech plat. 16Na'ch lo llana'tez wzolo Juda' chinoe' nakan gone' kwenche gone' Jesúza' lo na' ben'ka'.

Xancho Jesúza' wdaolene' ben'ka' nakgake'ne' txen xshe'na'

(Mr. 14:12-25; Lc. 22:7-23; Jn. 13:21-30; 1 Co. 11:23-26)

17Lla nech che lni Paskwa', llana' chaogake' yetxtila' daa bi nchix levadúrana', ben'ka' nak Jesúza' txen wyajgake' kwite'na' che'gake'ne':

—¿Ga cheenilo' lljasini'anto' xshe' che lni Paskwi?

18Na'ch che' Jesúza' legake':

—Li shaj yell Jerusalénna', na' beena' yillagle ye'lene':

“Maestrona' ne' ba zoa gak daa llia bia' gak che', na' lillo'na' cheenile' wsini'anto' daa gaolennto'ne' xshe' che lni Paskwi.”

19 Na'ch ben'ka' nakgake'ne' txen bengake' kon ka golle' legake', na' jasini'agake' xshe' che lni Paskwa'.

20 Na' ka gol, wche'len Jesús'a' ben'ka' shllin cho'a mesa'.

21 Na' shlak chaogake' che' Jesús'a' legake':

—Dii li nia' le', tole gonle nad' lo na' ben'ka' chakzi' chakzbani nad'.

22 Na' ka golle' legake' ka' le gokyesh'gakile' na' to toe' che'gake'ne':

—Xan', zanadaan gon' ka', lla?

23 Na'ch che' Jesús'a' legake':

—Beena' ba bleejlene' nad' yetxtil che'na' loo yeena', beena'kzan' gone' nad' lo na' ben'ka' chakzi' chakzbani nad'.

24 Ka nak nad', Ben' Bsel' Chioza' Yell-lioni, wit ben' nad' kon ka na Cho'a Xtill' Chioza', per nyesh'laz gak che beena' gone' nad' lo na' ben'ka'! ¡Naklan wen shel'ka' bi golje'!

25 Na'ch Juda', beena' wdie' Jesús'a' lo na' ben'ka', chi'ene':

—Maestro, zanadaan gon' ka'?

Na'ch che' Jesús'a'ne':

—Kan' ba wno'z.

26 Na' shlak chaogake', bex' Jesús'a' yetxtila' na' bi'e Chioza' yel' choxken, na' bxoxje'n na'ch bi'en ben'ka' nakgake'ne' txen, chi'e':

—Li gao dga. Lennan' kwerp cha'ni.

27 Na'tech bexee to kop dii yoll vino, na' bi'e Chioza' yel' choxken na' bi'en legake', na' golle':

—Yog'le li yeej dga yoll loo kopi, 28 la' lennan' xchen'na' daa gon ka gak li dii koba' bcheb Chioza' gone'. Na' laljan kwenche yiyakxen saaxya che ben' zan. 29 Na' nia' le', ni zeelo cheejlen' le' nis uvani. Aga weejcha'n axt kat'ch illin lla soacho txen gana' chnabia' Xa' Chioza', kana'chan yeejlana'n le' dii yoblə.

Jesús'a' chi'e bi wcheb Pédrona' shi nombi'ene'

(Mr. 14:26-31; Lc. 22:31-34; Jn. 13:36-38)

30 Na' ka bidaogake', belgake' be'la'ogake' Chioza' na'ch biyajgake' lo yaa Olívoza'. 31 Na' ka ziyajgake', che' Jesús'a' legake':

—Yog'le kwej yichjle nad' naanlle'. La' kin na Cho'a Xtill' Chioza': "Wit' beena' chap xil'ka' na' illeshlesgakb." 32Per ka yiban' ladj beṇ' wetka', yiyaa Galileana' lljalez' le'.

33Na'ch che' Pédrone'ne':

—La'kzi yog' beṇ'ki kwej yichjgake' li', nad' bi kwej yichj' li'.

34Na'ch che' Jesúsane'ne':

—Dii li nia' li', naanlle' shon shii bi wchebo' shi nombi'o nad' ka zi' kwell shikwteza'.

35Na' Pédrone' chi'ene':

—La'kzi guetlentie' li', biga inia' bi nombi'a li'.

Na' ka'kzə goll yog'lol beṇ'ka' nakgake'ne' txen.

Jesúza' be'lwille' Chioza' latja' le Getsemaní

(Mr. 14:32-42; Lc. 22:39-46)

36Na' ka bllinlen Jesúsane' beṇ'ka' nakgake'ne' txen latja' le Getsemaní, na'ch golle' legake':

—Nizə li kwe' shlak shaa daa ka'lə llje'lwill' Chioza'.

37Na' bchi'e Pédrone' na' chop bish'te xiin Zebedewa', na' wzolo chakyeshile' dii wal inleeb. 38Na' golle' legake':

—Axt chaklikazid' lli guettia' daa le chakyeshii yichjlall'-dawaani. Li igaan nizə na' bi guesle.

39Na' blee legake' zi lat' na' bchek' yichje'na' lo yona' na' be'lwille' Chioza', chi'e:

—Xadawaa, shi wakan, bengach ka ikwas dga yen ile'id', per aga gak ka cheenid', san gak ka cheenilo'.

40Na'ch biyaje' gana' lle' beṇ'ka' shon, na' ble'ile' ba chesgake'. Na' golle' Pédrone':

—¿Abikzə bchejlat'gaile la'ch' tgor kwezle nad' bi guesle?

41Bi guesle. Li we'lwill' Chioza' kwenc̄he bi we'zle latj gon beli chenna' le' gan. Aga ki cheeni yichjlall'do'lena' gonlen per beli chenna' bi chizoin.

42Na'ch wyaje' de wchop shii jelwille' Chioza', chi'e:

—Xadawaa, shi ba nakten idil' illag' dga, gakkzə ka cheenilo'.

43Na' ka billine' dii yoblə lekzka' chesləgake' daa bi wzogakile' bishgala'. 44Na' bikzə bisbane' legake', na' wzee sto shii jelwille' Chioza' de wyon shii na' golle'ne' ka ba gollkze'ne'. 45Na'ch biyaje' gana' bgaan beṇ'ka', na' golle' legake':

—¿Ani chestkile? Ba bllin gor nad', Ben' Bsel' Chioza' Yell-lioni, gak' lo na' ben' saaxyaka'. 46Li chas na' li sho'. Ba za' beena' wdie' nad' lo neeka'.

Bex'gake' Jesúza'

(Mr. 14:43-50; Lc. 22:47-53; Jn. 18:2-11)

47Bilan' yiyoll yee Jesúza' ka' ka bllin Juda' beena' nak txen ben'ka' shllin, nchi'e ben' zan ben'ka' bsel' bxoza' chñabia' len ben' golka' chñabia' ben' Israelka'. Na' nox'gake' no spad na' no yag. 48Na' Juda' ba bzajniile' ben'ka' nchi'e nakan gone' wlie' beena' gox'gake', golle': “Kon beena' wnop', len gox'le.”

49Na' ka bllinlene' ben'ka' kwit Jesúza', lii wbig'tie' lawe'na' chil'ene':

—¡Chiox naa, maestro!

Na'ch bnopene'. 50Na' Jesúza' golle'ne':

—Bish'dawaa, ben daa zidyeno'.

Na'ch lii wbig'te ben'ka' bex'gake' Jesúza'.

51Na' ka bex'gake'ne', to beena' nake'ne' txen wleje' spad che'na' na' wdine'n xmos bxochoo bxochoo xenna', bchogtie' tlaa nague'na'. 52Na'ch goll Jesúza'ne':

—Bigooshao' spad cho'na', la' yog' ben'ka' chitgakile' ben' yesya, lekzka' len guetgakile'. 53¿Achakile bi gak inabid' Xa'na' gaklene' nad' na' lii wsel'tie' anjl zan inleeb, shel'ka'? 54Per shi ka' gon', ¿nakra gak yillini Cho'a Xtill' Chioza' gana' nan chonan byen gak ki?

55Na'ch goll Jesúza' ben'ka' ba nox'gake'ne':

—¿Achakile' no wban no nad' za'lenzle no spad no yag kwenche gox'le nad'? Yog' lla bli' bseidid' ben' loo yoodo'na', ¿biche bi bex'le nad' shlak bli' bseidid' ben' na'? 56Per daa chonle ki, chillinin ka na Cho'a Xtill' Chioza' daa bzej dii ben'ka' wdixjee daa golle' legake'.

Na'ch yog'lol ben'ka' nak Jesúza' txen bxonjgake' na' bkwaan'gake' toze'.

Jwa'gake' Jesúza' lao ben'ka' chñabia' ben' Israelka'

(Mr. 14:53-65; Lc. 22:54-55, 63-71; Jn. 18:12-14,19-24)

57Na' ben'ka' bex'gake' Jesúza' jwa'gake'ne' lill Caifáza',

beena' nak b̄xoz choo b̄xoz xen, na' lille'na' ba ndop nllag beṅ'ka' chli' chsedi leya' na' beṅ' golka' chṅabia'. 58Na' Pédrona' janoe' Jesúza' de zit'lə, bllintie' lesh' chyoo che b̄xoz choo b̄xoz xenna' na' jche'lene' beṅ'ka' chap yoodo'na' kwenche ile'ile' ka gak che Jesúza'.

59Na' b̄xozka' chṅabia' len beṅ'ka' chṅabia' beṅ' Israelka' wdiljgake' beṅ' chiljlallee che Jesúza' kwenche wchoglogake' guete'. 60Na' la'kzi beṅ' zan beṅ'ka' biya dii biyiljlall'gake' che Jesúza', aga bidili cho'a dill' che'ka', axt ki bllin chop beṅ' 61be'gake' toz dill', che'gake':

—Ki wna beeni: “Nad' wak yichinj' yoodo' che Chioza' na' shon llazə yiyontia'n dii yoblə.”

62Na'ch wzolla' b̄xoz choo b̄xoz xenna', golle' Jesúza':

—¿Abikz bi ino' cheyi dga nagake' cho'?

63Na' Jesúza' bikzə wṅie'. Na'ch che' b̄xoz choo b̄xoz xenna'ne':

—Chios yaa Chios banna' soe' de taschiw. Wnashki neto' shi lin' Crístona', beena' nak Xiine'.

64Na' goll Jesúza'ne':

—Awe, kan' nakan. Na' lekzka' nia' le', wle'ile nad', Beṅ' Bse! Chioza' Yell-lioni, kwi'a shlāa de shli che Chioza', beena' zeelo nap ye! wak choo ye! wak xenna', na' lekzka' ile'ile nad' zizaa ladj bejka' ze xan yabana'.

65Na'ch bsho' b̄chez' xa b̄xoz choo b̄xoz xenna'. Na' daa bene' ka', bli'e nan le blee, na' wne:

—¿Kwinle ba benile naz beeni nake' Xiin Chioza'! Bich chyalljicho beṅ' gao xya che'. 66¿Bi ka inale?

Na'ch gollgake'ne':

—Chiyal' guete'.

67Na'ch blāa xeneeka' cho'alaó Jesúza' na' wdap' wllall'gake'ne'.

68Na' che'gake'ne':

—Shi lin' Crístona', wnashki non wdap' wllall' li'.

Pédrona' bi b̄chebe' shi nombi'e Jesúza'

(Mr. 14:66-72; Lc. 22:56-62; Jn. 18:15-18, 25-27)

69Na' shlak chak ka', Pédrona' chi'e lesh' chyoonā' ka bllin to noolə wen mandad kwite'na' chi'ene':

—Lenon' nako' txen Jesúza', beṅ' Galileana'.

70Na' lao yog' beṅ'ka' lle' na', aga b̄cheb Pédrona' shi nake' Jesúza' txen, na' golle' noola':

—Bi ṅezid' bin no'.

71Na' ka ziyaje' cho'a puerta' bizle'i sto beṅ' yoblə le' na' chi'e beṅ'ka' lle' na':

—Len beenin nake' txen Jesúza', beṅ' Nazareta'.

72Na' lekzka' aga biz̄cheb Pédrona' shi nake' Jesúza' txen, bzoatie' Chioza' de tas̄chiw, chi'ene':

—Bi nombi'a beena'.

73Na' gokzə xtit na' jabig' beṅ'ka' lle' na' kwit Pédrona' na' che'gake'ne':

—Dii likzan lenon' nako' legake' txen, la' lii nakbia'te ka chshaljo'.

74Na'ch wzolo Pédrona' chone' z̄nia, chi'e:

—¡Dii bal̄kzan nia' bi nombi'ane'! ¡Chioza' wsak'zi'e nad' shi chziye'zan'!

Na' biyoll wne' ka' lii wchellte shikwteza'. 75Na'ch jadini Pédrona' daa goll Jesúza'ne': “Shoṅ shii bi w̄chebo' shi nombi'o nad' ka zi' kwell shikwteza'.” Na'ch biza' Pédrona' chbellyeshee.

Jwa'gake' Jesúza' lao Pilátona'

(Mr. 15:1; Lc. 23:1-2; Jn. 18:28-32)

27 1Na' ka wyeeni', yog'loḷ b̄xozka' chṅabia' na' beṅ' golka' chṅabia' beṅ' Israelka' bengake' toz dill' witgake' Jesúza'. 2Na' b̄chejgake'ne' jwa'gake'ne' lao Pilátona' beena' chṅabia' gana' mbani Judeana'.

Wit Juda'

3Juda', beena' bene' Jesúza' lo na' beṅ'ka', ka gokbe'ile' ba nakan witgake' Jesúza' na' wdao bdiachgan le'. Na'ch wyaje' lao b̄xozka' chṅabia' na' lao beṅ' golka' chṅabia' jasane' shichoate mech de plata' daa be'gake'ne'. 4Na' chi'e legake':

—Le malchga ben' daa bdia' to beṅ' bibi dol' nape' lo na'lena'.

Na' legake' che'gake'ne':

—¿Bera kwent che neto'? Li'z ṅezilo' bin beno'.

5Na' jazal' Juda' mecha' loo yoodo'na', na' tech jayet kwine' jaloo do yene'.

6Na' b̄xozka' ch̄n̄abia' bitopgake' mecha' na' che' l̄jwellgake':
—Bi gak yiyonchon toz mech che yoodo'na', l̄a' nakan dii ba
nap xya.

7Na' be'gake' dill' yizi'gakile' mecha' to yell-lío dii le Yell-lío
che Ben' Wen Yes' gana' wkwash'gake' ben' zit'ka'. 8Daan axt
naanlla yell-liona' len Yell-lío Chen. 9Na' daa gok ka', billinin ka
wna dii Jeremíaza', beena' wdixjee daa goll Chioza'ne', ka wne':
“Bikaagake' shichoa mech plat daa b̄chogbia' ben' Israelka' zak'
beena'. 10Na' kon len wxi'gakile' Yell-lío che Ben' Wen Yesaa,
kon kana' wna X̄ancho Chioza' nad'.”

Bllin Jesúza' lao Pilátona'

(Mr. 15:2-5; Lc. 23:3-5; Jn. 18:33-38)

11Ka bllin Jesúza' lao Pilátona', na'ch che' Pilátona'ne':

—¿Alin' ben' w̄n̄abia' che ben' Israelka'?

Na' che' Jesúza'ne':

—Kan' ba wno'.

12Na' shlak b̄xozka' ch̄n̄abia' na' ben' golka' ch̄n̄abia' ben'
Israelka' chaogake' xya che', bibi dill' billi'e legake'. 13Na'ch
goll Pilátona'ne':

—¿Abi chenilo' diika' chaogake' xya cho'?

14Per Jesúza' ni to diika' chaogake' xya che' ni sh̄cho'a dill'
bi billi'e, na' le bibanchgayi Pilátona'.

B̄choglogake' guet Jesúza'

(Mr. 15:6-20; Lc. 23:13-25; Jn. 18:38–19:16)

15Na' ben' w̄n̄abia'na' yooloe' yog' yiz chisane' to ben' de
lillyana' lla l̄ni Paskwa', kon beena' inab yog' ben' yell yisane'.

16Na' de to ben' lillyana', ben' le zeyi che' nake' ben' mal, na' lie'
Barrabás. 17Na' ka ndop nllag ben' yellka', che' Pilátona' legake':

—¿No ben'ki cheenile yisan'?, ¿aBarrabáza', awa Jesúzi, beeni
nsi'gake' Cristo?

18Golle legake' ka' l̄a' gokbe'ile' daa chakxe'gakile' Jesúzan'
jwa'gake'ne' lawe'na'.

19Shlak chi' Pilátona' gana' chone' yel' joschisa', bse! xoolo'na'
to rson, chi'ene': “Bi gaklebil' ben'ka' chao xya che' beena', l̄a' aga
bi dol' che' de, l̄a' nll'e'yi w̄neid' to yel' che', na' le bsheban nad'.”

20 Per b̄xozka' ch̄n̄abia' na' beñ' golka' ch̄n̄abia' beñ' Israelka' wlooyel'gake' beñ'ka' lle' lla' na' in̄abgake' yisane' Barrabáza' na' gone' mandad guet Jesúza'. 21 Na' Pilátona' sto shii w̄n̄abile' legake':

—¿No beñ'ki ch̄op cheenile yisan'?

Na' beñ'ka' che'gake'ne':

—¿Bisan Barrabáza'!

22 Na' che' Pilátona' legake':

—Na' ¿bera ka gonid' Jesúzi beeni nsi'gake' Cristo?

Na' yog'l̄ole' che'gake'ne':

—¿Bdee lee yag cruza'!

23 Na' che' Pilátona' legake':

—Per ¿bera dii malan' ba bene'?

Na' legake' zizikli chosyaadiagake', che'gake'ne':

—¿Bdee lee yag cruza'!

24 Na' ka gokbe'i Pilátona' bich bi de gone' daa zizikchli ba chaklleshgakile', bene' mandad jxi'gake' nisa' kwenche binee lao yog' beñ'ka', na' chi'e:

—Aga bi dol' nap' nad' daa guet beeni. Len' gak xbag'lene'.

25 Na' yog'l̄ol beñ'ka' che'gake'ne':

—¿Neto' len xiiñnto'ka' idobinto'ne'!

26 Na'ch bisan Pilátona' Barrabáza', na' bene' mandad bet wdingake' Jesúza' na' bene'ne' lo na'gake' kwenche wda'gake'ne' lee yag cruza'.

27 Na' soldadka' b̄che'gake' Jesúza' gana' chon Pilátona' yel' jos̄chisa' na' biti'agake' yog'l̄ol soldadka' nakgake' txen.

28 Na'ch wdingake' xa Jesúza' na' bwakwgake'ne' to lech' x̄na ka che to beñ' w̄n̄abia'. 29 Na' bengake' to b̄xoon de xis yesh' na' bllingake'n yichje'na' ka to corona, na' nee de sh̄lina' bgox'gake'ne' to bar. Na'ch b̄chek' xibe'ka' lawe'na' na' btitjgakile'ne' che'gake':

—¿Toshiizi sechgayi che beeni ch̄n̄abia' beñ' Israelka'!

30 Na'ch no chlla' x̄eneeka' le', no chikaagake' bara' daa bgox'gake'ne' na' chyingake'n yichje'na'. 31 Na' ka wde btitjgakile'ne' na'ch biyingake' lechaa bwakwgake'ne' na' biwakwgake' xe'na' nakwkze'. Na'ch b̄che'gake'ne' kwenche wda'gake'ne' lee yag cruza'.

Bda'gake' Jesúza' lee yag cruza'

(Mr. 15:21-32; Lc. 23:26-43; Jn. 19:17-27)

32Na' ka ba chchejgake' cho'a yell Jerusalénna', billaggake' to ben' Cirene, ben' le Simón, na' bengake' byen bi'e yag cruz che Jesúza'.

33Na' ka' bllingake' latja' le Gólgota, na' zejin Latj che llit yichj ben' wet. 34Na' nan wweejgake' Jesúza' vino daa nchix' to dii zla', per ka bnixe'n, bi goonile' yeeje'n.

35Na' ka biyoll bda'gake'ne' lee yag cruza', soldadka' bengake' to wyitj kwenche got'bia' nogake' yido' xa Jesúza'. 36Na'tech wche'gake' wdapgabe'ne'. 37Na' yichj yag cruz che'na' bda'gake' to dii choe'n dill' biçhe nda'gabe'ne' na', na' nan: "Beenin Jesúza', ben' wñabia' che ben' Israelka'."

38Na' lekzka' bda'gake' chop ben' wban shlaa wej kwit yag cruz che Jesúza'. 39Na' ben'ka' chde gana' dee, chta yichje'ka' na' chgoogake'ne' belban, 40che'gabe'ne'.

—Li' wno' yichinjo' yoodo'na' na' shon llazə yiyontio'n, įbisla kwino' lee yag cruzi shi leilo' nako' Xiin Chios!

41Na' lekzka' bəozka' chñabia' na' ben'ka' chli' chsedi leya', na' fariseoka' len ben' golka' chñabia' btitjgakile'ne', che' ljwelle'.

42—Gok bisle' ben' yoblə per bi chak yisla kwine'. Shi leile' len' ben' wñabia' chechona', cho' ben' Israel, yiyetjshkile' lee yag cruza' naa kwenche shajle'cho che'. 43Nxenilallee Chioza'. Yislashkile'ne' naa shi leile' chakile'ne', la' wne' nake' Xiin Chios.

44Na' axt wbanka' da' lee yag cruza' kwite'na' lekzka' biya dii che'gabe'ne'.

Wit Jesúza'

(Mr. 15:33-41; Lc. 23:44-49; Jn. 19:28-30)

45Na' do ka gobill kat' biçho' doxen yell-lioni axt do ka chida shonch biyeeni'. 46Na' do ka chida shonə besyaa Jesúza' zilljə, ne':

—Elí, Elí, įlama sabactani? —na' zejin: Chios cha', Chios cha', įbiçhe ba wlej yichjzo' nad'?

47Na' bal ben'ka' lle' na', bengakile' ka wne', na'ch che'gabe'ne':

—Elíazan' chaxe', beena' wdixjee daa goll Chioza'ne' kani'yi.



*Na' ka wite' lechaa ze loo yoodo'na' lii
bchez'ten gokañ choplə. Mt. 27:51*

48Na' toe' lii zejdotie' jxi'e to dii bleeje' loo vino daa nak zichj zla', na'ch bzoe'n to lo xis na' jazoe'n cho'a Jesúza' kwenc̄he yeeje'n. 49Na' ben'ka' sto che'gake':

—Jwayishkile'na', la'shki shi wid Elíaza' kwenc̄he yidsle'ne'.

50Na' ka biyoll besyaa Jesúza' zilljə dii yoblə, na' wite'. 51Na' ka wite', lechaa ze loo yoodo'na' lii bchez'ten gokañ choplə. Na' gok to bedxo' na' wlaa yajka'. 52Na' lekzka' axt biyalj gana' bgash' ben' wetka'. Na' zan ben' wetka', ben'ka' ben'lilall' Chioza', bibangake' sto shii 53na' bichejgake' gana' bgash'gake'. Na' ka bibanch Jesúza', biyoogake' yell Jerusalénna', na' ben' zan ble'gakile' legake'.

54Na' xan soldadka' len ben'ka' chaplene' Jesúza' le bblebgake' ka wxo' na' bichlə diika' gok. Na' wngake':

—Dii likzan Xiin Chios beeni.

55Na' zan noolka' wno Jesúza' dezd gana' mbani Galileana', ben'ka' goklengake'ne' che bi dii byalljile', lle'gake' de zit'lə bwiagake' doxen ka gok. 56Na' ladje'ka' len María, ben' yell

Magdálana', na' María beena' nak x̄na' Jacóbona' len Joséna', na' x̄na' beñ'ka' nak xiin Zebedewa'.

Bkwash'gake' Jesúza'

(Mr. 15:42-47; Lc. 23:50-56; Jn. 19:38-42)

57Na' ka chzeles yela' bllin to beñ' wni'a lie' José, beena' nak beñ' yell Arimatea na' goke' txen Jesúza'. 58Na' wyaje' lao Pilátona' janabe' kwerp che Jesúza', na' Pilátona' bene' mandad biyoe'gake'ne'. 59Na' bikaa Joséna' kwerp che Jesúza' na' bitobe'ne' to lech' xtil. 60Na' jlo'ene' to loo ba kob dii zi' benschawee to lee yaj. Na'tech bdee to yaj xen cho'ayinna'. Na'ch bizee. 61Na' María, beñ' yell Magdálana', len Maríana' sto wche'gake' cho'a bana'.

Beñ'ka' wdap cho'a ba che Jesúza'

62Na' betiyo, llana' chombaañ beñ' Israelka', wyaj bxozka' chñabia' len fariseoka' lao Pilátona', 63che'gake'ne':

—Beñ'do', ba jadininto' ka wna dii beñ' wxiye'na' kana' mbane', wne' yiyon lla yibane' dii yoblə ladj beñ' wetka'. 64Na' bsel'gach beñ' lljtape' gana' bkwash'gake'ne' axt ka gakch shon lla kwenche bi shaj beñ'ka' nakgake'ne' txen do wal chel lljalejgake' kwerp che'na', na' tena' ye'gake' beñ': “Ba bibane' dii yoblə ladj beñ' wetka'.” La' shi ba bengake' ka', na'ch gongake' to dii wxiye' walch aga ka dii necha'.

65Na'ch che' Pilátona' legake':

—Na' lle' soldadka', li wche'gake' kwenche gapgake'n axt ga zeelo gagkake'.

66Na'ch wyajlengake' soldadka' na' bsejchachgake' gana' da' yaja' nkwasha'n cho'a bana'. Na'ch bzoagake' soldadka' kwenche gapgake'n.

Biban Jesúza' ladj beñ' wetka'

(Mr. 16:1-8; Lc. 24:1-12; Jn. 20:1-10)

28 1Na' ka wde lla sabda', llana' chombaangake', ni ba lla nech che xmanña' sto, wyaj María nool Magdálana', len Maríana' sto jawiagake' cho'a bana'. 2Na' wzolo to bedxo' xen wal daa betj to anjl che Xancho Chioza' yabana', na' ka blline'

cho'a bana' na' bikwase' yaja' daa nsejan cho'a bana' na' wllie' lawinna'. ³Na' anjla' chey cheeni'e kakzə ga chep yes na' xe'na' nakan xtil inleeb. ⁴Na' ka ble'i soldadka' le' axt bxiztitgake' daa le bblebgake' na' axt witgake' shlet. ⁵Na'ch che' anjla' noolka':

—Bi illeble. Ne_{zid}' Jesúzan' chiyiljle, beena' wit lee yag cruza'. ⁶Koch no de ni. Ba bibane' kon ka wne'. Li dakachi wwiale gani wdixjgake'ne'. ⁷Na' li yiyajdo li lljayell ben'ka' nakgake'ne' txen: “Ba bibane' ladj ben' wetka' na' ba ziyaje' Galileana' lljaleze' le', na' na'kzə ile'ilene'.” Na' ba wnia' le' ka'.

⁸Na'ch biza'do noolka' cho'a bana' chllebgake' na' le chibagakile' zjadixje'gakile' ben'ka' nak Jesúza' txen daa goll anjla' legake'. ⁹Na' ka ziyajgake', bli'lao Jesúza' legake' na' bwape' legake' chiox. Na' jabig'gake' kwite'na' na' wdel'gake' ni'ena' be'la'ogake'ne'. ¹⁰Na' che' Jesúza' legake':

—Bi illeble. Li lljayell ben' bishaaka' shajgake' Galileana' na' ile'gakile' nad' na'.

Wxi' laxj soldadka' kwenche bi we'gake' dill' biban Jesúza'

¹¹Na' ka biza' noolka', ba_l soldadka' wdap gana' bkwash'gake' Jesúza' biyajgake' yell Jerusalenna' jayellgake' bxozka' chñabia' yog' diika' gok. ¹²Na'ch wyaj bxozka' chñabia' je'lengake' ben' golka' chñabia' dill' naklə ka gongake' daa goll soldadka' legake'. Na' ka biyoll be'gake' dillaa, na'ch be'gake' soldadka' mech xen, ¹³che'gake':

—Inatezle wa_l chel shlak chesle, ben'ka' nak Jesúza' txen bidlejgake' kwerp che'na'. ¹⁴Na' shi ba binezi Pilátona' dga, neto'kzə lljazajniinto'ne' nakan gok kwenche bibi gonile' le'.

¹⁵Na'ch soldadka' be_xgake' mecha' na' biza'gake' jazegake'n dill' kon ka gollgake' legake'. Na' axt naanlla ben' Israelka' ni nagake' ka'.

Jesúza' golle' legake' we'gake' xtilleena' doxen yell-lioni

(Mr. 16:14-18; Lc. 24:36-49; Jn. 20:19-23)

¹⁶Na' wyaj ben'ka' shnej, ben'ka' nak Jesúza' txen, Galileana' kwenche yillaggake' Jesúza' lo yaana' gana' golle' legake'. ¹⁷Na' ka ble'gakile' Jesúza', be'la'ogake'ne', per balgake' gokchoplall'gake'. ¹⁸Na'ch jabig' Jesúza' kwite'ka', chi'e legake':

—Ba non Chioza' lo na' inabi'a yabana' na' yell-lioni. ¹⁹Daan, li shaj doxen yell-lioni, li lljali' lljasedi yog' ben' kwenche gakgake' nad' txen. Na' wchoale legake' nis daa ba nonlilall'gake' Xacho Chioza', na' nad', Xiine', len Espíritu Sántona'. ²⁰Na' wli' wsedile legake' gongake' yog' diika' ba ben' mandad gonle. Na' nad' soalen' le' toshiizi axt ka te che yell-lioni.